


BIIBI MU CIIBI

 . . .mwab'ewu mu dindà emu. Mwawa munkaci mwà kwela meeji bwà cikondo cyànyì cingàakalwà mu Flagstaff emu bwà—bwà musangu wà kumpàla. Kùkaadi bu, ngèela meeji, bu bidimu makùmi àsàtù ne mwandamukùlù nàнку awu, pàmwàpa makùmi ànaayi. Mwawa ngàakula bwà dibàndà dyà ku kakùnà. Kakùvwa nêjè nànsha, kàdi kàshinyi kàànyì kakesè kà Model-T kàvwa ne lutàtù lwà kubànda kuulu kwà kakùnà aku. Kàvwa mwà kuya lubilu lwà kilòmèetà makumi ànaayi ne mwandamukùlù ku dībà, kàdi s'mbwena kwamba ne makumi àbìdì ne yinaayi mu *nùнку* ne makumi àbìdì ne yinaayi mu *nùнку*, nudi bamanyè's, mu yimwè yà ku njila yitùvwà naayi eyi. Nènku bivwa ndambù. . .

2 [Mwanèètù wa balùme pa cibùmbà cyà ku cyambilu ùdi wàmba ne: “Bwà cinyi kwènà utùpèèshakù kasàlà kàà Ford aku?”—Muf.] Mwanèètù Carl! [“Bu Wèwè mwà kuswà.”] To. Ùdi ùngambila bwalu bwà kasàlà kàmvwà naakù musangu kampànda, bwà bwalu bwà Ford wanyì awu. Kì mmwaba mwìmpè wà kunùpèèshilakù to, Mwanèètù Carl.

3 Pa nàнку, tudi ne kusàkidila kwàbùngì. Nènku mwawa ne majaadiki àbùngì mìmpè be mu dindà emu, muàtèèlèjile kùdì bàna bèètù aba, mwawa mutuutàkèene ne bàmwè bàà ku bantu abu.

4 Nènku kùvwa mwambi uvwa ufùma ku dyakula mwab'ewu, mwanèètù mukèsè wa cyena Espagnol uvwa mupèeshe. . . mwànà wa balùme mutekète awu dībà bwà kwimba musambu. Kabìvwakù bilenga menemene bwà dīyì dyà mwànà wa bidimu bisambòmbò anyi? Ekèlekèle, dīyì ditàmbe bulenga dyà kacya ngùmvwà, dyà mwànà wa balùme mukèsè wa mùshindù awu.

5 Mpindyewu, mwanèètù wa balùme ewu, bàna bèètù bàà balùme mbacìpwe mwoyi, kàdi ùdi munkaci mwà kulombola masangisha mùnwemu mu cimenga emu. Ndi ngèela meeji ne nkwinshì eku mu èkèleeziyà wa Nzambì, anyi beena Assemblées de Dieu? [Mwanèètù awu ùdi wàmba ne: “Assemblées.”] Assemblées de Dieu, kwinshì eku mu Assemblées de Dieu. Nènku ndi mutwishìibwe ne mbafwànyine kwanyisha bwikadi bwèbè—bwèbè. Disangisha dìdì dinènga ntàntà bule kaayi, mwanèètù? [“Too ne mu dyàlumingu.”] Too ne mu dyàlumingu. [“Dyàlumingu dilòòlò.”] Too ne mu dyàlumingu dilòòlò. [“Tudi tucìcila mu kwimba kwà misambu yà busonsodi dilòòlò edi.”] Mukalenge? [“Tudi twimba misambu yà busonsodi dilòòlò edi.”] Misambu yà busonsodi dilòòlò edi. Mpindyewu nudi babiikidìibwe bónsò ne mwoyi mujima bwà kulwa ku disangisha edi. [“Pa dībà mwandamutekète ne citùpà.”] Dībà

mwandamutekète ne citùpà, dilòòlò edi. Kàdi èkèleeziyà ùdi ùsanganyibwa penyi, mwanèètù? [“mu nombà wa 113 West Clay.”] Udikù mwà kutwàmbila mwaba ùdiye anyi? [“mu nombà wa 113 West Clay.”] Mùsèèsù wà West Clay nombà wa 113, ànu munwemu mu cimenga cyà Flagstaff. Nènku—nènku ndi mutwìshìibwe ne nenwikale. . .

6 Mwanà mukesè wa balùme awu ùdi neebè anyi? [Mwanèètù awu udi wàmba ne: “To.”—Muf.] To, papa wendè ke wimba. Udi wimba, mmwômò anyi? Èè, mbîmpè, ndi mwamba ànu mu cyòci, bwà musangu ùmwè. Èè, mpùùkàpùùka menemene bwà kumòna aci’s; kàdi, pa ciibidilu, kwòkò kwikàle cipeedi kampànda mu dîkù, cidi ciya kùdi—kùdi bakwàbò bònsò bàadi, ngèèla meejì. Pa nàнку bàdi ne. . . [“Byònsò byàkabangila ku dijila dyà byàkudyà ne disambila, Mwanèètù Branham.”] Dijila dyà byàkudyà ne disambila, mpindyewu abi’s—abi’s mbîmpè menemene.

7 Mpindyewu, nudi bamanyè’s, bu ne Àmèrikè ewu, bònsò pàmwè, mèkù ètù ónsò à beena Àmèrikè àvwa mùshindù awu, èè, bàvwa bafwànyine ànu kutàngalaja bampùlushi bònsò. Bukalenge bwà bidimu cinunu bùvwa mwà kwikala bumana kubanga, kî mmwômò anyi? Tudi bafwànyine kwikala ànumu mu mwaba wà mutàmbe bwîmpè dîbà adi. Ncyà bushùwà. Lufù lwònsò lùvwa lufwànyine kujika, disaamà dyònsò, dibungama, dyediibwa dyònsò dyà màyi ku makàsà, nènku tuvwa bafwànyine kwikala ne Kilistò.

8 Pa nàнку, tudi ne disànka, ne ndi ngumvwa majaaniki malenga ónsò aa! Nènku mvwa ne dyèsè dyà kutuutakeena ne Mwanèètù Earl, bwà wànyì musangu wà kumpàla. Nènku—nènku dilòòlò dishààle mvwa nyiikilangana ne mukàjèndè, nènku—nènku wàkabìkidiibwa ne kwondopiibwa, misangu yàbùngì, mu masangisha; mwàkambayè, ku disangisha dyà ndekeelu dìvwàye pa cibùmbà cyà ku cyambilu apu.

9 Pa nàнку, cidi citwènza ndambù, tudyùmvwà bitùsekeshakù kakesè. Ncìvwa muvùlùke Mwanèètù Earl to, nànsha mwìnè mùmvwà mumulabùle ku cianza mwaba kampànda amu. Nènku—nènku mvwa musòmbèle ku dididiishi, dilòòlò dishààle, nkèba bwà yèyè kubàndayè. Kì muntu mulùme munène mule kubàndayè, ùvwa ne mumfwemfwe mufiike pa mushiku. Mèmè kwamba ne: “Kì yèyè ùlwàlwa ewu.” Nènku pashìishe pàvwà. . . Billy, mwanàànyì wa balùme, kwambayè ne: “Kaa, to,” yèyè ne: “wàwa kí mMwanèètù Earl to. Yèyè mutàmbe kushàadila ku bidimu kùdi mulùmyànà wàwa.” Kì pa nàнку mèmè kutwilàngana ne Mwanèètù wa bakàjì Earl mwab’ewu dilòòlò dishààle, nènku mvwa ne dyèsè dyà kwikala mu nzùbu wabò mulenga munu mu cimenga emu.

10 Ewu’s mmwaba mulenga. Ntu misangu yònsò muswè ànu kuwùbìikila ne *flagpole* pamutù pàà Flagstaff, lwà kuulu ku lusongo lwà kakùnà eku, nwàmònu’s. Nènku, ndi nzwàmabila’s,

kwôkò kwikàlè muntu mwab'ewu wa ku Texas, dìtàmishaaku mpindyewu. Ndi muumùke ku Tucson, makèèlèlà awu, luuyà lwipacila degrés makùmi àbìdì ne yìbìdì anyì makumi àbìdì ne yìnaayi kuntwaku, kî mèmè ewu apa mu dindà emu ne cinkooci wa mashika pambidi. Nwamònu's, cidìbo naaci mu Texas, tudi naaci mu Arizona, kî mmwômò anyì? Ncyà bushùwà. Tudi ànu mwaba ewu mene.

¹¹ Ne cikondo eci cyà bwobùmwè. . .Ndokòtà mukùlumpè Bosworth, mulundà wanyì, bààbùngì bàà kunùdì mbafwànyìne kwikala bamanyè Mwanèètù Bosworth. Ùvwa umwe wa ku bansantu bàà kale. Ki kungambilayè musangu kampànda, kwambayè ne: “Mwanèètù Branham, udi mumanyè cidi *bwobùmwè* bùùmvwija anyì?”

Mèmè ne: “Ngèèla meeji ne ndi mumanye, Mwanèètù Bosworth.”

¹² Kwambayè ne: “Mbantu bàbìdì mu bwàtù bùmwè, pa nàнку bàdì ne cyà kwabanyangana kakesè.”

¹³ Nàнку aci ke cidi bwobùmwè buumvwija, tudi twangata ne tufila, twabanyangana muntu ne mukwèndè; ne Mwanèètù Carl Williams, bakwàbò bônso abu, Mwanèètù Outlaw. Kaa, umwe wa ku bantu bàà kumpàla bàà mu Arizona bàtùku batùùdile òmwè dyà ku masangisha ànyì mfranga, ùvwa m'Mwanèètù Jimmy Outlaw, nènku tudi bàà muntu bàà menemene kacya ànu ku cikondo aci. Kàbìdì tudi ne disànka bwà nwènù bônso, bwà bambi ne bàà bèètù batùdì tututakeena naabò mu nyùngulwilu emu. Ncyènà ne dîbà dyà kulabula muntu yònsò ku cyanza to, munsòmbèlè muswè kwenza, kàdi mbwobùmwè mwaba utùdì tutwilangana pàmwè.

¹⁴ Cidi ànu cìmvùlwija mpungilu—mpungilu wa ku Phoenix. Mvwa mupetè dyèsè, kacya ànu mápà à kumpàla àtwàdija, bwà—bwà kukwàcisha bwà kulongolola mápà ne kwakulamù. Ki bulongolodi bùmwèpelè bùndì mèmèmù, kàdi kî mbulongolodi to. Cidi ànu cisumbu cidi cikwàta mudimu munkaci mwà bantu.

¹⁵ Nènku piikalà bàmwè bàà kunùdì mwab'ewu mu dindà emu, bàdì—bàdì kabàyi bàà mu bwobùmwè ebu to, bwà beena Kantu—ku—Byanza bàà beena Kilstò aba, Èvànjeeliyò mu Kaabujimà, ànjì. . . panwikalà nwitabuuja ne ewangata díyì dyànyì, ngùmwe wà ku misumbà mimpè menemene yà bantu. Nènku—nènku kùdì nwènù bambi naanyì, kacýèna cilwisha èkèleeziyà wenù to, cidi mbwà èkèleeziyà wenù. Nwamònu's, ngwàbò mùshindù wà kutèeka mu—mu èkèleeziyà.

¹⁶ Byenzèkì ànu ne ntàpe dísu kùdì inàbànzà mulenga ewu udi ufuma ku dimba musambu awu kùkaadi katanci. Nkaatu mutèèlèje bààbùngì bàcìtètè, kàdi inàbànzà awu ùvwa ne díyì òmwà mwà kuwimba bìmpè, nudi bamanyè's, kàyi ùcimbila pa mènù to, mùshindù awu. Mvwa munange cyòci aci be, inàbànzà, bìvwa bitàmbe, bitàmbe bwimpè. Kwambabò ne ùvwa mukàji

wa muyiishi wa mwab'ewu. Nènkù, mwanèètù, uvwa mwà kumulekela ùkwimbila bwà kulààla butùkù bwónsò, nànkù aci's neciikale cìmpè be, cìmpè menemene. Cìvwa ngimbilù mwîmpè menemene. Mvwa mumwanyishe.

¹⁷ Kàdi, mu dindà emu, ncyènze bu cimvùlwìje kaabwalu kakesè—kakesè kalonda. Kà ne, ndi—ndi munangè kulemba ne kulòba mishipa, nènku aci nkàmwè kàà kutubingilà twà diikala dyànyì munwemu mu Arizona, nànkù, bwà kuya ku dilemba ne dilòba. Nènku ntu muswè aci. Nànkù awu mvwa ndòba musangu kampànda mu New Hampshire.

¹⁸ Nènku ndi ngèèla meeji ne ndi ne baanyaàanaanyì bààbùngì múnwemu bàdi banange kulòba, bónsò balùme ne bakàjì, pààbò, nwamònu's. Twètù bónsò tudi baswè aci.

¹⁹ Nànkù mvwa ne kantentà kakesè kàà kwela mupùyà kàmvwà mubànde naakù kuulu kwàka, kuulu kwà, nudi bamanyè balùmàyànà's, bàdiku ne bujitu ndambù anyì cintu kampànda abu, kabàyi mwà kukùbànda to. Nènku kùvwa mishipa yà mabundu, yàbùngì milenga, mabundu à mu kasùlu, ne yà mifikùlùke, nkulu, ndebèle minène. Kaa, àdimu tètè, mápà makesè à misùlu awu àpweka ùmukila ku nsongo yà mikùnà mu New Hampshire. Nènku mushipa mukesè wà dibundu awu, pàmwàpa wà bule bwà byàlà dikumi ne binaayi, anyì dikumi ne bisambòmbò, yà nànkù ànu bùngiyì! Nènku mvwa mufwànyìne ànu . . . Mvwa mufwànyìne kuyakù ne kuyikwàta, ànu bwà disanka dyà kuyikwàta, kàdi kuyilekelela. Mémè mwà kushipa ùmwè, díbà adi mvwa—mvwa ndya wòwò awu, nudi numòna's, ngwàngata.

²⁰ Pa nànkù mvwa ne umwe wa ku micì yà biimànsèbèndè wa tùláfùlù byà kale byènda bikola, ne—ne musangu wónsò ùmvwà mpàyika nshinga wanyì . . . mvwa ne Mukoolo mukesè wa Cyamu wà diloba naawù. Mvwa mvwa kwalukilamù naawù, mvwa mmwà kuwùjìngila ku musùmbà wà micì yà m̀nsèbèndè wa kàláfùlù. Nènku mémè kwela meeji ne: “Èè, nengàngate kasuuyi ne kubànda kuntu kwàka, mu dindà emu, ne—ne kuupula mucì wà mansàbèndè wa kàláfùlù, bwà nshinga wanyì kàkwàcìkìkù to.” Kaa, mémè e kutàngila paanyimà mwinshì mwà kantanyì kàà kale . . . kenzè bu cibila cyà milonda, nènku bàvwa ànu munkaci mwà kuyiteeka mwaba awu, bindile ànu bwà Mukoolo awu bwà kulengamù. Mpindyewu, bufùkù bujimà . . . Mvwa ne ciibidilu cyà kwamba ne: “bidi bibwela mu nsuki yànyì,” kàdi ncyènà ne nsuki mikùmbàne bwà byòbì kubwelamù mpindyewu to. Pa nànkù mvwa ne . . . mvwa ànu . . . bòbò ànu mùshindù ùvwàbì—mùshindù ùvwàbì mwà kuyitàngila. Nànkù ke mémè kujuuka mwaba awu, mu dindà amu, kwambula kasuuyi kakesè kàà kale aka, e kuupula mucì wà mansèbedè wa kàláfùlù ewu. Nènku mémè kupeta yìsàtù anyì yìnaayi, yìmvwà ne cyà kulongolola bwà didyà dyà mu dindà, ne kwalukila. Nènku mémè ncitu mulàmbi mwîmpè to. Ne ntu

mwambila mukàjàànyì ne ncìvwa mwà kusàbisha màyi ncìyi mudwòshè to, nàнку's nwàmanyì ne aci mmudimu wà kulàmba mubì menemene be.

²¹ Nàнку, pankaaavwà ngààlukila, kùvwa ours wa dishinà ne twànà túbìdì, nènku yìvwa mibwele mu ntentà wanyì mukesè amu. Ne nwènù bàtù bàmba bwà dinyangakaja dyà cintu's wè, kanwèna bamanye mùdì bintu mwà kwikala binyangakaja pàdì ours kàyì mwànji kubwela mu ntentà webè nànsha. Yéyè, kí ncìdìyi yìnyangakaja to...kí ncìdìyi yìdya to, ki cìndì nswa kwamba, ncìdìyi yìnyangakaja. Mvwa ne dicyùwà dikesè, dicyùwà dikesè dyà balami bàà mikòòkò dìvwà muntwamu edì, nènku yìvwa mwà kubànda pa dicyùwà dikesè edì e kutùpika kupweka, bwà kumvwa mutooyi wà kashìbà, kàdì e kudìsùnsulula tupesetupese, nudi bamanyè's. Kàdì ndi mwenzè ànu mfika anyì, mvwa ne kaacingoma kakesè kàà kale kakwàte dimòmenà kàà .22 katèeka muntwamu, kàdì mvwa ne cisuuyi eci mu cyanza cyànyì.

²² Nènku, nudi bamanyè, dìbà dingàakalwà, dishina dyà kale adi kunyeemenadi ku luseke kampànda, ki kubìikilayè twànà twèndè. Ki kànà kàmwèpelè kumulondakù, èyowà; kàdì kakwàbò kwòkò e kusòmba, kakwàcìkwètù kakesè menemene. Mu ngondo wà lumùngùlù, nudi bamanyè's, kacifuminaku ku dipàtuka. Kàvwa ne nyimà wakò mukoma kùndì, mùshindù *awu*. Ki mèmè kwela meeji ne: "Ncìnyì cìdìku kènza?" Èè, ki mamwàku kuntàngilaye. Ki mèmè kukèba mucì, bwà kumòna mùshindù—mùshindù ùvwàye pabwìpì, bwalu yìdì mwà kukwela nzàdì, nudi bamanyè's, bwà twòtù twànà atu. Nènku, yòyì, kwèna mwà kuyìpangisha kukubùndula ku dyakula naayi to, nwamònu's. Pa nàнку mèmè kushààla mutàngile dishina dikolè adi munda mwà katanci, nudi bamanyè's. Kutùngunukadi ne kudila, ne kwenza mutooyi, cintu kampànda cyènze bu mùdì nyuunyi kampànda. Bìkèngela wèwè kumanya mùdì mwadi awu ùmvwika. Nàнку ki kutùngunukadi ne kudila dibìikila kànà aku, kàdì kànà aku lwàkù ne lwàkù wèwè.

²³ Èè, mèmè kutùma meeji ku cingoma cyànyì. Ki mèmè kudyàmbidila ne: "To, bu mèmè mwà kubwelamù ne kubàkula cingoma aci, bu mèmè mwà kwikala mwàsè dishina dyà kale adi, mushiye twànà twà nshiya túbìdì atu mwitu," ne ncìvwa muswè kwambila dipila dyà bwalu abu. Nènku, kàbìdì, bu yéyè mundwila, cingoma cyà makumi àbìdì ne yìbìdì aci cìvwa mwà kwenza bu cìdì cikesè, nudi bamanyè. Ne mîngà misangu kacìvwa cìteema to, bìvwa bìkèngela kupàula misangu yìsàtù anyì yìnaayi bwà kuteemaci. Pa nàнку mèmè kwela meeji ne: "Èè, nenkabàndè ànu ku mucì wàwa, bu yéyè ànu mubùndùke mutàngile kunweku. Nembàndè kuulu ku mucì kwàka, ngààpulèku ànu ditàmbà dikesè e kumupyànda ku dyùlù aku." Dyùlù dyàyì ndinèfùke. Ne yìdì ànu yìkungula, pashiishe yìpweka, nudi bamanyè's, ne yìkushiya nkààyebè. Ki mèmè

kudyãmbidila ne: “Nêmbandè ku mucì aku.”

²⁴ Kàdi cìvwà cìkòka kakwàcikwètù aku, kaa, kasòmbe mùshindù *ewu*. Kí mèmè kwela meeji ne: “Ncinyì cidìku kènza?” Pa nàнку mèmè kutùngunuka ne dyènda dinyùnguluka, mutàngile dishina adi, nudi bamanyè, ngènda ntàmba kuseemena kule, ne ngènda nseemena pabwìpì ne mucì, bwalu dìvwa ditùngùnuka ne kubìikila kànà aku. Pa nàнку mèmè kutàmba kuseemena kule ndambù, kàdi nudi bamanyè cìvwà kakwàcikwètù aku kènzè anyì?

²⁵ Mpindyewu, ntu munange binkàlangà, anyì mikàtà, ngèèla meeji ne ke munùtù nubìikila, kùneeku. Kwìnshì ku Sud eku, tutu tubìikila ne binkàlangà. Ncìtu mubyènji wa nsongo to, kàdi ntu mubìdì wà nsongo. Nènku, nudi bamanyè, mèmè mvwa Baptiste. Ncìtu muswè kumyamina to; ntu muswè menemene kubìbàtiiza, bulelèlè menemene kubipòngolwela bwìci abu. Nàнку mvwa mutwàle ndundu wa bwìci, wa bula *ebu*, mutèèka mwaba awu, citùpà cyà mbekeci bwà binkàlangà byànyì.

²⁶ Kàdi kakwàcikwètù aku, nudi bamanyè's, ours ùsòmbèle munange bintu byà nsùkaadi, nànsha byà munyi. Ùvwa mubuulule mbekeci wa bwìci awu. Nènku ùvwa musòmbe mwaba awu ne kadikama kakesè kàà bunène *nùнку* aku. Nènku ùvwa mukambùlwile mu mabòkò èndè amu, ne ùvwa ùcimpikamù kakàsà kèndè kakesè aku, ne ùlaka mùshindù *awu*, nudi bamanyè's. Ncyà bushùwà. Ne ùvwa mwà kulàka ne kaalùdìmi kakesè aku. Kí mèmè kubanga... Nènku bu ne mvwa ànu ne cyamù cyà fòtò, ndi mvwa' kunanga bwà kuleeja cyòci aci mu dindà emu, ànu bwà kucitàngila. Nènku ki kwòkò aku, kàcimpikamù kakàsà kààkù kakesè aku, ne kàlaka mùshindù *awu*. Kí mèmè kwela lubila ne: “Kàtukà mwaba awu,” mùshindù awu. Kàdi kakàyi mwà kucyùka bìmvwà ngàmba to, kutùngunukakù ànu ne kulàka ànu mùshindù awu. Kulàkakù mbekeci awu yònsò, nwamònu's.

²⁷ Kí mèmè kukèèla lubilà lukolè mùshindù awu, kwòkò kukènzakanakù e kuntàngila mùshindù *awu*. Kakàyi mwà kukàngulakù mèsù ààkù to, kàvwa ne bwìci mubidi mujimà, nudi bamanyè's. Mu twisù mwàkù mwònsò emu, mu kafù kààkù kakesè amu, mupàte tètè ne bwìci ne mwàkù mwònsò! Nènku díbà adi, paanyimà pàà katanci, kàvwa kènda kàtetuka eku ne eku kwà njila, kàya lùbilu kùdì mamwàkù. Bòbò kukaàkidila mu bisuku amu ne kubangabo kukàlaka. Yìvwa ne bwòwà bwà kusòmbela ku mbekeci aku, cìkòlà yìvwa mwà kumulàka.

²⁸ Kí mèmè kwamba ne: “Aci ní kí ncimfwànyìne kwikala masangisha mimpè, à kale à cyena mpenta; bùle ànu tètè ne bintu bimpè, byà kalolo, pàdìbo bàpàtuka, ke muntu mukwàbò ùbilàka. Awu mmasangisha malelèlè à bwòbùmwè. Mpindyewu tudi tulwa mùshindù ewu, bwà kwela byanza byètù mu mbekeci, yònsò wa kutùdì, too ne mu lukèngiwbwà, wa

mabènèsha à Nzambì. Ne ndi mutwishìibwe ne nenùcipetè ku ditàbuluja didi munkaci mwà kwenzeka ku Assemblées de Dieu kwaka, ndimònàngàne kuntwaku patùdi twakula apa. Mukalenge ànùbènèshè.

²⁹ Mémè kwamba mu Phoenix, ditùkù adi, kakesè... Ndi ntèkemenà ne kacìvwa cyumvùka bu cyà cìnyangakaja cijila to, kaabwalu kakesè kàà kàsekeshà kàà mwambi kampànda uvwa mwà kuya ku cibumbà cyà ku cyambilu dindà dyònsò, munda mwà bidimu makumi àbì, mushimàte, ùvwa mwà kuyiisha tusunsa makumi àbìdì, ne pashiishe kujikija, ne pa nàнку kabàvwa mwà kuumvwa ne mbwà cinyi bìvwa nàнку to. Nàнку awu, dindà kampànda, yèyè kuyiisha mèbà matwè ku ànaayi. Ke ba—balami kumubiikidishabo, ne—ne kwambabò ne: “Mpaasàtà, tudi bakunange bulelèlà.” Bòbò ne: “Tudi—tudi twela meeji ne mayiisha èbè mmalenga be.” È kwambabò ne: “Tudi bamanyè ne, twètù bu kasumbù kàà balami, tudi bakùtangile ne bapime dìbà dyùdi wangata, tusunsa makumi àbìdì menemene mu dyàlumingu dyònsò mu dindà.” Ki bòbò ne: “Mu dindà emu wèwè kwenza mèbà ànaayi.” Bòbò ne: “Katwèna ànu tuumvwa to.”

³⁰ Yèyè kwamba ne: “Nénwambilè, bânà bèètù.” Yèyè ne: “Dindà dyònsò, pàndi nya bwà kuyiisha,” mwàkambaye, “panùtù numbìkila ku cibumba cyà ku cyambilu apu, ntu ngàngata umwe wa ku Mbòmbò yà Lupeepà eyi mmwèla mwinshì mwà ludimì lwànyì. Kàdi,” mwàkambaye, “mu tusunsa makumi àbìdì, pàdi Mbòmbò wa Lupeepà awu ùjika,” yèyè ne, “Ngà—ngà—ngàjikiji,” yèyè ne, “Ndi mmanya ne dìbà dyàkànyì dyà kwimanyika.” Ki kwambaye ne: “Cilèmà cìvwàkù mu dindà emu ncyà ne, mvwa ne lubòta.”

³¹ Carl Williams, Jewel Rose, bânà bèètù bàà balùme ne balunda bàànyì bàà pa mwoyi, bààkapweka mu cimenga ditùkù adi, e kupetabò lubòta lwà cijèngù lwà bunène *ebu*, bwà kulùmpèèshabò, nènku, kàdi ncyèna naalù mu dindà emu to. Pa nàнку, tudi ne kusàkìdila bwà kwikala mwab’ewu.

³² Mpindyewu, kùdikù muntu kaaba aka mumanyè Docteur Lee Vayle anyi? Ncyèna ngèèla meeji ne... pànwàpa to. Yèyè’s ùvwa muyiishi wa ba-Baptistes, Docteur mu Bunzambì, ne yèyè ùdi ne mapòlomè èndè’s. Ùvwa mulongeshi wa mu tùlaasà tutùmbùke, ànu kwònsò eku, ne yèyè mene mmuntu mwimpè be, mumanyi wa dibàla. Nènku mikàbà yànyì yà mèyì yà *Bikondo Mwandamutekète byà Èkèleeziyà* ayi, mvwa mumutùmineyì, bwà yèyè kwakaja mwakulu. Bwalu cyena Kentucky cyànyì cyà kale cyà “hit, hain’t, ne tote, ne carry, ne fetch aci,” aci kacyèna cyumvùka cìmpè kùdì bantu bàdì bàbala mikàndà nànsha, pa nàнку ùvwa ne cyà kubìngaakajila mwakulu. Nènku dìbà adi, paanyimà pàà yèyè mumanè kujikija, kuwùntuminayè misangu yibidì, bwà mèyì makwabò. Byòbì mene, mukàndà ewu ùdi

ùpita ku cyamù mpindyewu, paanyimà pàà bidimu bisàtù anyi binaayi.

³³ È kunkokayè, wàmba ne: “Ndikù mwà kufùnda mukàndà kampànda, ànu dyela dyànyì dyà nsèkè anyi?”

Ki mèmè ne: “Èè, mbìmpè’s, Mwanèètù Lee.” Ki mèmè kudyàmbidila. . .

³⁴ Pashìishe kwambayè ne: “Ndi nkwambilakù cintu kampànda.” Yèyè ne: “Kí ngwà disùmbisha to; ngwà dyabanya.”

Mèmè kwamba ne: “Èè, díbà adi, ndi mutwìshìibwe ne mbìmpè’s.” Nwamònu anyi?

³⁵ Pa nàнку bàvwà bàwùtùdila mfranga, bantu batwè ku dikumi bàdi bàwùtùdile mfranga, mwinè awu mmuyiile ndola cinunu ne nkàmà yitaanu, ngèèla meeji, mùndi muumvwè, bwà yôyi ayi binunu dikumi. Nàнку awu tudi—tudi naayi, yònsò yidi yùmukila ku cyamù kùkaadi ndambù wa matùkù, nènku tuvwa ànu ne yìbidì anyi yìsàtù, makèèlèlè awu, nènku Billy mmuyitwàle mwab’ewu. Nènku yidi—mmwabànyìibwe. Mpindyewu, ncìtu kacya muwùbale to, ncyènà mumanyè cìdiyè mwàmbe. Kàdi ndi. . . Eci nku dyànyì diitabuuja. Kàdi ndi mutwìshìibwe, nwènù mwà kwikala dijinga ne ùmwè, bu nwènù mwà kutùfùndila, netùkutùminèwu, ku bitupù. Nwamònu anyi? Mwinè awu mmwinyika ne *Mupròfeta wa Cicyà cyà Makumi Àbìdì*.

³⁶ Nènku pashìishe mèmè kumòna mu fòtò mwab’ewu, pa mpàla pàà mukàndà awu, bààbùngì bàà kunùdì bàdi ne fòtò ewu, mu bushùwà bwà bwalu, ne mbaCimòne, mmwaba ùvwà Mwanjèlò wa Mukalenge mukwàcìibwe fòtò mu Houston, mu Texas. Kàdi mbakòsa citùpà Cyèndè.

³⁷ Pashìishe ndi mmòna mwab’ewu paanyimà. Mbanganyi mwab’ewu bàkaadiku babwele mu dimwè dyà ku masangisha, tùmònèbi tǔng? Ngèèla meeji ne pàmwè ne bònsò bàà kunùdì bàkaadi babwelèmu. Nutu nungumvwa ngàmbe misangu yàbùngì ne: “Mundidimbi ngwàwù mulembèlèle pa muntu kampànda.” Mpindyewu, nwamònu’s, wèwè mwambè díyì, ne kadiyì bulelèlè to, Nzambi kààkwikala naadi bwalu nànsha. Nudi bamanyè ne Nzambi kàtu ùdisanga pàmwè ne mashimi nànsha, kàdi Ùtu ùshìndika ànu cidì cilelèlè.

³⁸ Pa nàнку pàkambilàYe Mòsà, díbà divwàYe mutuutàkèène nendè mu cipèèlè, mu Dikunji dyà Kapyà, mu kaacipuka kàvwà kàlàkuka kapyà aku, pashìishe pààkapàtulàYe bantu abu, ne aba bàvwà mwà kulonda Mòsà abu, bwà lwendu alu, pashìishe kupwekaYe pa Mukùnà wà Sinàyi, Dikunji dyà Kapyà dimwèdimwè adi, ne kushìndika ne civwà Mòsà mwàmbe aci cìvwa bulelèlè.

³⁹ Mpindyewu, Nzambi neènzè nàнку. Ùtu misangu yònsò ànu wènza nàнку. Pa nàнку Bukènkè *ebu*, mu bushùwà bwà bwalu,

tudi tuBùswikàkaja ne Nzambì, bwalu Bwôbù bùdi ne ngiikàdilù umweumwe awu ne byònsò byàkenzàYe pàvwàYe pa buloba apa.

⁴⁰ Pashiishe pa cyôci aci, wàmba ne: “Muntu ewu, ndi mmòna ne wèwè udi mubwikila kùdi mundidimbì wà lufù, mundidimbì wà midimà.” Mbanganyi, mbanganyi bàà kunùdi bàkaadiku búmvwe aci cyambiibwe! Èè, mwab’ewu ànu àbìdì adi panshì aa mu disangisha kampànda, kuvwa muntu kampànda ùjinga kumanya, ùvwa muswè kumòna ní ùvwakù mwà kupeta fòtò waci, pàvwàCi cyambiibwe. Pa nàнку bôbò. . . Kùvwa inàbànzà kampànda musòmbe pabwìpì, ne muntu ewu ùvwa ne cyamu cyà fòtò. Ki mèmè kwamba ne: “Inàbànzà udi musòmbe apa ewu, m’Màndàmù Kampànda,” cyònsò cidiku aci. Mèmè kwamba ne: “Yèyè mmubwikila kùdi munidimbì wà lufù, kàdi ùdi ne kànsèrè.” Nènku ànu pa díbà adi è kukwàtayè fòtò, bwàlu cívwa pabwìpì. Nènku ke cyôci aci pwàà, nwamònu’s, kànsèrè kàà lufù kafìlke kenza bu cibwikilu cyà ku mutù, kalembèlèle pa mukàjì awu. Ki pashiishe Nyumà Mwimpè kwakulayè cyàkàbìdì. . .

⁴¹ Mpindyewu, pàvwàbo bafunde eci mu mukàndà, bàvwa bacikòse, pa nàнку bàvwa beelemù ànu eci cyanàànà too ne pènzàbo mukàndà mukwàbò. Ke bwà cinyl nenùmonè dibèjì didì pàà nkayaadi adi muntwamu. Ngèèla meeji ne n’*Dìyi Dyà Dyondopa* ke uvwa mupàtùle mukàndà awu ku cyamù.

⁴² Nènku mpindyewu kí ngwà ditùdila nànsha kàmàndà kàmwè to. Bàdì bawùtùdile mfranga mbàdì paanyimà pàà cizubu cyà mukàndà apu, bàdì beelèmu ndola cinunu ne nkàmà yitaanu, ànu bwà kuwùpatula ku bantu, bwà bantu bàwùbalè. Pa nàнку, kí ngwà disùmbisha to, ne mmukàndà mukesè mwimpè. Ne mèmè ncyènà mumanyè bìdimu to, ncìtu muwùbalè kacya; Taatù mmucimanyè.

⁴³ Kàdi nwamònu’s, Cívwa, bwànyì mèmè, Cìdi m’Bulelèlà kakùyì mpatà. Ki citùdi tukèba ncyôci aci, m’Bulelèlà. Yesù wàkamba ne: “Nenùmanyè Bulelèlà, Bulelèlà nebùnùpè budìshikaminyi.” Ne Yèyè ki Bulelèlà abu. NcidiYè, Yesù, Mwànà wa Nzambì, ke Bulelèlà bwà Dìyi, bwalu Yèyè ùvwa Dìyi divwijìbwe mubidi. “Ku cibangidilu kwàkadi Dìyi, ne Dìyi dyàkadi ne Nzambì, ne Dìyi dyàkadi Nzambì. Ne Dìyi dyàkavwijìbwa mubidi ne dyàkasòmbela munkaci mwètù.” Díbà adi, aci cyàkaMuvwijà Bulelèlà, bwalu Dìyi m’Bulelèlà, ne Yèyè ùvwa Bulelèlà.

⁴⁴ Mpindyewu patùdi tuMumòna wàlukila mu matùkù à ndekeelu aa, nkwaka munène wa Nzambì ewu, wènda ùtàmbakana mu matùnga à pa buloba, ùkùngwija bantu bwà Mukàjì-musèla, aci’s m’Bulelèlà.

⁴⁵ Bidimu bishààle ebi, bàvwa bàmba ne: “Kakùvwa cintu pààci ne ndyakula dyà mu myakulu to. Cívwa macimbu.” Nzambì

ngudi mucilayè, ne Yèyè wàkaciijaadika ne m'Bulelèlà. Ncyà bushùwà.

⁴⁶ Muntu kampànda ùvwa wàmba, mu dindà emu, ngèèla meeji ne ùvwa mmwanèètù wa bakàji wa ngiikàdìlù mulenga wàwa udi ùkwàta mudimu wàbùngi ne bàna bwà dibàtiiza dyàbò, è kwambayè ne: “Udi mwà kuumvwa muntu wàkula mu myakulu. Kàdi, bwà kuumvwa muntu kampànda wimba mu myakulu, nwamònu’s, civwa ncintu cilenga be.”

⁴⁷ Ndi mvùluka dilabula dyànyì dyà kumpàla mvwa nsanganyibwa ku Rediger Tabernacle mu Fort Wayne, mu Indiana. Nènku mvwa munkaci mwà kwakula, ngèza mudimu wà dyondopa, paanyimà pà lufù lwà—lwà Mwanèètù B. E. Rediger. Nènku Mwanèètù Bosworth uvwamù, Paul Rader. Nènku bààbùngi bàà kunùdi nwènù beena kale, bu mémè kùnu, nudi bavùlùke Paul Rader; ne yèyè ùvwa Baptiste, ne twètù kabidì, pa nàнку tuvwa balundà banène. Ki mùdibi ne pàmvwà ngàakula kuntwaku, mvwa ne cyà kusambidila babèèdi. Civwa cintu cyà nkèmenu bwàbò bòbò musangu awu. Kàdi inàbànzà kampànda kutwàlaye mwànà wa balùme kuntwaku, uvwa mucibùkile panshì, nènku, pàvwàye wènda ùlwa ku cibùmbà cyà ku cyambilu apu, cikèèna—kumòna cyà Mukalenge kumwènekaci ne kumwambila byonsò bìvwà bitàngila mwànà mukèsè wa balùme awu. Ki mémè kulòmba mwànà wa bakàji awu bwà kumpèèsha—kumpèèsha mwànà wa balùme mukèsè awu.

⁴⁸ Mpindyewu ànu bwà bujaadiki bwà mwanèètù wa bakàji, bwà nùfike ku dimòna bunène bwà disànka ne bulelèlà bwà cikùmà cyà—cyà ngàsà wa Nzambì, civwàCi mwà kwenza, pàkenzekàci bilondèshile Dìyì dyà Nzambì, nwamònu’s, mulayì wà Nzambì bwà cikondo.

⁴⁹ Mpindyewu, mulayì wà Nzambì kùdi Noà kawàkutwàmbulwìshakù twètù leelù ewu to. Mulayì wà Nzambì kùdi—kùdi Mòsà, katùvwà bafwànyine kwakidila Mukenji wà Mòsà to. Mòsà kàvwà mufwànyine kwakidila mukenji wà Noà to. Tudi ne Mukenji wà cikondo. Katwèna bafwànyine kwakidila mukenji wà Luther to. Katwèna bafwànyine kwakidila mukenji wà Wesley to. Eci ncikondo cikwàbò. Nzambì mmukòse Dìyì Dyèndè bwà cikondo cyònsò. Nènku pàdi cikondo aci cilwà, Ùdi ùtùma muntu kampànda kuntu aku bwà kushindika Dìyì adi, bwà kujaadika ne aci ncilelèlà. Nènku mpindyewu tudi tumòna mu cyònsò cya kùdibi díbà adi, ànu cyàkambà Yesù pàvwàYe pa buloba, Wàkamba ne: “Nudi nwibaka nkità yà bapròfètà, ne baatatwènu ke bààkabèèlamu.”

⁵⁰ Mpindyewu, beena kwètù mbeena Kàtòlikè, munùdi bamanyè amu, bu mùndì mwena Irlande. Mpindyewu tudi. . . Mpindyewu bàdi—bàdi bàmba bwà Patrick Munsantu, beena Kàtòlikè bàmutèèla. Èè, yèyè’s mwena Kàtòlike ànu bu mùndì

emu. Bàdi bàakula bwà Jeanne d'Arc. Bòbò's bàakwosha mwàna wa bakàjì awu pa nkùnyi, bàmba ne mmuloji, bònsò tudi bamanyè cyòci aci, bwalu yéyè ùwva wa nyumà ne ùmòna bikèènà-kumòna. Ncyà bushùwà ne, paanyimà pàà bidimu nkàmà yìbidì, bàkuumbula mibidi yà bansaserdòsè abu, kuyòshabò ne kuyèla mu musùlu. Kàdi kí ng'aci cìdì cìkèngela to, nwamònu's.

⁵¹ Bàsòmbela misangu yònsò ànu bàpanga kucimòna. Muntu misangu yònsò ùtu ànu ùtumbisha Nzambi bwà bìvwàYe mwenze, mwindile byàlwàYe kwenza kumpàla, kàdi ùpanga kumòna bìdiYe munkaci mwà kwenza. Ki ngiikàdilù wa muntu nyéyè awu. Ne yéyè kátu mwànji kushintùlùla ngiikàdilù wendè to, muntu wa pa buloba.

⁵² Pa nàнку tudi tusangana ne Mukenji wètù wùdi, leelù ewu, Mukenji wutùdi naawù awu, ngwà ne: “Pàtukàayi mu Baabùlòonà, ne ikàlaayi badishikàmine, ne—ne ikàlaayi bùjiibwe tètè ne Nyumà, ne myèndù yènú milongolola ne mikezùke, ne, bàndishàayi mèsù, bupikudi bwètù bùkaadi bùsemena,” bintu ebi mbyenyi kùdi bantu bàabúngì bàdi bàpuuyakana ne bàsòla Dìna dyà Mukalenge wetù munanga.

⁵³ Kàdi nànsha nàнку munkaci mwà biine byònsò abi, katwèna cilumbu ne bantu abu, beena màngumba abu nànhsa. Mbantù bìmpè, bantu balenga. Mbèètù ba—mbanyàneetù mu Èvànjeeliyò, bwalu Yesù wàkamba ne: “Muntu nànsha umwe kèna mwà kulwa kùNdi pàdi Taatù Wanyì kàyì mumukòke to. Ne—ne bònsò bàdi Taatù muMpèeshe, nebàlwe.”

⁵⁴ Pa nàнку, twètù tudi bambùle ànu bujitu bwà kumyamina Mamiinu. Àmwè àkamata ku kálà kwà njila, makwàbò mu malaba mashìlleshìlàngàne, màngà àkamata kwaka e kutwàla lukàmà pa dìmwè. Nàнку, twètù tudi ànu bamyaminyi bàà Dimiinu. Nzambi ke Ewu udi uDìludika díbà didìDi dímata. Nènku mpindyewu tudi tulòmba bwà ne pàmwàpa, mu dìndà emu, kwikalakù kaaDimiinu kampànda kakesè kààmata mwaba kampànda, kiikalà mwà kukànkamika muntu kampànda. Ànu bu mùdì muntu ka—ka—kampànda . . .

⁵⁵ Bwà kujikija bujaadiki bwànyì bwà inàbànzà mutekète awu mwena bwalu bùmvwà ne cyà kwakula awu. Inàbànzà ewu wàkatwàla mwàna mukesè wa mu dibòko ewu, kaansongààlùmè kakesè, ngèela meeji, kàà bidimu bitwè ku dikumi, dikumi ne bìbidì, ne pàmwàpa kakàyi bukolè abu to, bwalu mukàjì ewu ùwva mumwambùle. Ke kumufilayè. Nènku ànu pa díbà adi, pàmvwà munkaci mwà kusambidila mwànà apu, ki kakwàcikwètù kudyompokakù mu mabòko ànyì e kuyakù lùbilu kènda kànyemakana pa cibùmbà cyà ku cyambilu apu, munkaci mwà bantu batwè ku binunu bìsàtù ne nkàmà yìtaanu anyì binunu binaayi. Nènku pàkenzàko nàнку awu, cintu cyà mbedyàmbèdì cyà bòbò kumòna cyènzeka, maamù awu, uvwa

musòmbè mu nkwasà wa kumpàla, ùmba ùkùluka ùùmínyina. Nènku mwànà wa bakàjì mukèsè wa ba Amish . . .

⁵⁶ Nudikù bamanyè ba-Amish anyì? Ncyèná mumanyè ní nudikù naabò muntwamu anyì, bàà nsuki mile, mbantu balenga be, bakezùke ne musùmbà mwimpè be. Nudi bamanyè mu ba Mennonites bònsò, anyi ba-Amish, ne bakwàbò, katùtùkù banji kupeta bujaadiki bwà ditomboka dyà bânà to. Bàbìikilaayi ne mbakùtākàne panwikalà baswè kubàbìikila, kàdi tudì—tudì bapangìle cintu kampànda mu nzùbu yètù, cìdìbo bóbò naaci. Bóbò kabèèna ne cilumbu ku tubàdi, cyà—cyà didìtwàla dibì dyà buntòmbòjì bwà bânà munkaci mwàbò nànsha. Bàdi bàkolesha bânà bààbò, ànu mu njila umwe, ne mwinè awu ke njila udibò bàlonda.

⁵⁷ Nènku inábànà mutekète ewu ùvwa mwimbi wa dipòkò wa cisanjì cyà pyàno, mukàjì mutekète mulengele mpàla, mwikàle ne nsuki mile, yà mvwàngalà miswikila paanyimà. Kàdi pàākakènzakanàye eku ne eku . . . Mpindyewu, ùvwa Amish, kàvwa mumanyè kantu nànsha kàmwè pa bidì bitàngila Mpeta to, nànsha mèmè ncìvwa mumanyè to. Kàdi mmwenze ànu ùtàngidila pa cibùmbà cyà ku cyambilu apu, ne ùmòna mwànà wa balùme mutekète awu wènda ùya, wènda mutàngile kwàka, e kwelayè byanza byèndè muulu.

⁵⁸ Mpindyewu, ndi mumanyè ne kudi dikolesha dyà maalu, ne ndi ntèkemena ne ncyèna naadi mu meeji to. Ncyèna—ncyèna mwena mashimi to. Nènku mèmè—ncìtu nànku to. Pangikalà mutùpākàne, ncyèna—ncyèna mwenze ku bukòlè to, ndi mutùpākàne mu dipanga.

⁵⁹ Kàdi nsongàākàjì awu kwelayè byanza byèndè muulu, ki nsuki yèndè ayi kupwekelayi pa makaaya èndè apu, ki kubangayè kwimba misambu mu mwakulu mwenyi. Ne ùvwa munkaci mwà kwimba muyengà awu wà ne: “Ngàngàbukà Munène ùdi pabwìpì mpindyewu, Yesù mwabanyanganyi wa makènga.” Nènku mmwenze ànu udyàmpuka kuntwaku . . . Ndi mumanyè ne eci cìdi cyùmwika cyà pabwàci mpindyewu. Kàdi nsongàākàjì ewu kàvwakù mumanyè kantu nànsha kàmwè pa bidì bitàngila dyakula dyà mu myakulu to, kàdi ùvwa munkaci mwà kwimba mu mwakulu mwenyi ne: “Ngàngàbukà Munène ùdi pabwìpì mpindyewu, Yesù mwabanyanganyi wa makènga.” Ki pyànò awu kutùngunuka ne kwimba ne: “Ngàngàbukà Munène ùdi pabwìpì mpindyewu, Yesù mwabanyanganyi wa makènga.” Èè, bàākabàkùngwija ku byoshelu aku, ne mwinshì mwà cisàsà amu, panshì pònsò apu, bantu bèèla mbilì mikolè! Nsongàākàjì awu mwimàne kuntwaku, ne mpàla wèndè mwela muulu mùshindù *awu*, wàkula mu myakulu mikwàbò; nènku, pyànò awu, mbòtà yà mibanga ayi mimònàngàne ànu ne kunyunga ne:

Ngàngàbukà munène udi pabwìpì mpindyewu,

Yesù mwabanyanganyi wa makènga,
 Ùdi wàkula ùkànkamika myoyi yidi
 micìbùlùke,
 Kakwèna dikwàbò Dìna to ànu dyà Yesù.

60 Kaa! Cidi. . . “Cidi dísù kadiyikù dimòne to, ne dici kadiyi ditèeleje to, cidi mu cibùcilu bwètù twètù.” Nudi bamanyè cìndi mèmè ngèèla meeji aci anyi? Bwà cinyi tudi bafwànyine—bwà cinyi tudi bafwànyine kwitaba mupinganyi anyi ànu cintu kampànda cyà diitabuuja dyà budìngìbudìngì, pàdì mau lu mùle tètè ne Bukolè bushùwashùwàlè, bulelèlè bwà Nzambi, bùdi mwà kusùulula musùukà, bùdi mwà kutwènzela cintu kampànda? Nzambi ànùbènèshè. Mpindyewu, kùdi bintu búngì cyanààna.

61 Kacya ncitu munwambile kwà nwènu kupetela mukànda ewu nànsha, nwamònu’s. Kashèètà kàà mikànda BP 325, ku Jeffersonville. Nènku bu wèwè mwà kufùnda, mòna’s, mbafwànyine kukutùminawù. Anyi, kàbìdi, kuya mu òmwè dyà ku masangisha, nebiikalè munkaci mwà kuyàbanya.

62 Mpindyewu, ndi ne kusàkidila kwàbúngì bwà cikondo cilenga cyà bwobùmwè eci. Nènku mu dindà emu mwà munkaci mwà kwela meeji ku kaabwalu-kalonda kakesè kàmvwà ne ciibidilu cyà kulonda mu Beena Kantu-ku-Byanza bàà beena Kilistò, bwà Zekààyi. Bààbúngì bàà kunùdi bàkaadi bangúmvwè nkàlonda, bwà mùvwà kalùmýànà kakesè aka kakàyi kiitabuuja dijingulula dyà meeji edi nànsha, dyà bwalu adi, dyà kùdi Mukalenge. Mu bushùwà bwà bwalu, ngèèla meeji ne, ànu mutùdi naaci mu cikondo ne cikondo cyònsò amu, nudi numòna dishùwashùwàlè, pashìishe nudi numòna ditentula ku búngì bwàdi. Nènku tudi ne cyà kwikala ne byònsò abi. Kàdi beedi bàà meeji bimpè bashindàme ne bantu bàà mu Mifundu bàdi bùmvwà, nwamònu’s. Bwalu, twètù, ne nànsha byòbi ne. . .

63 Cikondo cìvwà Màndamù Aimee Semple McPherson, cikondo cìvwàye pa buloba apa, mu mudimu wèndè wà bwambi, bàdi bàlonda ne pàmwè ne mukàji muyiishi yònsò ùvwà ùvwàla mapwapwa awu, bu, nudi bamanyè, anyi mùzàbi mùshindù awu, ne bàmbula Bible.

64 Tàngilàayi ànu búngì bwà baa Billy Graham bàdi mu buloba leelù ewu. Kàdi, nudi bamanyè’s, Billy Graham kàvwakù mwà kwangata kaaba kèèbè to. Mèmè ncìvwakù mwà kwangata kaaba kàà Billy to, yéyè kènà mwà kwangata kàanyi to. Mèmè ncyènà mwà kwangata kèèbè to, ne wèwè kwènà mwà kwangata kàanyi to. Wèwè udi muntu-nkààya, mu Nzambi. Nzambi ngudi mukwenze mùshindù wùdi awu, bwà kiipàcìlà kampànda. Bu twètù ànu mwà kujingulula kaaba kèètù, ne pashìishe kushàalapù. Twètù tuteeta kwenza cintu kampànda cishiilàngàne, díbà adi, nwamònu’s, tudi—tudi mu citùpà cyà

buloba cyà muntu mukwàbò, ne ciinè aci tudi tunyangakaja cimfwànyì cyà Nzambi.

⁶⁵ Tudi twangata bu mùdì Billy Graham mu cipaapu cyà cyena màngumba leelù ewu, ànu mùdiye amu, bu twètù mwà kucibìikila pàmwàpa ne munàyi wa ndundu wa makàsà, yêyè ùdì ne ndundu.

⁶⁶ Kàdì wêwè uteeta bwà kunyènga wa mwènù ndundu, udi ànu munkaci mwà kutèeka cimvundù mu cisumbù cyènù. Kùba wa mwènù, nwamònu's. Túngunukàayi ne kumukuba, jikàayi bakwàbò bònsò abu bwà yêyè wàmòna mwà koobesha. Nènku twètù bònsò netoobesha panyimà pa katanci, ne Yesù nealwe, ne bwalu bònsò nebùdikòse. Mukalenge ànùbènèshè.

⁶⁷ Mpindyewu nkàadi ngàakula bwà muntu ewu, Zekàayi. Nènku mwva nendè kuulu kwà mucì eku, nudi bamanyè's, ne mabèjì à mucì mamujìngile mubidi mujimà. Nènku pashiishe yêyè mumanè kutùuluka ku mucì, wàkaya kumbèlu ne Yesù. Kì mèmè kwamba ne: "Wàkalwa cidimba cyà dyàpà dyà Beena Kantu-ku-byanza bàà Èvànjeeliyò mu Kaabujimà." Pa nànkù kwòkò kwikàle Zekàayi kampànda mwaba ewu, mu dindà emu, ndi ntèkemena ne udi wangata mubelu mwimpè ewu ne ushàala cidimba cyà Beena Kantu-ku-byanza bàà Èvànjeeliyò mu Kaabujimà.

Wêwè udi wamba ne: "Èvànjeeliyò mu Kaabujimà anyi?" Èyowà's, mukalenge.

⁶⁸ Mwómò amu ki mu cintu cimwèpelè mùvwà Yesù mwà kwikala muyiishe, ciwva ne cyà kwikala Èvànjeeliyò mu kaabujimà. Ncyà bushùwà. Kì mmwómò anyi? Bushùwà, bwalu Yêyè nguvwa Èvànjeeliyò mu kaabujimà. Ncyà bushùwà. Kàvwa mwà kuDìvila Yêyè mwinè to.

⁶⁹ Mpindyewu ndi ne Mifundu mikesè mifunda kaaba aka, yà kaacyena-bwalu kakesè, kakesè kàà ciibidilu, ncingangàtè ànu ndambù wa tusunsa mukesè, bu nwènù mwà kuntwàlakù. Ne kumpàla kwà twètù kucyènga. . . Mpindyewu, mu bwobùmwè bwètù bukesè bwà kudisanga pàmwè ebu, ne kwakula bwà byanza byà ours, mu mbekeci, ne bikwàbò, mpindyewu tuteekàayi byònsò ebi ku luseke mpindyewu, ne kwela meeji ne tudi twenda tumanyangana. Nènku, nènku tudi baswè mpindyewu kubwela mu citùpà cyondòke cyà Dìyì.

⁷⁰ Twìnyikàayi mitù yètù mpindyewu, patùdì tuseemena Naadì pabwìpì apa. Bwalu, twètù katwèna ne bukenji bwà kuseemena pabwìpì ne Dìyì, katùyì baakùle ne MwenaDì, dyàmbedi nànsha.

⁷¹ Ne mitù yètù miinyika, mèsù ètù makànga, ne ndi mutwishìbwe ne myoyi yètù yìdì miinyika pàmwè ne mutù wètù. Ndi ndìkonka ne, pàndì mbàndisha mèsù àànyì ne ntàngila mu batèeleji apa, ní kùdikù muntu kampànda mwab'ewu udikù mwà kwamba, mu kwela kwà byanza byèndè muulu ne: "Mwanèètù, mwambi, wamvùlukakù mu disambila. Ndi—ndi mu lukèngelu

leelù ewu anyi”? Nzambi àkubènèshè. Nzambi àkubènèshè. Mpindyewu Yèyè ùdi ùmòna cyanza cyèbè. Yèyè mmumanyè cidi mwinshì mwà cyanza cyèbè, mu mwoyi wèbè. Yèyè ànyishè àcyènzèku, ki disambila dyànyì ndyòdi adi.

⁷² Nzambi munanga, bu mutùdi ne kusàkidila bwà nzùbu ewu mutùdi twètù, bânà Bèbè bapwekèle, mwà kudìsangisha pàmwè mu mwab’ewu, ne tuyukila ànu cyanààna ne kwikala ne bwobùmwè, ànu bwà twètù kwikala twètù biinè, patùdi tulamata kùdi Kilistò apa, ne tujinga bwà kutàmba kufwànangana Nendè bikolè menemene. Tudi bânà bà muntu bàdi bàkwàcila mudimu pàmwè batwàngane nkundù, Mukalenge, bantu bàdi ne bukolè bwábúngi bupite bwà kwimana mwab’ewu bwà kwamba Díyì edi kuntàmba ne mèmè, musadidi Webè udi kàyì mukùmbànyine, kàdi bujitu mbwèbù bungimikila. Nènku, Taatù, ndi ndòmba, leelù ewu, bwà ne bu mèmè mwà kwamba cintu kampànda civwà kacyì mwà kwikala ànu bilondèshìle diswa dyà Nzambi to, ne, kumpàla kwà mèmè kucyàmba, Wèwè wakànga mukana mwànyì; muWàkakànga mukana mwà ntambwe, ditùkù kampànda, bwà kayitácishi Danyèlè nànsha.

⁷³ Taatù, tudi tuKulòmba mpindyewu bwà kuvùluka muntu ne muntu yònsò, mwabì yònsò. Nènku ditàbuluja didi munkaci mwà kwenzeka munda mwà cimenga eci edi, Mukalenge, dipweka too ne ku ma Assemblées de Dieu, ndi ndòmba, Nzambi munanga, bwà Wèwè kutùmakù ditàbuluja bu edi kuntwaku bwà ne cimenga eci cijimà cyàvùnduludiibwa kùdi Bukolè bwà Nzambi, bwà nzùbu yònsò yà binwìnyì byà maalà ne bânà balalakanyi bàà mu misèèsù bààlujidiibwa ku Nkwasa wa butùmbi wa Nzambi, ne bújìlbwe tètè ne bwìmpè Bwèndè ne Nyumà Wendè. Enzàku nànku, Taatù wa mu Dyulu.

⁷⁴ Nènku tudi tulòmba cyòci aci leelù ewu, bwà ne kwòkò mulùme anyi mukàji, mwànà wa balùme anyi wa bakàji, uvwabò batwàle mu disangisha emu mu dindà emu, mwab’ewu mwinshì mwà ciikishilu ku nêjè, bwà Nyumà Mwìmpè munène awu wàsàmbakù mwoyi wàbò ne wàkula naabò, mu mùshindù wà nkèmenu. Pàmwàpa bakwàbò mbalalàkane, bàvwà musangu kampànda bakutwà Wèwè musinga, Mukalenge, kàdi mpindyewu banyèmè bayè; baalùjaku, Mukalenge, mu dindà emu.

⁷⁵ Nènku tudi tusambidila dyàpà edi, bwà Mwanèètù Earl ne bwà mukàjèndè, ne bwà bakwàbò abu. Enzàku nànku, Mukalenge.

⁷⁶ Mpindyewu tùcìbwìlaaku Dyàmpà dyà Mwoyi, patùdi tubuulula mabèjì à Díyì apa, bwalu tudi bamanyè ne Bible kî ngwa muntu ùmvwija mùdiye ùmvwa to. Kàdi, Nzambi kèna ùkèngela bwà twètù kuumvwija Díyì Dyèndè to, Yèyè m’Mudyumvwijidi wa Yèyè mwine. Yèyè wàkamba ditùkù

kampànda ne: “Kwikalè bukènkè,” ke bukènkè kwikalaku. Yéyè kwamba ne: “Mukàji virgò neimitè difù,” ne wàkiimita. “Ne mu matùkù à ndekeelu Mémè nêngiècikijè Nyumà Wanyì pa mubidi wònsò,” cìwà bàà pa buloba bàmba nànsha ciikàle cinyì, Yéyè wàkiècikija. Yéyè kèna dijinga ne mumvwiji to. Ùdi ùmvwija Méyì Èndè Yéyè mwine, ku diÀvwija ne mwoyi ne diÀshindika bwà kwikala Wù nànkù. Lwákù mu myoyi yètù, Mukalenge Yesù, ne ùtùmvwijè, leelù ewu, bintu bitùdi tukèngelà. Tudi tulòmba nùnkù mu Dìnà dyà Yesù. Amen.

⁷⁷ Mpindyewu mu Bible, bu nwènù mwà kubuulula. Ndi ngiitabuujà ne kacya ncìtu mwànji kupeta diyiiisha dìntù mutètè kutwàdija bwà kwakulapù, dìntù ncìyì mubale dyàmbedi Dìyì to. Bwalu, dìyì dyànyì nedipangilè, mémè ndi muntu. Kàdi Dìyì Dyèndè kadyèna ànu mwà kupangila to, Yéyè ùdi Nzambi. Pa nànkù túbuululàayi mpindyewu ànu bwà kaacyena-bwalu kakesè, nènku netùpàtukè ànu mu tusunsa ànu bu makumi àsàtù cyanààna, anyì makumi ànaayi, bu Mukalenge mwà kwanyisha.

⁷⁸ Mu Bwàkabuulwibwà mpindyewu, tudi baswè kubuulula mu nshapità mwi3 wa Bwàkabuulwibwà, kubangila ku mvensà wa 14. Nènku tudi baswè kubala ànu citùpà, m’Mukenji mutùmina Cikondo cyà Èkèleeziyà wa Laòdikiyà. Nènku ndi ngèèla meeji, ne ndi—ndi ncinka ne pabwîpi ne bantu bònsò bàdi bújiibwe ne Nyumà ne babadi bàà Bible bàdi biitabuujà, ne mbafwàne kwamba ne *amen* ku cyòci aci, bwà ne tudi mu Cikondo cyà Èkèleeziyà wa Laòdikiyà, bwalu aci ki cikondo cyà ndekeelu. Tèèlejàayi Mukenji wà ngiikàdìlù wa èkèleeziyà mu cikondo eci.

Ne fùndilà mwanjèlò wa èkèleeziyà wa . . . Laòdikiyà ne: Ebi bintu bàdi bàmba kùdi Amen, ntèmù wa lulamatu ne mulelèlè, cibangidilu cyà bufùki bwà Nzambi;

Ndi mumanyè byenzedi byèbè, . . . wèwè kwènà ku mashìka anyì ku luuya: Mémè mwa njinga bwà wèwè kwikala ku mashìka anyì ku luuya.

Nànkù bu mùdi cìvùmvù, ne kùyì ní nku mashìka anyì ku luuya, Mémè nènkontwìlè mukana mwànyì.

Bwalu wèwè udi wamba ne: Ndi mubanji, ne mubanjike mu bintu, ne ncìyì nkèngela cintu nànsha cimwè; kàdi kùyì mumanyè ne udi mukèngeledi, . . . mwena dikènga, . . . mupèlè, . . . mpofo, ne butakà:

Ndi nkubela bwà kusumba kùndi ngòlò muteeta mu . . . kapyà, bwà wèwè kwikala mubanji; ne cìwàlù citòòke, bwà wèwè kwikala mulwàte, ne bwà bwèbè bundu bwà butakà bwèbè kabùmwèneki to; ne kwela bwanga mu mèsù èbè, bwà wamòna mwà kumòna.

Bònsò bándi munange, ndi mbàtándisha ne mbanyooka: ki bwà cinyì ikàlaayi ne lukunukunu, ne nyingàlalaayi.

Mónaayi, ndi mwimàne ku ciibi, ne nkookola: muntu yèyè mutèèlèje dîyi dyanyi, ne mukàngiule ciibi, nembwelè kùdîye, ne ndye nendè dilòlò adi, ne yèyè neàdye naanyi.

Kùdi ewu wacimuna nengenzè bwà kusòmbaye naanyi mu nkwasà wanyi wa butùmbi, ànu bu mungààkacimuna pàanyi, ne mémè kusòmba ne Taatù wanyi mu nkwasà wendè wa butùmbi.

Ewu udi ne maci, ùmwè cidi Nyumà wàmbila maèkèleeziyà.

⁷⁹ Mukalenge àbèneshè kubala kwà Dîyi edi. Mpindyewu ndi muswè kwangata, bwà katanci kakesè cyanààna, kaacyena-bwalu kakesè, kàbiikidiibwa ne: *Biibi Mu Ciibi. Biibi Mu Ciibi.* Mpindyewu eci cidi. . . *Biibi Mu Ciibi*, mmèyi àsàtù. *Biibi Mu Ciibi.*

⁸⁰ Udi mufwànyine kungambila ne: “Mwanèètù, pàmwàpa kùdi bantu lukàmà kaaba aka. Nàнку, kwènà welaku meeji ne nkaacyena-bwalu kakesè, paùdi kumpàla kwèbè ne misùukà lukàmà anyi?”

⁸¹ Èè, aci, aci ncifwànyine kwikala cilelèlè, kaa—kaacyena-bwalu nkakesè. Kàdi kî mbunène bwà cyena-bwalu, bùdi—bùdi ne mushinga to, ncidìci. Ncidì—ncidì cyena-bwalu cyàmba, ke cidi ne mushinga.

⁸² Byènze bu, ngèèla meeji ne mùvwà mmu Louisville, mu Kentucky, kùkaadi ndambù wa matùkù, mwànà—mwànà mukesè wa nsongàlùmè ùvwa kuulu mu diyebà, mwikale ùsalakajangana ne bishèètàshèètà byà kale kuulu kucisàsà aku, e kulwayè kufika pa kaatimbre kàà ku poste kàà cikùlùkulù. Èè, cintu cyà kumpàla mu meeji endè, ùvwa mufwànyine kupeta nyònga wa crème ku kaatimbre aku. Kùvwa musùmbi wa bintu byà kale kwinshi kwà mùsèèsù aku, ke kuvùkutayè lubilu too ne mu mùsèèsù, ne mwenda mwònsò. Ke kwambayè ne: “Ciwàmpà ncinyi bwà timbre ewu?”

⁸³ Musùmbi wa bintu byà kale e kukàtàngilayè, ne kwòkò kiinè kàvwa kamwèka bu katòòkòlòke. Kwambayè ne: “Nenkupèèshè ndola umwe.”

⁸⁴ Ekèlèkèle, aku’s kààkasùmbishiibwa bipeepèle. Yèyè’s ùvwa mwà kwikala mukàfile ku dikùtà òmwè dyà cicyelè, ne pashiishe kusànka bwà ciinè aci, bwà kupeta nyònga wa crème, kàdi kààkasùmbishiibwa ku ndola umwe. Musùmbi wa bintu byà kale awu wàkakàsùmbisha ku ndola nkàmà yitàanu. Ne paanyimà, ncyènà mumanyè ne kààkaya penyì to, kààkafika ku nkàmà yà ndola. Nudi numòna’s, kapesè kakesè kàà kabèji kakàvwa kàà mushinga wàbùngì to, ànu kabèji kèètù kakesè aka kàà kùyiku mufwànyine kwangula panshì to. Kàdi, kî ndibèji òvwà ne mushinga to, ncidi pa dibèji, ke cidi ne mushinga.

⁸⁵ Nènku mùshindù awu ngùdìbi mu kubala kwà Dìyì dyà Nzambì. Kacyèna ànu dibèji pàtupù to, musinga wà dibèji, anyi bunène bwà dibèji to, kàdi ncìdì cìfùnda pa dibèji adi aci. Ne dīyì òm̀wèpèlè ndikùmbàne bwà kusùngila buloba, bu dyòdì mwà kwangaciibwa mùshindù awu.

⁸⁶ Cikondo kampànda cyàcya kùvwa . . . Mvwa mbala bwalu-bulonda bwà matùkù à wetù wa musinga mukolè . . . Umwe wa ku Bamfùmù bèètù bàà ditùnga bàà batambe bunène bàtù ditùnga dyètù dipete ngèèla meeji ùvwa—ùvwa n’Lincoln. Kì ne mbwalu mmufùmìne ku Kentucky to, kàdi bwalu ùvwa muntu munène. Kàvwa mulonge kàlaasà kààbùngì to, kàdi nànsha nànkù ùvwa—ùvwa ne cintu kampànda mu mwoyi wèndè, kiipàcìlà kampànda.

⁸⁷ Mémè—mémè ndi muswè muntu udi ne lùmònù. Ndi muswè bantu bàdi ne cintu kampànda cidìbo bàlwangeena, kabàyi ànu bènda bàjèmbelèla ànu ne: “Èè, cyònsò cyàlwà aci necìikalè ànu cìmpè.” Kaa, ikalà mwimàna kuulu ne ku mudimu! Kàdi Lincoln kacya kàtu mulekèle dilonga dyèndè dimucyàmakana mu njila nànsha; yèyè ùvwa ne cintu kampànda cyà kwenza. Ndi ngèèla meeji ne mwena Kilistò yònsò ùvwa ne cyà kwikala mùshindù awu, jingùlulà kèèbè kiipàcìlà ne ùyè ùkakènzè.

⁸⁸ Cidimba cyònsò cyà dyàpà edi, kabiyi ànu ne: “Èè, tutu ne didya dyà mu dindà musangu ùmwè ku ngondo to,” kì ngaci to, “anyì musangu ùmwè mu disambòmbò dyònsò to.” Ikàlà ne kiipàcìlà mu lwendu lwèbè, cintu kampànda ciwènzà. Tùcyènzàayi. Nzambì mmukutèèke kaaba aka; enzà cintu kampànda bwà bwalu abu, cidimba cyònsò cyà èkèleeziyà yònsò. Kùdi ditàbuluja mu cimenga. Ditàbuluja adi didikù bwà kiipàcìlà kampànda. Tùpatulàayimù cintu kampànda. Twènzàayikù cintu kampànda bwà bwalu bwàdi.

⁸⁹ Mukalenge Lincoln. Kùvwa muntu uvwa . . . nsongàalùmè, ùvwa—ùvwa mu mvità, ne—ne yèyè ùvwa—ùvwa mutulùmùke, twamb’eku twamb’eku. Kàdi mu dibà dyà mudimu, yèyè—yèyè—yèyè kunyeema kaaba kèndè kàà mudimu; nènku kusanganabò cintu kampànda cyà kumubanda naaci, ne bàvwa ne cyà kumwasa māsashì. Nènku, kaa, yèyè . . . cìvwa bwalu kashondo. kàdi nsongàalùmè kampànda ùvwa mutàmbe kumunanga bikolè, e kuyayè kùdi Mukalenge Lincoln, bwà kumupetelakù difwidiibwa dyà luse. Yèyè ùvwa Mfùmù wa ditùnga mu cikondo aci, mu Ètats-Unis emu, ki kuyayè kùdiye bwà difwidiibwa dyà luse.

⁹⁰ Ki kumwambilayè ne, pàkaavwàye ùpàtuka mu màshinyi èndè; nènku Mukalenge Lincoln, muntu mule, wa myedi, wèbè wà cyena ku sud awu’s, kanyìkanyì wa mùncyoncyo. Ki yèyè kwamba ne: “Mukalenge Lincoln, kùdi mwànà wa balùme wìkala mwà kufwà, mu matùkù àbìdì kuumukila ku mpindyewu, wàsabò ku cingoma, bwalu ùvwa munyèmè mu cikondo cyà

mvità.” Ki yèyè kwamba ne: “Mukalenge Lincoln, nsongààlùmè awu kî nsongààlùmè mubi to. Kàdi bingoma byònsò bivwà bitùka mudilu abi, ne—ne bantu bàvwà munkaci mwà kufwà abu, mijilu yà mutù yivwa mimùtândàbàle. Nènku wàkasaluka bikolè be, mu mùshindù wà ne, wàkeela byanza byèndè muulu ne kutwàdijayè kudila mwadi wà cibòbò.” E kulwayè lùbilu, wàmba ne: “Ndi mumanyè nsongààlùmè awu.” Yèyè kwamba ne: “Mukalenge Lincoln, ànu dîna dyèbè pa kapesè kàà dibèji aka dîdi mwà kumupàndula ku lufù. Udikù mwà kucyèna anyi?”

⁹¹ Mu bushùwà bwà bwalu, mulùme wa dipòkò mwena Kìlistò ewu, ne lùkàsà lwònsò e kutwàye cyàlà pa dibèji ne: “*Kampànda* mmufwidìbwe luse.” Wàkafùnda dîna dyèndè ne: “Abraham Lincoln, Mfùmù wa ditùnga dyà États-Unis.”

⁹² Mùsànjeelà è kwalukila lùbilu lwà mukùsu muyè paanyimà. Ki kuyayè lubilu ku bùlokò aku, kwambayè ne: “Udi mudishikàmìne! Udi mudishikàmìne! Ki Mukalenge Lincoln nyèyè ewu, cyàlà cyà Mukalenge Lincoln’s. Udi mudishikàmìne!”

⁹³ Kwambayè ne: “Bwà cinyi udi mulwè kunseka, pèèbè mumanyè ne ndi mfwa màalaba?” Kwambayè ne: “Nkàtùkìlè mwab’ewu, udi ànu munkaci mwà kunseka’s.” Nènku kààkaswa bwà kucyàkidila to. Yèyè ne: “To, ncyèna—ncyèna muswe aci to.” Yèyè ne: “Wèwè udi ànu wenza . . .” Kwambayè ne: “Bu aci cìkàla cyà Mfùmù wa ditùnga,” mwàkambayè, “cìvwa mwà kwikala ne—bimanyinu byà ditùnga, ne cìvwa ne cyà kwikala ne dibèji dyèndè yèyè dyà difùndila adi.”

Yèyè ne: “Kàdi’s ncyàlà cyèndè!”

⁹⁴ Yèyè ne: “Mmunyi mungààmányà ne ncyàlà cyèndè?” Yèyè ne: “Wèwè udi ànu ùnseka cyanààna, udi uteeta bwà kunsànguluja.” E kukùtulayè mwadi, kumukoma nyimà. Nsongààlùmè awu wàkaashiibwa cingoma pàcìlìlábò mu dindà.

⁹⁵ Pashìishe paanyimà pàà nsongààlùmè awu mumanè kufwà, ne dîna dyà Mfùmù wa ditùnga pa kapesa kàà dibèji aku, bwà ne ùvwa mufwidìbwe luse, dîbà adi mbwalu kaayi abu’s? Ke kuyabò ne cilumbu aci ku tubàdi tukùlumpè. Nènku ke dipàngadika dyà tubàdi twètù tukùlumpè edi, dyòdi edi ke nkàmisha bwà tubàdi twètù twònsò. Dìtùbò bàmba mîngà misangu ne, twètù katwèna baswè dipàngadika dyàbò adi to, kàdi bidi bikèngela bwà twètù kudìneemeka nànsha bìshi, nwamònu’s, bwalu aci kî dikunji dyà ciswikidi. Ki nkàmisha nyèyè awu. Mpindyewu, dipàngadika edi divwa dyàmba ne: “Luse kî nduse to pàdìlu kalùyì lwakidila bu luse nànsha.”

⁹⁶ Nènku mùshindù awu ke wùdi Dìyi dyà Nzambì. Dìdi luse ànu pàdìDi dyakidila bu luse. Ne Cìdi Dìyi dyà Nzambì, Cìdi bukolé bwà Nzambì, bwà aba bààDìitabuuja ne bààDìitàba.

⁹⁷ Nànsha bàmba ne, wèwè udi muDìtàngìle, ne wamba ne: “Kaa, divwa dikòndakaja, kùdi nkùdimwinu mùlìyò mujimà, ne byònsò abi.” Dìdi mwà kwikala cyòci aci kùdi muntu kampànda.

⁹⁸ Kàdi, bwànyì mèmè, Cìcìdì ànu Dìyì dyà Nzambì ne: “Yesù Kilistò umweumwe awu makèèlèlè, leelù, too ne kashidi.” Yèyè mmuswikìibwe bwà kushààla ne Dìyì adi.

⁹⁹ Mpindyewu bikèngela bwà Yèyè àlumbulwishè èkèleeziyà, dīngà ditùkù. Kàdi Yèyè mumulumbùlwishile ku èkèleeziyà wa Kàtòlikè, mùdìbo bàmba ne ke mwènzàYe, dībà adi Neàmulumbulwishile ku èkèleeziyà Kàtòlikè kaayi? Yòyi nyàyi mishiilàngàne ewu ne mukwàbò. Bu Yèyè mwà kumulumbulwishila ku wa ba-Méthodistes, nwènù ba-Baptistes nudi babùtùke. Yèyè mumulumbùlwishile ku wa beena Mpenta, nwènù bònso bàdì bashààle bwènù’s mbùtùke.

¹⁰⁰ Kàdi kààkumulumbulwishila ku èkèleeziyà to. Bible mmwàmbè ne: “Yèyè neàlumbulwishilè bàà pa buloba ku Yesù Kilistò, pèndè Kilistò ùdi Dìyì.” Pa nànkù’s nudi numòna ne katwèna ne pàà kufinukila to, N’Dìyì dyà Nzambì, didìYe ùtùlumbulwisha naadi; nènku nànsha bàmba ne ndikesè bishi, dyumvwija dyà dīyì òmwè ku Dyòdì edi, mmùdì Bwàkabuulwibwà 22.18 mmwàmbè.

¹⁰¹ Dyàmbedi, nēmbangile mu Genèsè. Nzambì wàkapa bukwàbantu Dìyì Dyèndè, bwà kubèèlela lumbu ku lufù, mpèkaatù, ne tunynganyinga, anyì njìwù. Mùnyòlòlò, wà Méyì Èndè. “Kanùlengi mucì kampànda ewu to, bwalu, ditùkù òinwàdyàku, dyòdì ditùkù adi ke òinwàfwà.” Nènku mùnyòlòlò ùdi ùtàmba kulengeleela ànu pa òinungu dyàwù didì ditàmba kuteketa. Ne misùùkà yètù yìdì yìpulumunyiibwa pamutù pàà òfernò, mikwàte ku mùnyòlòlò ewu; kukòsa ànu òmwè dyà ku wòwù ke cyònsò cyùdì ne cyà kwenza. Evà kààkanyangakaja cyambilu kampànda to, wàkanyangakaja Dìyì òmwè, ku Sàtaanà. Aku’s kùvwà nku mbangilu kwà Mukàndà.

¹⁰² Munkacì mwà Mukàndà Yesù wàkalwa, ne kwamba ne: “Muntu kààkwikala ne mwoyi ànu ku dyàmpà nkààyadi to, kàdi ku Dìyì dyònsò.” Kaciyi citùpà cyàdì to, ànu òmwè apa ne pààpa, kàdi: “Dìyì dyònsò didì dipàtukà mukana mwà Nzambì.”

¹⁰³ PààkafwàYe, kubiika ku lufù, ne kubwela mu Dyulu, ne kwalukila ne kupèsha Yone...cyàkambàYe kuntwaku paanyimà pàà dibìikà Dyèndè dyà ku lufù. Yèyè ne: “Kàdi bu...” Yèyè ne: “Cùikalà mwà kwenzekela muntu ewu ncinyi?”

¹⁰⁴ Yesù wàkamba ne: “Mbwalu bwèbè anyì yèyè mushààle too ne muNgààlwà?” Kàyì mumanyè menemene cùikalà mwoyi wèndè to, kàdi mudimu wèndè wà bwambi ùvwà mwà kutùngunuka. Ne Yèyè wàkamubàndisha, mu nshapità mwi4 wa Bwàkabuulwibwà, ne kumuleeja maalu ònsò àvwà ne cyà kulwa awu, bwà twètù kusòmbelamù, nànsha mene too ne ku cyenabwalu eci leelù ewu.

¹⁰⁵ Ne pashiishe mu nshapità wa 22, nshapità wa ndekeelu, mvensà wa 18, Wàkamba ne: “Ewu yònsò wàdìdinga kuumushila Dìyì òmwè mu Mukàndà ewu, anyì kusàkidilaKu dīyì òmwè,

citùpà cyèndè necyùmushiibwe ku Mukàndà wà Mwoyi.” Nwamònu anyi? Pa nànkú tudi twitabuuja ne muntu ùdi ne mwoyi ku Díyì dyònsò dyà Nzambì. Ndi ncìitabuuja ne ndi mumanyè ne ncilelèlè. Nànsha katùpa kakesè, kí mbwalu to. Cìdi ànu cikèngela díyì òmwè cyanaàna, bwà kucyènta.

¹⁰⁶ Pa kwela meeji bwà cìdi cikesè ne kacìyi ne mushinga, ne pa kumòna ne bààbùngì bàà ku balundà bàànyi bàà ku Canada mbasòmbe kaaba aka. Ndi mvùluka ne mvwa mu Canada pàvwà Mfùmù George. . . Mwinè ùmvwà mupeté dyèsè dyà kuya kamusambidila awu, díbà dyàkondopiibwàye, ne disaamà dyà dipapakana dyà dikòbà dyàbùngì; ùvwa ùsaama ditukù adi, disaamà dyà dipapakana dyà dikòbà, ne kàbìdi ùvwa ne disaamà dyà cifù, cyùjà cyà mu cifù; ànu munùdì nwènù beena mu Canada bààbùngì bamanyè, ne beena Àmèrikè, kabìdi. Kàdi pa kumumòna ùpicila kuntu kwàka, musòmbe mu màshinyì awu, yèyè—yèyè ùvwa mfùmù. Ùvwa ùditwàla yèyè mwìnè bu mfùmù. Mukalenge mukàji wendè mulengèle awu musòmbe ku luseke lwèndè, muvwàle nkanzu wendè wa bleu, nènku mpàvwàye wènda ùpweka ne mìsèèsù apu.

¹⁰⁷ Ne mulundà wànyi kampànda, ne mèmè, tuvwa biimàne pàmwè. Nènku pààkapita màshinyì awu, e kukùdimukayè kukùtula mwadi. Mèmè kumutenteka cyanza cyànyi pa dikaaya, ki mèmè kwamba ne: “Mbwalu kaayi ebu?”

¹⁰⁸ Yèyè ne: “Mwanèètù Branham, ke mfùmù wanyi ne mukalenge-mukàji wendè bàyaaya abu.” Èè, ndi—ndi mufwànyine kwanyisha aci.

¹⁰⁹ Ki mèmè kudyàmbidila ne: “Pìikalà mwena Canada, ku bukòòkeshi bwà bukalenge bwà ditùnga, kí mmukòòkeshi wa bukalenge to, kàdi mucìikàle kàbìdi mukòòkeshi wa bukalenge, bwà Angleterre, ne ku dipita dyà mfùmù, bifwànyine kufikisha mwena Canada ku didila mwadi, ne kukùdimuka ne kwasa mwadi, nebìikale bìshi patwàmòna wetù Mfùmù?” Ne pa kutùma meeji kwòkù aku, citwìkalè twètù mMukalenge mukàji.

¹¹⁰ Díbà adi bânà bònsò bàvwa bapàtùdiibwe mu bilongelu, bânà bakesè, bàvwa babàpèeshe kaadibèndelà, kakesè kàa cyena Grande Brétagne. Dibèndelà dyà cyena Canada dìdi dibìikidiibwa mùshindù mukwàbò. Mwanèètù Fred, dibèndelà dyà cyena Canada dìdi dibìikidiibwa bìshi? [Mwanèètù Fred Sothmann ùdi wàmba ne: “Union Jack.”—Muf.] Union Jack. Kàdi bàvwa babàpèeshe kaadibèndelà kakesè, kàa cyena Grande Brétagne, kàa kunyùkusha. Nènku pààkapitá mfùmù mwaba awu, bânà batekète bònsò abu kujuukilabò kuulu, bànyùkusha tuumàbèndelà twàbò—twàbò tukesè, beela mfùmù mbilá mikolè. Ne—ne kùvwa misùmbà munkacì mwà kwimba ne, *Nzambì Lamà Mfùmù*, pàvwàye wènda ùpita mu mùsèèsù apu.

¹¹¹ Kaa, bu nwènù ànu mwà kupetakù. . . Nuvwa bafwànyine kupeta mmwènekèlu wa cìikalàku ku dibìikà dyà ku lufù adi!

112 Nènku mpàvwàbò babàmanyishe, bânà batekète abu, bwà kwalukila mu cilongelu dyàkàmwè pàvwà ngendu ayi—ayi yijika. Nènku, bânà bakesè abu mu dyalukila dyàbò, cilongelu cimwèpele kujimijaci kânà kàà bakàji katekète. Ki kuyabò myaba yònsò, bwà kupeta kakwàcikwètù aku, bàbànda bàpwèka ne mìsèèsù. Nènku, dyàkààleelù edi, kusanganabò paanyimà pàà dikunji dyà nshinga yà tèlefonè, kânà kàà bakàji kakesè, kanci, kanyikanyi, kîpi, kàdila ànu ne mwoyi wàkò mujimà.

113 Èè, mulongeshi awu kumwambulayè ne... [Katùpà kàà mukàbà wa mēyi munda mutupù—Muf.] “Mbwalu kaayi ebu? Kwènàku mumòne mfùmù anyi?”

Yèyè ne: “Èyowà, mèmè ndi mumòne mfùmù awu.”

Yèyè ne: “Kwènà—kwènà munyùkùshe kaadibèndelà kèèbè anyi?”

Yèyè ne: “Èyowà’s, ndi—ndi munyùkùshe kaadibèndelà kàànyì.”

Yèyè ne: “Èè, díbà adi, udi udila bwà cinyi?”

114 Kwambaye ne: “Udi mumòne’s, mulongeshi, mèmè ndi mutàmbe bwîpi, bakwàbò bàvwa biimàne kumpàla kwànyì, bàvwa batàmbe bule. Nènku ndi munyùkùshe dibèndelà dyànyì, kàdi yèyè kí mmudimòne to.” Nènku ùvwa mutàcishìibwe kùdi cyòci aci. Èè, aci’s ncifwànyìne kwikala ne Mfùmù George awu kàvwa mumòne kakwàcikwètù kîpi aku to, bwà bwîpi. Kàvwa mufwànyìne kwikala mumòne mwoyi wèndè wà bwena ditunga to, ne mwàkadyùmvwàye bwà bwalu bwèndè. Yèyè mwànà wa bakàji awu ùvwa mutàmbe bwîpi.

115 Kàdi kabyèna nàнку ne wetù Mfùmù to! Kaa, kantu katàmbe kushààdila ku bukesè katwènzènzà, Yèyè mmukàmòne. Kàbidì Yèyè mmumanyè bintu ne meeji mene bidì mu myoyi yètù, cyònsò citwènzènzà, nànsha cyòci cikesè bìshi. Ne mmunyi mutùdì tuMukwàcila mudimu? Mpatùdì tukwàcilangana mudimu muntu ne mukwèndè apa. Mèmè nciyi munùnangè to, mmunyi mündi mwà kuMunanga Yèyè? Nwamònu anyi? “Cyònsò cinùkeenzèdì bânà Bàànyì bakesè aba, Mèmè ngunùdi bacyzènzèle.” Nwamònu anyi?

116 Ntuntu—ntuntu tukesè tutùdì tushiya katùyì twenza atu, míngà misangu, tùdì tükòsolola mùnyòlolò wònsò, nudi numòna’s, ne tudilekelela tuya badiikàdile, ànu ku meeji à cyena-dingumba, ne tupwà mwoyi bwà tuntu tukesè etu tùdì twikàle bulelèlè menemene tuntu twà—twà mushinga mukolè. Byònsò, Dìyi dyònsò dyà Nzambi, didi ne mushinga munène. Nànsha Dimwè dyà ku Dyòdì kadyèna mwà kutèekiibwa ku luseke to. Butùdì naabù mbwà kwangata Dìyi dyònsò dyà ku Dyòdì, ànu mùshindù ùvwàDi difùndìibwe awu.

117 “Ndi mwimàne ku ciibi,” mwàkambà Yesù, mu Cikondo cyà Laòdikiyà eci, “ne nkookola.” Nuvwakù bamòne, cikondo

cimwèpelè cyà èkèleeziyà cìvwàYe mupàtula pambèlù pàà èkèleeziyà Wendè anyi? Bikondo bikwàbò byònsò byà èkèleeziyà, Yèyè ùvwa munda mwà èkèleeziyà. Mu bikondo byà ba-Méthodistes, ne ba-Luthériens, ne bakwàbò, Yèyè ùvwa munda amu, èkèleeziyà. Kàdi apa Ùdi pambèlù, twitabaàayi yètù ne bikwàbò mbiMwipàte mu èkèleeziyà. Kàdi Yèyè mmwimàne pambèlù apu, mucikàle ànu ùkòòkola ne: “Ewu watèeleja ne wakàngula ciibi, Nèmbwelè nendè, nendye nendè dilòòlò, ne kumupèèsha lwondapu bwà mèsù èndè, ne—ne bilàmbà, ne kumupèèsha mabanji à mu Dyulu; ewu wantèeleja Mémè nkookola awu.”

118 Mémè kwela meeji ne mvwa mwà kuvùlukakù dìnà dyà muzodi wakazola cimfwànyì aci awu, wàkazòla cimfwànyì's wè, cyà ciibi aci. Dìbà divwàye. . . Nudi bamanyè, fòtò minène yònsò eyi yidi ne cyà kupicila mu mulongo, anyì, cibambalu cyà didyùdiibwa, kumpàla kwà kulembelejiibwaci mu Cibambalu cyà Luumù. Dizòla dyà ku muji mpindyewu ndifwànyine kuyiila miliyò yà ndola.

119 Kàdi, nwamònu's, mbyenzè ànu bu mùdi Èkèleeziyà, ùdi ne cyà kupicila mu cibambalu cyà didyùdiibwa. Tudi tupicilamu. Newikalè mwà kubiikidiibwa ne “munsantu mubùnguluki wa mu malaba,” newikalè mwà kubiikidiibwa bintu byònsò. Kàdi bu wèwè ànu mwà kulama kaaba kèèbè mu Kilistò, dìbà adi dīngà ditùkù Yèyè neàye neetù mu Cibambalu cyà Luumù. Kàdi dyàmbedi tudi ne cyà kwitaba didyùdiibwa. Awu ke mwaba ùdi bukesè bwètù bùsanganyiibwa, ki mwaba ùdibo bùmwenekela. “Ewu udi kàyì mwà kutwàla dinyooka mmwànà wa mu masandi, ne kí mmwànà wa Nzambì to.” Nànsha yèyè mukashàale misangu búngì munyì wa mu èkèleeziyà, ne cyònsò cidiye mwenze aci, ùcidi ànu nànkù, yèyè kàyì mwà kwitaba dinyooka, mmwànà wa mu masandi, ne kí mmwànà mulelèlè wa Nzambì to. Kàdi mwànà wa Nzambì mulelèlè, mushùwashùwàlè kènà ùcyùka cidi bàà pa buloba bàmba to, bintu bikwàbò byònsò mmutooyi wà paanyimà pàà màshinyì. Ùdi ne meeji èndè pa Kilistò, ne aci ncikòse bwalu. Èyowà. Cyònsò cidi Kilistò wàmba ne enza aci, yèyè neàcyènzè. Mwaba wònsò wùdi Mwànà wa mùkòòkò ùya awu, ùdi Nendè, kwònsò aku. Ne pashiishe nudi numòna dimwènaka Dyèndè, Bwikadi Bwèndè, ne cidiYe wènza aci. Yèyè utu misangu yònsò ànu ne bantu Bèndè, Mukàj'Èndè-musèla. Yèyè udi wòsha nendè muyiiki. Dīngà ditùkù nekwikalè Didya dyà Dibanji.

120 Nènkù muzòdi ewu, byòbì mene, pàakayàdi kùdi badyùdi, musùmbà wà badyùdi kukùngwilabù muzòdi ewu. Ncyèna mwà kuvùluka dìnà dyèndè to. Ndi munkaci mwà kwela meeji kùdi Michelange, kàdi yèyè ùvwa musongi wa lupìngù lwà Mòsà. Kàdi ncyèna mwà kuvùluka dìnà dyèndè to. Kàdi, nànsha nànkù, yèyè wàkamba ne: “Cimfwànyì cyèbè ncyà pabwàci,” yèyè ne: “Ncyèna ne cyà kudyùla naaci fòtò awu to.” Yèyè ne: “Bwalu,

Yèyè mmukwàtè mwéndù mu cyanza Cyèndè, cidi cileeja ne Ùdi ùlwa, kàbìdì, mu mídimà yà butùkù menemene.” E kwamba ne: “Nènku pashùshe nYèyè ewu ku ciibi, ne mutù Wèndè, dicì Dyènè, bwà ne Yèyè kàlu. . . bwà kwikala mutwìshìibwe ne kààkupangila kuumvwa dibìikila nànsha dyà ditekète bìshi. Ùdi ne dicì Dyèndè ditùma ku ciibi, ne Ùdi munkaci mwà kukookola ku ciibi.” Yèyè ne: “Kàdi, udi mumanyè’s, mukalenge, kùdi cintu cìmwèpelè cyùdì mupwè mwoyi mu cimfwànyì cyèbè aci.”

¹²¹ Nènku muzòdi, bìvwa bimwangàtè matùkù èndè wònsò à mwoyi bwà kucizòlayè, e kwambayè ne: “Ciinè cìndì mupwè mwoyi aci ncinyì, mukalenge?”

¹²² Yèyè ne: “Nànsha Yèyè mukookòle misangu bùngì kaayi, nwamònu’s, udi mupwè mwoyi cikwàcidi cyàcì. Kakwèna cikwàcidi ku ciibi nànsha.” Wèwè mwà kutàngila ciibi, kakwèna cikwàcidi to.

¹²³ “Kaa,” mwàkambà muzòdi awu, “Ndi mucizòle mùshindù awu. Udi umòna’s, mukalenge,” mwàkambaye, “cikwàcidi cidi munda. Wèwè ke udi ukàngula ciibi. Wèwè ngudi ukàngula ciibi.”

¹²⁴ Kaa, muntu ùdi ùkòòkola ku ciibi cyà muntu bwà cinyì? Ùdi ùteeta bwà kupeta dibwela. Ùdi ùteeta bwà kubwela. Ùdi pàmwàpa ne cintu kampànda cidìye muswè kukwambila anyì kuyiikila neebè. Ùdi ne mukenji bwèbè wèwè. Nènku ki citù bantu bàkookolwelangana ku ciibi cyà mukwèndè. Bàdi ne kabingilà kampànda mu kucyènta. Aci kacyèna mwà kwenzeka kakùyì kabingilà kampànda to. Kwèna mwà kuya ku nzùbu kwà muntu kampànda kwòkù kakùyì kabingilà kampànda bwà kuyakù; kwòkò kakùyì bwalu bukwàbò to, mbwà kumukùmbula, kumutwàdila mukenji kampànda, anyì cintu kampànda. Kùdi kabingilà kampànda bwà muntu kuyayè kakookola ku ciibi cyà muntu mukwàbò.

¹²⁵ Mwaba kanà wònsò ùdì lukonko, kùdi ne cyà kwikala dyandamuna. Kakwèna mwà kwikala lukonko kakùyì dyandamuna to. Pa nànkù ki citùdì tukèba mu Bible, nkonko yà ditùkù edi eyi, Bible ngudi ne dyandamuna. Ne Kilistò ke Dyandamuna adi.

¹²⁶ Mpindyewu, bantu bààbùngì bàà mushinga mukolè bààkakookola ku biibi, mu bule bwà cikondo cyà mwoyi, ne bààbùngì bààkakookola mu bikondo bishààle; ne pàmwàpa, bikondo byòbì bitùngùnùka, nekwikalè bakwàbò bààbùngì, bantu bàà mushinga mukolè.

¹²⁷ Mpindyewu, cintu cyà kumpàla, pàmwàpa, bu muntu kampànda mwà kukookola ku ciibi cyèbè, bu wèwè ne mùshindù, uvwa mufwànyine kudifinda ne kupenga ridò, kumòna ne nganyì udi mwaba awu.

128 Wêwè mwikàle ne mudimu, mutùdi twamba ne ke mutùdi leelù ewu ne: “Ne mudimu wàbùngi menemene katùyì mwà kuya mu èkèleeziyà to; ne mudimu wàbùngi menemene katùyì mwà kwenza *cikampànda* to. Nènku, nudi bamanyè’s, èkèleeziyà wanyì kàtu witabuujà bintàkanyì byà mùshindù awu abi to.” Nènku, nwamònu’s, tudi ànu ndambù pambèlu pà bulongame, mîngà misangu, tuumuka ku Dîyì.

129 Kàdi udi upenga ridô, díbà adi udi ujinga kumòna udi mwimàne mwaba awu awu. Kàdi yêyè mwikàle muntu wa mushinga mukolè, ne lùkàsà lwònsò udi unyemena ku ciibi.

130 Mpindyewu twǎnjàayibi kupinga cyànyimà kakesè, ne kwangata bantu bakesè bàvwà bakookòle. Twàlukilàayibi tǔng ne twélèku meeji bwà Pàlò mu Èjiiipitù, kùkaadi nkàmà yà bidimu. Ambabi tǔng bu—bu Pàlò, mfùmù wa Èjiiipitù awu, mulwè ku nzùbu kwà cidimà? Ne mwinè cidimà ewu ùvwa mwenzè bu kàvwa ùpetangana ne Pàlò, ne kàyì mwitàbùùje cidìidì cyèndè, ne mupangilàngane nendè. Nènku—nènku, kàdi ki Pàlò ewu pwàà, mwimàne ku ciibi cyà mu—mutuuci wa màdyòtù anyì musopi wa bitoci, mutùdi mwà kubàbìkila, mu Èjiiipitù mwàmwa. Dyà ùpenga ridô anyì, ki Pàlò wa bukolè ewu mwimàne ku ciibi. Ne yêyè munkaci mwà kukookola; ne mimwemwe kwisù. [Mwanèètù Branham ùdi ùtuuta bintu pa cintu kampànda—Muf.] Mòna’s, cidimà awu ùvwa mufwànyine kukàngula ciibi, kwamba ne: “Bwelààku, Pàlò munène, swàkù bwà musadidi webè mupwekèle àpetè ngàsà ku mèsù kwèbè. Kwòkò ní ncinyi ní ncinyi mu bimanu byànyì, mèmè’s ndi ànu mupika webè, Pàlò. Wêwè udi mummòne mikòlò bunène kumutù kwà bàna bèètù. Udi mulwè ku nzùbu kwànyì, mèmè ewu mupèlè bu mündi emu. Wêwè’s usòmbèle ukùmbula ànu bamfùmù ne—ne bantu babanji, ne bantu bàà mushinga mukolè. Kàdi mèmè ncyèna wa mushinga to. Kàdi wêwè—wêwè unkùmbula mèmè ewu, udi mummòne mikòlò bunène, Pàlò wa yààyà. Ngaambilàku tǔng cidì musadidi wèbè mupwekèle ewu mwà kwenza?” Cyònsò cidì Pàlò mwà kulòmba aci, nànsha too ne mwoyi wèndè mwinè, yêyè ùdi mwà kuwùfila. Ncyà bushùwà. Cintu’s mbunèmè.

131 Anyì, twámbebèbi cileejilu ne, Hitler Adolf utùdi tutèèla ib’ewu ewu, pàvwaye mukòokeshi wa Allemagne. Ambàyibi tǔng bu yêyè mwà kwikala muyè ku nzùbu wa mùsàlaayi kampànda? Ne musùmbà awu wà màsàlaayi makesè à ba-Nazi ònsò awu màse citùdilu manyungulùke, nènku, katanci aka, mòna’s, muntu kampànda kukookola ku ciibi. Ki mùsàlaayi mukesè awu kwambayè ne: “Aa, ndi ndyùmvwà bibi mu dindà emu! Mukàjàanyì, bambile bàkwàte njila baye.”

132 Nènku mukàjì awu kudifindayè ku ciibi aku, ne kupengayè ridô. Kwambayè ne: “Bàyaanyì! Bàyaanyì, juukà, lùkàsà!”

“Mbwalu kaayi ebu? Nganyì udi mwimane mwaba awu?”

“Hitler, mukòòkeshi wa Allemagne!” Kaa, ekèlekèle!

¹³³ Mùsàlaayi mukese awu kukàtamukayè, kuvwàlayè bilàmà byèndè, ne lùkàsà lwònsò, è kusulamayè sula. Kuya mutàngile ku ciibi aku, kukàngùla ciibi, ne kunzululayè ciibi, wàmba ne: “Bwòsho Hitler!” Nwamònu’s, yèyè ùvwa muntu munène, mu matùkù èndè à mu Allemagne. “Ncinyi cìmvwàku mufwànyine kwenza?”

¹³⁴ Bu wìkala mwàmbe ne: “Ndààku ùkatùpìke lupòngò lwàlwa,” ùvwa mwà kucyènza. Bwà cinyi? Kakwènà mukwàbò, kakwèna muntu mutàmbe bunène wa mushinga wàbúngì mu Allemange, mu matùkù à ba-Nazi, kupìta Adolf Hitler nànsha. Yèyè ùvwa muntu munène. Nènku yèyè. . . Nènku, bunèmè kaayi’s wè, pàdìbi ne yèyè ùtu ùkùmbula ànu tulààlà twà màsàlaayi ne bantu banène, kàdi’s ki yèyè ewu ku ciibi cyà mwendi wa lwà makàsà! Kaa, cìvwa cìfwànyine kwikala bunèmè bunène kùdiye.

¹³⁵ Èè, mpindyewu, netwambè bìshi bwà Flagstaff? Netùcisemèjè pabwìpì menemene ne kwètù kumbèlu’s. Ambàayibi tǔng bu byòbì mwà kwenzeka ne mu mapingaja emu, ne—ne Mfùmù wetù wa ditùnga, Mukalenge Johnson, L. B. Johnson awu, ambàyibi tǔng bu yèyè mwà kutùuluka ku ndèkè, múnwemu emu mwaba kampànda? Nènku mpindyewu tudì bònsò ànu mu cipidì cìmwèpelè cyà bantu. Tudi bònsò bapèlè. pàmwàpa kampànda ùdikù yèyè ne kaamudimu kèndè katàmba bwìmpè, pàmwàpa kazùbu kèndè katàmba bwìmpè, kàdi, ndekelu wa byònsò, tudì ànu bantu. Kàdi ambà tǔng bu yèyè mwà kulwa ku nzùbu kwèbè munwemu, pàmwàpa mutàmbe kupwekela wa kutùdì, kàdi kukookolayè ku ciibi; ne wèwè kuya ku ciibi, kàdi ki Mfùmù wa ditùnga L. B. Johnson awu mwimàne? Mòna’s, s’mbifwànyine kwikala bunèmè bunène. Udi mufwànyine kupanganangana nendè, mu cididì. Kàdi udi mufwànyine kwikala muntu mupèèbwe bunèmè, bwà kwikala ne Mfùmù wa ditùnga dyà États-Unis mwimàne ku ciibi cyèbè. Wèwè udi nganyi anyi mémè ndi nganyi? Kàdi pàabi Lyndon Johnson nyàwù mwimàne ku ciibi cyèbè aku’s! Nànsha wèwè mwikàle Socialiste anyi Républicain, anyi mushiilàngàne nendè ntàntà wa mùliyò wà kilòmèètà, kàdi nànsha nànkù ncifwànyine kwikala ànu bunèmè.

¹³⁶ Udi mumanyè ne mbwà cinyi anyi? Mbwalu uvwa mupèèbwe bunèmè ebu, mòna’s, tèlèviziyò ùdi mwà kucikùpa ku bimwényi dilòdòlò edi. Ncyà bushùwà. Bibèjibeji byà mundaamunya màalabà awu mbifwànyine kucitèèkà ku mutù kwà byena-bwalu, munwemu mu cibèjibeji cyà mu Flagstaff emu, ne: “*John Doe*. Mfùmù wa ditùnga dyà États-Unis mmwikile ne ndèkè mu Flagstaff makèèlèlè awu, kàyì mubìikila to, kàdi kupweka ànu pàtupù, kàyì nànsha ne dibìikila to, ne mukookòle” ku ciibi cyèbè. Mudipwekèshe! Awu Mfùmù wa ditùnga mmufwànyine kupeta dìnà dyà ne mmuntu mupwekèle, munène mùdiye

munène emu, bwà kulwa kwànyì kumbèlù anyì ku ciibi cyèbè wèwè aku; katwèna ne citùdì to, kàdi ùpweka kutùdì ne wàkula neetù.

¹³⁷ Mòna's, udi mufwànyine kupweka ne mùsèèsù, wamba ne: “Èyowà, mémè's ndi kalùmè kàà mukàbà. Mfùmù wa ditùnga ùvwa mungendèle bwenyi.”

¹³⁸ “Shààla mupùwe, ngànji mpetè lwèbè—mpetè lwèbè lukebu. Ntàngilà buludì mu mpàla. Wèwè udi umwèka bìshi pawùdì uya apu?” Udi mufwànyine kwikala muntu wa mushinga mukolè. Bushùwà's.

¹³⁹ Ambà tǔng bu mukalenge mukàji wa mu Angleterre mwà kulwa, nànsha mwinè mùdì kùyì ku bukòòkeshi bwèndè amu? Kàdi's ncifwànyine kwikala bunémè bwà bàmwè bàà ku nwènù bakàji bwà kuyiikila ne mukalenge mukàji wa Angleterre, nànsha munùdì kanùyì mu citùpà cyèndè cyà bukòòkeshi amu. Kàdi, nànsha nànkù yèyè ùdì ànu muntu munène, mmukalenge mukàji mutàmbe bunène pa buloba bujimà, bwà cikondo eci. Ncyà bulelèlè, ke cidiye, aci's mmu ngaakwilù wa cididi. Kàdi bu yèyè mwà kukulòmba kaacilengà kampànda kàà ku cimanu cyèbè, kàvwa ne mushinga wàbúngì kùdì, udi mwà kumupèeshakù. Ncifwànyine kwikala bunémè kùdì bwà kucyènza. Mbulelèlè, yèyè's mmukalenge mukàji wa mu Angleterre.

¹⁴⁰ Nènku udi mufwànyine kupèèbwa bunémè kùdì Mfùmù wa ditùnga. Nènku bantu bònso mbafwànyine kwakula bwà didipwekesha dyà mukalenge mukàji wa mu Angleterre, ùbùùka ne ndèkè bwà kamòna mukàji kampànda mu Flagstaff, wa kàyì ne kùdiye. Nènku bibèjibeji bìvwa mwà kucifùnda, ne nguumù yivwa mwà kucikòbola.

¹⁴¹ Kàdi, nudi bamanyè's, Mupersona mutàmbe kwikala wa mushinga mukolè wa dībà dyònsò, Yesù Kilistò, ùdì ùkookola ku ciibi cyètù. Kàdi mMudyombòdiibwe, kutàmbe bamfùmù bònso ne balombodi bàà makòòkeshi maalàbàle bàvwàku kwònsò eku. Mmwómò. Nènku udi mufwànyine kuMwitaba ne kupàtuka ne kwamba cintu kampànda pa bwalu abu, bantu bàà pambèlù mbafwànyine kukuseka bakutàngile mumpàla. Kakùyì luumù lùpàtuka to. . .

¹⁴² Nganyì udi mwà kulwa ku nzùbù kwèbè, munène mutàmbe Yesù Kilistò? Nganyì udi mwà kukookola ku ciibi cyèbè, munène mutàmbe Yesù Kilistò? Nganyì udi mwà kwenza cyòcì aci? Mwànà wa Nzambi, uvwa mwà kukookola ku nzùbu webè awu, nganyì uvwa mufwànyine kwikala ne mushinga mutambidile? Kàdi nànsha nànkù Yèyè ùdì ùkookola, ku ditùkù ne ku ditùkù. Kàdi wèwè ànu muMwitàbe, udi ubiikidiibwa ne mukoleshi wa maalu. Pa nànkù, nwamònu mùdì bàà pa buloba bàmanya bààbò anyì? Mmwómò. Kàdi mpindyewu Yèyè kàvwa mwà kulwa pavwàYe kàyì ne kabingilà kàà kulwa to.

143 Ne nudi nwela meeji ne didipwekesha dyà Mfùmù wa ditunga Johnson, anyi mukalenge-mukàjì wa Angleterre, anyi muntu munène kanà yònsò ewu, mùvwàdi mwà kuleejiibwa, bwà didipwekesha dyà muntu munène wa mushinga mukolè awu ùkookola ku ciibi cyèbè!

144 Kàdi twám bè bishi bwà didipwekesha dyà Mwànà wa Nzambì? Twètù tudi banganyi's tudi ànu bangenzàmpèkààtù, bakooyike, “balediibwe mu mpèkaatù, bafwimba mu bubì, balwè pa buloba twamba mashimi?” Ne pashiishe Mwànà wa Nzambì ùlwa kukookola ku ciibi cyètù.

145 Mpindyewu, mukalenge mukàjì wa mu Angleterre ùdi mwà kukulòmbakù dyèsè kampànda. Mmufwànyine kwangata cintu kampànda cyà kùdi aku. Ke mùdi Mfùmù wa ditunga mufwànyine kwenza nànkù, mmufwànyine kukulòmba bwà wèwè kwenza bintu kampànda byúvwà kùyì muswè kwenza to. Yèyè mmufwànyine kukulòmba mabanji awúvwà kùyì muswè kufila to, biinè abi mbìvwà bifwànyine kwikala kabiyi ne mushinga, ànu kùdiye to.

146 Kàdi Yesù ùdi ùkutwàdila cintu kampànda pàdiYe ùkookola. Ùdi ùtwàla difwidiibwa dyà luse. Kùdìdyombòdi to. Bwalu, ànu mùvwàbò bakòse cilumbu ku tubàdi twètù mwab'ewu, kì mwikalàbi mu Bukalenge bwà mu Dyulu. Bu Yèyè mukookòle ne mutwàle difwidiibwa dyà luse, kàdi wewè kudìdyombola, ne kufwìla mu mpèkaatù yèbè ayì, wèwè's neùbùtukè; nànsha mwinè mùvwà ne bunèmè bwà kwikala musòmbe mu disangisha dyà bwena edi, nànsha mwinè mùvwà ne bunèmè bwà kubwela mu ditàbuluja, ànyi èkèleeziyà webè, ne kuumvwa mpaasàtà wenù ùyiisha mukenji wà Èvànjeeliyò. Kàbìdi uvwa mutèlèje, wamba ne: “Èyowà, mvwamù.” Pàmwàpa, wèwè, mbikolè bwà kwamba cyúvwà mwà kwamba's. “Mvwa mutèlèje bimba misambu. Mémè kuyisànkidila. Mvwa mutèlèje majaaniki. Àvwa malelèlè.” Kàdi wèwè kuàdyombola.

147 Ambààyibi tǔng bu mémè mwà kwikala nsongààlùmè kàdi kusangana nsongààkàjì; mwikalè mwìmpè kumòna, mwikalè mwena Kilistò? Nsongààkàjì awu ùvwa mufwànyine kwikala. . . Mwikalè mutàmbe kukumbanyin-. . . [Katùpà kà mukàbà wà mēyì munda mutupù—Muf.] Kùyì mwà kusanganaMù cilèma to, kàdi wèwè udi ne cyà kutèeka ku luseke bilèlè byà bantu. Wèwè udi wamba ne: “Kaa, mémè's ndi ngiitabuuja ne Aci ncyà bushùwà. Ndi mmòna, musòmbe. . .” Kadi bikèngela ùCitàbè. Wèwè. . . Dìbà adi mukàjì awu ùdi ùlwa citùpà cyànyì. Dìbà adi udi ulwa citùpà cyà Dìyì, didi diikàle Mukàjì-musèla. Piikalàbi ne Yèyè ùdi Dìyì, Mukàjì-musèla neikalè Mukàjì-musèla Dìyì. Nwamònu's, cyà bushùwà ke ciikalàye! Nwamònu's, bikèngela wèwè kuCitàba. Udi mufwànyine. . . Udi mufwànyine kwamba cyùdi muswè kwamba aci, udi mufwànyine kuditàmbisha bwà Mfùmù wa ditunga; kàdi pa ciibidilu dìbà didi Yesù ùlwa ku cyètù ciibi, twètù tudi ànu tuMutèeka ku luseke. Nwamònu's,

katwèna ànu Nendè bwalu nànsha bùmwè to. Tudi twamba ne: “Èè, dīngà ditùkù.”

148 Ambà tǔng bu wèwè mwà kukookola ciibi cyà muntu kampànda? Mpindiyewu twánjàayi kukùdimuna cimfwányi bwà kasunsa kàmwè. Ambà tǔng bu wèwè mwà kuya kakookola ku ciibi cyà muntu kampànda, kàdi mwikàle ne cintu kampànda bwèndè? Kàdi, dyà kàleelù ewu, bôbò kukwenzela ànu bu mùdi wèwè mwenzèle Nzambi amu; èè, wèwè mwenze nàнку, mòna’s, èyo, kàdi kwèna ne nshinga mikuswika to. Nàнку wèwè mukookola ku ciibi cyà muntu kampànda, ne bôbò kupongwela ku dīdidiishì, ne kukàngabò rīdô; ànyi peeshì kulwa ku ciibi, kàdi kwamba ne: “Dikwàbò dībà!”

“Èè, ndi mwà kuswa . . .”

149 “Ncyèna ne dībà mu dīndà emu to!” Udi mumanyè cyùdi mufwányine kwenza anyi? Pàmwàpa cintu cimwècimwè cīndi mufwányine pàànyi kwenza, ne bakwàbò bônso abu, udi mufwányine kubenga kwalukila kàbīdi.

150 Kadi kī n’Yesù to. “Ndi mwimàne, nkookola,” mutùngùnùke ànu ne kukookola. [Mwanèètù Branham ùdi ùtùngunuka ne kukookola pa cintu kampànda—Muf.] Nwamònu anyi? “Ewu udi ukèbakeba,” kàyì ùkèba to. “Ùkèbakeba! Ewu udi ukookolakookola!” Ùkookola, kukookola nditùngunuka adi, ùkookolakookola! Nwamònu’s: “Ewu udi ukèbakeba, ewu udi ukookolakookola, necīikalè . . .” Kaciyi ànu . . .

151 Bu mùfwanù wà nzujì mubì. Mukàjì wàkaya ùjinga busombwedi, disombodiibwa, kàdi kààkadìpeta to. Yèyè . . . Wàkatùngunuka ne kukookola ne kuleeja cilumbù cyèndè. Ki kwambayè ne . . . “Ànu bwà kutàpulukangana nendè, nensombwele mwena lukuna wendè.”

152 Mmuniyi mwàtambà Taatù wa mu Dyulu kwenza? Nwamònu’s, bìvwa bikèngela bwà twètù kukookola ku ciibi Cyèndè. Bìvwa bikèngela kwikalabì Adàmà wènda ùbànda ùpweka ne budimi, wèla mbilà ne: “Taatù! Taatù, Udi penyi?” Kàdi pamutù pàà, pamutù pàà cyòci aci, ùvwa n’Nzambi munkaci mwà kubànda kupweka ne budimi ne: “Mwànàànyi! Mwànàànyi, udi penyi?” Nwamònu’s, aci’s cīdi ànu cīleeja patòòke citùdì. Tudi munkaci mwà kusokoma misangu yònsò, pamutù pàà twètù kupàtukila patòòke ne kucijikula. Tudi tuteeta bwà kunyeema, kusokoma paanyimà pàà cintu kampànda. Ki ngiikàdìlù wa muntu nyèyè awu, tudi naaci mùshindù awu. Èyowà’s, mukalenge.

153 Udi mwà kupèeshà bantu abu bintu bitàmbe bwimpè byúvwà naabì, bintu byònsò. Kàdi kanùvwa bafwányine, nwènù—nwènù—nwènù kanùvwa bafwányine kwitaba Yesù to. Ncyèna nnwàmba nwènù to, kàdi ndi nswa kwamba bantu bàà múnwemu.

154 Anyi pàmwăpa udi mufwànyine kwamba eci, udi mwà kwamba ne: “Muýiishi, s’ndi mwénzè nàнку. Mémè—mémè s’ndi mukàngùle ànu mwoyi wànyì ne mulekele Yesù mubwelemù. Ngâkenza nàнку kùkaadi bidimu dikumi. Ngâkenza nàнку kùkaadi bidimu makumi àbidì.” Èè, aci cìdi mwà kwikala ànu cyà bushùwà menemene, kàdi aci ki cyònsò cyùdi mwenzè anyi? Nwamònu anyi?

155 Ndi muswè kunùkonka mpindyewu. Wèwè mwà kubìikidisha muntu kanà yònsò ewu kwèbè, kàdi pashìishe dîbà dyùdi ubwela mu ciibi. . . Muntu kampànda mukubiikidisha, wèwè’s, wamba ne: “Bwèlà.”

156 “Èyowà, ndi ne kiipàcilà, nempàtukè pambèlù pàà cimenga ne kwikala mupèèbwe bunémè, nudi numòna’s.” Awu ke mùshindù ùdi bantu bààbùngì bìitaba Kilistò. “Nengìikalè. . . Ndi—ndi wa mu èkèleeziyà. Ndi wa mu mwaba munène *Kampànda* kwinshì eku, mùdi Docteur Ph. LL. ùsanganyiibwa, nudi bamanyè’s. Nènku ki èkèleeziyà udi mutàmbe bunène. Mulombodi wa cimenga ùtu uyamù, ne bikwàbò byònsò, nudi bamanyè’s. Mémè—mémè ndi wa mu èkèleeziyà awu.” Bātu baMubweja, ànu too ne apu. “Èyowà, mémè nemMwitàbè,” nwamònu’s, bwà cìndi mwà kupetamù bu makàsà à sungasunga.

157 Kàdi netwambè bìshi dîbà adi pàdi Yesù ùbwela mu mwoyi? Bantu bààbùngì bàdi bàMwitaba bwalu kî mbaswsè kuya mu ifernò to. Kàdi pàdi Yesù ùbwela munda mwà mwoyi wèbè, Yèyè mmuswè kwikala Mukalenge. Kî ng’ànù Musùngidi pàtupù to; kàdi Mukalenge, kàbidì. *Mukalenge* ùdi “bulombodi.” Ùdi ùbwelamù bwà—bwà kukòòkesha.

Mpindyewu wèwè udi wamba ne: “Ncyà bushùwà anyi, Mwanèètù Branham?” Ncyà bushùwà.

158 Ambà tǔng bu—bu mémè mwà kukubiikila kwànyì ku nzùbu, ne wèwè kubwela mu ciibi? Ki wèwè kukookola ku ciibi, ne mémè kutàngila pambèlù, mémè kwamba ne: “Èyowà, bwèlà. Bu wèwè mwà kunkwàcisha, èè, enza nàнку. Kàdi mpindyewu, paùdi ubwela mpindyewu, ncyènà muswè bwà wèwè kubwelakana mu maalu à mu nzùbù mwànyì to. Udi wimanyina ànu ku ciibi aku!”

159 Vùlukààyi ne, cyena—bwalu cyètù cìdi ne “biibi” munda mwà ciibi. Mpindyewu, munda mwà mwoyi wà muntu mùdi biibi bikesè byàbùngì, nènku byòbì biibi bikesè abi mbisokòke bintu byàbùngì. Ànu bwà kuMubweja, kî ncyònsò cìdi ne bwalu to, pàdiYe ùbwela.

160 Pàndì mbwela mu nzùbu mwèbè, bu wèwè mwà kungaakidila mu ciibi, mòna’s, bu wèwè mwà kwamba ne: “Bwèlà, Mwanèètù Branham. Ndi ne disànkà dyàbùngì dyà kukumòna!”

161 Ndi mufwanyine kwamba ne: “Èè, ndyèsè bwà mémè kubwela mu nzùbù mwèbè!”

162 “Kaa, kwênàku ulwa usòmbela panshi anyi? Mwanèètù Branham, endàkànà mu nzùbù mwètù emu, dyumvwè mucyankàme!” Kaa, ekèlekèle!

163 Ndi mwà kuya ku frigo, kudyàmbwilamù òmwè dyà ku màmpà meela minyìinyi awu, dyà bunène *ebu* adi, kukòpola bisàbaatà byànyì, ne kuya mu nzùbu wa bulààlu kàdi kudyòlwela panshi. Nènku ndi mwà kwikala ànu ne—ne cifù cyànyì cìtwa cyanga menemene, nwamònu’s. Bwà cinyì? Bwalu ndi mudyumvwè mwakidila bilenga. Nudi bangaakidile bilenga. Pa nànkù ndi mwà kwanyisha cyòci aci bu nwènù mwà kwikala bangaakidile bilenga.

164 Kàdi mêmè mwà kubwela mu nzùbù mwèbè, kàdi wèwè kungambila ne: “Wèwè imànyìnà ku ciibi aku, mpindyewu, kùbangì wàtwa byanza apa wàtwa byanza apa to!” Ncyènà mwà kudyumvwa mwakidila bilenga to. Nànsha wèwè’s? To, nwamònu’s, kwènà mufwànyine kudyumvwa mwakidila bilenga nànsha. Muntu kampànda mukubùikidishè kwèndè, kàdi kwamba ne: “Mpindyewu indilà! Èyowà, bwèlàaku, kàdi ikàlà mwimànyine ànu apu!”

165 Mpindyewu kùdi kaciibi kakesè díbà dyùdi ubwela mu mwoyi wà muntu. Netwàkule ànu bwà ndambù wabì, nwamònu’s. Katwèna ne díbà dyà kuya ku biibi byònsò ebi to, bwalu bìdi búngì cyanànà. Nwamònu anyi? Kàdi, twàmbè ne, mu tusunsa dikumi tùdi tùlonda etu, twàkulàayi bwà biibi bìbìdi, anyi bisàtù.

166 Mpindyewu, ku luseke lwà dyàbalùmè lwà mwoyi wà muntu aku, Paùdi ubwela mu ciibi, kùdi kaaciibi kakesè ku luseke lwà dyàbalùmè, aku kàdi kàbùikidiibwa, munda amu ne, ciibi cyà diditambisha. Kaa, ekèlekèle! “Kùdidingi wabwela ku aci ciibi nànsha!” Amu kí mbaswè bwà Mukalenge kubwelamù to, ku aci ciibi, aci’s ndiditambisha. “Mêmè ndi mashi a bleu. Ndi mumanye cìndi ngenza! Kaa, èyowà’s, mpindyewu tàngilà, nkwambilè, ndi—ndi...” Nwamònu’s, ndiditambisha. “Kanùbwelakanyimù to!” Mpindyewu, Yèyè kènà mwà kudyumvwa mwakidila bìmpè pàcìdi ànu ciibi cyà diditambisha aci cikànga to.

167 Yèyè ùdi ne cyà kukupwekesha. Nwamònu’s, ke cìdiYè ùbwelelamù. “Udi uswa kungambila ne ndi ne cyà kupweka kwìnshì aku ne—ne kwenza maalu bu bòbò anyi?” Èè, kwènà mwenzèjiiibwa to, aci kaayi cyà bulelèlè. “Èè, nennwambile, nudi nwela meeji ne mvwa mufwànyine kwenza bishi pangàaya mu cisangilu cyà beana kantu-ku-byanza musangu wàlondà? Ncinyì cìndi mufwànyine kwenza mêmè mwà kutuutakeena ne wanyì—wanyì mfùmù wa mudimu màalabà? Kàbìdi ne, ndi mufwànyine kupeta Nyumà awu pambidi pàanyì, nènku ndi mufwànyine kutùpika kuntwaku, munkacì mwà mudimu

wànyì, ne kubanga kwenda ngàakula mu myakulu, kaa, aci's ncifwànyine kumpwekesha milongo. To, shààla pambèlù apu!"

¹⁶⁸ Nwamònu's, ki bwalu mbwòbù abu's, nwamònu's. Èyowà, neùlekelè Yesù àbwelè, neùshaale wa mu èkèleeziyà ne kufùndishamù dìnà dyèbè, witaba Yesù bu Musùngidi webè; kàdi udi wamba bishi bwà kwikalaYè Mukalenge webè, dībà didiYe ne bukòntononyi mu kaabujimà? Dībà didiYe Mukalenge, Ùdi ne byònsò, mbyèndè Yèyè; wèwè, wèwè yònsò udi mudilekèlèlè kùdiYe mpindyewu.

¹⁶⁹ Kàdi kaadiditambisha kakesè aku. "Kaa, udi uswa kwamba ne, bwètù twètù bakàjì, tudi ne cyà kulekela nsukì yètù yilepa anyi?" Èè, aci's ncidiYe mwàmbè. "Netwimanyikè dilaaba dyà inà ku byanza, anyi bintakanyi byà bilaabu kwisù anyi?" Aci's ncidiYe mwàmbè. "Èè, kàdi nudi nwela meeji bishi bwà mùshindù wikalà kànsànkì kàànyì kàà batedi baa bilàmbà bafwànyine kwamba's? S'nebàmbiikilè ne ngwa cikùlùkulu." Èè, wèwè lamà ànu diditambisha dyèbè adi. Tungunuka. Yèyè neìmanè ku ciibi, Yèyè kàakuya kule kupite apu to.

¹⁷⁰ Kàdi dībà dyùdi mudìlongòlòle bwà kukàngula ciibi aci, kuMulekela ùbwela, Yèyè neàkusukwilèci. Tùpùtulù netùpatukè e kuyatù mu cipànzà cyà bukooyà, ne bilaabu byà kwisù nebyàlukilè mu cipànzà cyà bukooyà, ne mukòshì wa nsukì neàfwe ne nzala pùkalàye ùvwa ùkòsa ànu bakàjì nsukì, bwà mwena Kilistò mulelèlè.

¹⁷¹ Mpindyewu wèwè udi wambà ne: "Aci kaciyèna ne bwalu!" Kaa, èyowà's, cidi ne bwalu, bushùwà. Ki cidi Bible mwambè ncyòci aci. Ncyà bushùwà. Nwamònu's, kùdi díyì dikesè mwaba awu, dyùdi kùyì muswè bwà Yèyè àmbàpu bwalu to.

"Èè, mpaasàtà wanyì!"

¹⁷² Cidi mpaasàtà mwambè nànsha ciikàle cinyì. Aci ncidi Bible mwambè ne: "Mbundù bwà mukàjì kwenzayè nànkù."

¹⁷³ "Èè," mùdi wamba, "bìvwa bitùkèngela bwà kutùlongesha bintu, Mwanèètù Branham, mmùshindù wà kupeta Nyumà Mwimpè, ne mùshindù wà kwikala *cikampànda*, *cikansangu*." Mmunyì muwàlonga makumi makolè pawikalà kùyì mumanyè ABC? Kùyì mumanyè nànsha mwà kubyènza mwinè, bwà kwenza maalu bu, ne kumwèka bu kampànda, kuvwàla bu kampànda. Mbundù bwà kumòna bakàjì aba mu mùsèsù leelù ewu.

¹⁷⁴ Mvwa muyè mwaba kampànda makèèlèlè awu, cikondo, kaa, cyàbwedibu kùdi musùmbà wà batwìshe maalu katungu abu. Bòbò, bantu balùmè bàvwa ne nsukì ne mu mèsù àbò, mipwèké milembèlèlè paanyimà pààbò apa, ne byenzè ànu bu tùndamàtà tùtù bânà bálwàta mu cilongelu atu, bavwàlè bisàbaatà binène byà kale, mukana citongàtongà. Udi ànu mwà kudimwena ne bàvwa bapangè maalu. Nènku babwela muntwamu mùshindù awu, kamba ne: "Tudi ba-Français."

175 Nganyi pa buloba apa udi mwà kwangata muntu wa mùshindù awu ku mudimu? Bātu badiila ku cinyi? Nènku mvwà mumòne ndambù wa bansongààlùmè balelèlà basòmbe kuntu kwàka. . . Bāvwa bāfūmina ku cilongelu cyà nkònga myandà kuntu kwàka, ke kùvwà baamùyāpāndi abu bāfūmina, anyi ngèèla meeji bātu bādibūikila bōbō biinè ne *bishiishi* anyi *baamùyāpāndi*, anyi cintu kampānda cyà mùshindù awu, cìmwè cyà ku bintākanyì bìdi bifūmine ku Angleterre abi. Nènku muntwamu mùshindù awu, nganyi udi mwà kwangata muntu wa mùshindù awu bwà kumwenzelayè mudimu? Udikù mufwānyine kutèeka muntu wa mùshindù awu ku mudimu wèbè anyi, nwènù beena kantu-ku-byanza? Nwènù bafwānyine kwenza nānku, nudi, kùdi cintu kampānda, kanwèna banjì kuseemèna pabwīpi menemene ne Nkūrusè nānsha.

176 Tàngilāayi bakājì badi pambèlù mu mùsèèsù abu, nènku ciinè aci's mbundù! Pāmwāpa bakājì batekète abu kabāyi benze bwalu ne tulāmbà tukèsè twīpi atu pambidi, nwamònu's, èè, mbundù's, bwà mùshindù ùdibo bāmwèka. Èè, wèwè udi wamba ne: "Mòna's, wèwè mukājì, udi munkaci mwà kwenda masandi."

177 Badi bamba ne: "Indilā kakesè mwab'ewu, wèwè nsongààlùmè! Ndi ne bukezùkè bwānyì bwònsò ànu mūndi emu. . ." Aci's ncifwānyine kwikala nānku, mu meeji èbè wèwè mwinè. Kābìdi mbifwānyine kwikala nānku, bishindika too ne kùdi mateeta à ba mungàngà, ne udi mufwānyine kwikala nānku.

178 Kādi, wāvuluka ne, ku Ditùkù dyà Cilumbulwidi, neùkandamunè bwà dyenda dyà masandi. Yesù wākamba ne: "Ewu yònsò ukātāngidi mukājì bwà kumwalakana wāmānyì kwenda nendè masandi munda mwà mwoyi wèndè," pèèbè wèwè ngudi mukadileejè nkāāyebè kùdiye. Nwamònu mùdi dyabulù mubāfòfòmìje's? Mbundù's. Cìdi bundù. Nudi numòna's, badi—badi ne nyumà kampānda. N'nyumà kampānda udi wenza nānku. N'nyumà udi kāyì wa cijila to.

179 Kādi Nyumà Mwimpè mushùwashùwālè neenzejè mukājì bwà kulwātayè bya kalolo ne kumwèka wa cijila.

180 Mukājìānyì kungambilayè, musangu kampānda. Tuvwa twenda tupweka ne mùsèèsù, ne twètù kusangana mukājì kampānda muvwāla nkanzu, mwāmwa mu ditungà dyètù. Cìvwa ncintu cyà pabwāci menemene, nwamònu's, kakwèna beena Mpenta bāābūngì kuntwaku to. Pa nānku, twètù kusangana ne ùvwa muvwāle nkanzu. Ki yèyè ne: "Billy," mwākambāye, "Ndi mumanye bāmwè bāà ku bakājì abu. Bātu bimba mu makoralè mùnwemu emu mu maèkèleeziyà eyi."

Mèmè ne: "Bushùwà's."

Yèyè ne: "Èè, kadi pāàbò bamba mùdìbo beena Kilistò?"

Mèmè ne: "Munanga wanyì, tàngilā kùnù. Wamònu's, twètù katwèna. . ."

Yêyè ne: “Bwà cinyi bantu bèètù?”

Mémè kwamba ne: “Tàngilà, munanga wanyì, twètù katwèna bà mu cyàbò—cyàbò cisà to nànsha kakesè.”

Yêyè ne: “Cinyi?” Yêyè ne: “S’mbeena Àmèrikè.”

Mémè ne: “Èyowà, kàdi twètù kî ncutùdi to.”

Yêyè ne: “Kî ncutùdi?”

Mémè ne: “To.”

¹⁸¹ Mémè kwamba ne: “Pândi mbwela mu Allemagne, ndi nsangana nyumà wa Allemagne. Pangààkabwelà mu Finlande. . .” Ku cyowedi cyà mâyi à mudilu kuntwaku, nwênù beena mu Finlande bààbûngi nudi bamanyè, bakàji bàdi bôwèsha balùmè mâyi. Pa nànkù, aci’s cidi ànu nyumà wa cyena Finlande. Bantu balenga bàà menemene, kàdi, nudi nusangana ne, kwónsò kunyaya, nudi nusanganakù nyumà wa bwena ditunga.

¹⁸² Nudi nubwela mu èkèleeziyà kampànda tàngilàayi mpaasàtà, yêyè mwikàle wa ciputuku ne ùditwàla mùshindù awu, disangisha nediikalè ànu mwomùmwe. Nwamònu anyi? Bàdi bàngata nyumà wa ewu ne mukwàbò pamutù pàà Nyumà Mwimpè.

¹⁸³ Ki bwà cinyi tudi ne malongesha àbûngi makònyàngàle à Bible. Pamutù pàà kwalukila ku dizòla, bóbò mbakangate nyumà wa dingumba kampànda. Nwamònu anyi? Kàdi Dìyi ndenyi kùdìbo ànu mùvwàDi mu matùkù àkalwà Yesù, ùbweja Èvànjeeliyò mulelèlà mu cyalu awu. Bóbò kwamba ne: “Yêyè’s ndémon. Yêyè’s m’Beelèzèbùlà.” Nwamònu anyi? Kàdi’s ki bwalu mbwòbù abu’s.

¹⁸⁴ Ki yêyè ne: “Èè, dîbà adi, twètù katùyi beena Àmèrikè to, tudi beena ganyì?”

¹⁸⁵ Mémè kwamba ne: “Bukalenge bwètù mbwà Kuulu.” Nwamonu’s, tudi badìshikàmìne, balediibwe cyàkàbìdi. Bukalenge bwà Nzambì bùdi munda mwèbè. Nwamònu’s, enzàayi maalu mùdìbo bènza muulu Mwàmwa, nudi batùmìbwe bàà Mwàmwa. Mémè kwamba ne: “Tudi beena-mwàbò kaaba aka, biikàle ne mwoyi mu mubidi emu. Kàdi, nyumà yètù, tudi beenyi ne beena lwendu.” Tudi beenyi pa buloba mpindyewu, nànsha mu ditungà dyètù twètù mene, bwalu twakiitaba dibiikila pààkakookolàdi ku mwoyi wètù, bwà kushààla citùpà Cyèndè, Dìyi Dyèndè. Ne Dìyi dìdi ditùshìndika, ditwènzeja bwà kwikala ne nsòmbelu ne ditwènzeja bwà kwenza maalu bu beena Kilistò.

¹⁸⁶ Musangu kampànda, lwà mu Sud mwàmwa, kaabwalu-kalonda kakesè. Kùvwa mfùmù kampànda. . . anyi, musùmbi kampànda. Bàvwa bàsùmbishà bapika. Aci’s civwa mmu cikondo cyà—cyà ditàpulujiangana, ne bàvwa ne bapika mu Sud amu. Bàvwa. . . Bàvwa bafwànyine kuya ne kubàsumba, ànu bu

mûdi mwà kusumba kàshinyi kàà kamana kwendela, pàditu twadija cisumbu.

¹⁸⁷ Mpindyewu, mémè ndi nkôngòloja, kakùyì mpatà to... Ndi nswa kwamba ne mutàpuludyanganyi. Mémè ndi mutàpuludyanganyi. Bwalu, ncyèna ncyùka mùdìbo bàtàngana, wèwè kwena mwà kwikala mwena Kilistò kàdi kwikala nkôngòloja to. Aci's ncyà bushùwà menemene. Nànsha Nzambi mene ùdi ùtāpulula matungà Èndè. Ùdi ùtāpulula bantu Bèndè. “Pātukāāyi munkaci mwàbò!” Yèyè ùdi... Yèyè mmutāpuludyanganyi. “Kanùdìdingi nànsha... Kanùlengi bintu byàbò bikooyike abi to!” Wākakōka Izàlèèlà, cisà cyà beena Yudà aci, kucipātula mu byònsò, bisà byònsò byà pa buloba. Yèyè mmutāpuludyanganyi.

¹⁸⁸ Kàdi ncitu ngìtabuuja ne muntu kanà yònsò ewu ikalè mupika to. Nzambi wàkenza muntu; muntu wàkenza bapika. Mémè ncyèna ngìtabuuja ne muntu ùvwa ne cyà kumwenena mukwàbò to, ní ncisà kaayi, diikala, anyi cintu kanà cyònsò eci to.

¹⁸⁹ Kàdi kùdi ditāpulujiangana, Mukàji-musèla wa Kilistò mmùtāpulùjìbwe ne èkèleeziyà mikwàbò yònsò eyi, nènku aci ncyà bushùwà menemene: èkèleeziyà wa mu bufuki, ne Èkèleeziyà wa nyumà; èkèleeziyà wa musunya, Èkèleeziyà Dìyi. Ke mùtùbi misangu yònsò. “Yesù wākālwa kùdi Bèndè, Bèndè kabāākaMwakidila to; kàdi bònsò bāākaMwakidilā abu!”

¹⁹⁰ Pa nānku eci, pa ciibidilu kùvwa basūmbi, bendulukidyanganyi bàà mushinga bàvwa bàya bàsūmba bapika aba. Musangu kampānda umwe wākālwa mu budimi bunène, e kubākenketayè. Bapika bàvwa bàtuuciibwa bibi be, ne bikwàbò byònsò, nudi bamanyè's. Bàvwa kule ne kwàbò; kabāvwa bafwānyine kwalukilakù kàbìdi to. Ba Boers, ba Hollandais, bàvwa bayè kuntwaku bakabangate, balwe naabò mùnwemu e kubàsūmbishabò. Nènku kabāvwa mwà kumòna kàbìdi papa to, kumòna kàbìdi maman kàbìdi to, kàbāvwa mwà kumòna bānā bààbò bàà mu mabòkò kàbìdi nànsha. Bàvwa bàbāsanga ewu ne mukwàbò; bàngata muntu mulùme munène, kumusanga ne muntu mukàji munène, kuumumusha kùdi mukājèndè, bwà kwenza bapika bàà batāmbe bunène. Kaa, Nzambi neābalumbùlwishè bwà cintu aci dīngā ditukù! Ncyà bushùwà. Aci kī ncīmpè to.

¹⁹¹ Ànu mwà kambà Abraham Lincoln musangu kampānda, dibā dyākatùlukāye mu bwātù mwāmwa mu Nouvelle Orléans, kutùlayè cifulu cyèndè cyà lutanda aci. . .

¹⁹² Yèyè kumòna bafīike bàsātù anyi bànaayi, bènda bàpweka, biimāne mwaba awu kabāyi ne bisābaatā ku makāsà to, mwāba ùvwābo ne. . . Ngomba munyīnè ne bikwāte—bikwāte mashika panshì apu, bàvwa biimāne paanyimā pāà bamanè kubweja ngombe mu cikūmbi. Makāsà àbò makesè awu mùlè, àpātuka

mashi. Bàwva bìmba misambu ne: “Wèwè udi ne bisàbaatà, mèmè ndi ne bisàbaatà, ne bânà bàà Nzambi bônso bàdi ne bisàbaatà.”

¹⁹³ Pààkatùùlukàye mu bwàtù kuntwaku, wàkaya mutàngile ku cikùmbì cyà ngombe aci, kùvwa muntu mufiike munène mule mwimàne kuntwaku, bàmwela mfimbù, bàteeta mwoyi wèndè. Ne bàmunyeemesha lùbilu wàbàndà wàpweka ne mùsèèsù, ne mfimbù paanyimà pèndè; pashishe kuteeta mwoyi wèndè awu, bwà kumòna ní ùvwa bìmpè. Mukàjèndè mukwàte ne byà luse awu mwimàne mwaba awu, ne bânà bàbidi ànyì bàsàtù mwînshi mwà mabòkò èndè mùshindù *awu*; bwà kumusùmba, kumusanga ne mukàjì kampànda mutàmbe bunène. Mununu Abraham Lincoln kucyèlayè mwînshi mwà cifulu cyèndè. . . kwelayè cifulu cyèndè mu dyàpà, mùshindù *awu*, ne kutuutayè dinkomù panshi, kwambayè ne: “Abi mbibi! Ne dîngà ditùkù nentuute cintu aci, nànsha cyòci mwà kulòmba lufù lwànyì.” Nènku dyàmwàmwa, mu nzùbu wa dilamina mpìngù mu Chicago mwàmwa, mùdi mùzàbì ne mashi matampàkànepù, àkapikula mufiike awu ku cintu aci.

¹⁹⁴ Nènku ndi ngàmbe ne mpèkaatù ne bintu abi mbibi! Nzambi nkwaçishèku mbituute, pàmwè ne bambi bônso bàà Èvànjeeliyò; Tudi balediibwe badiikàdile, bânà bàà Nzambi. Katwèna mwà kubwelakana ne twitabàayi anyì ntèndeleeù bwà katùbweja mu Nsangilu wa Buloba bujimà wa Maèkèleeziyà nànshà, tudi bantu balediibwe badishikàmìne, mu Nyumà Mwimpè, tudi ne bukenji, twàkapàtuka mu bintàkanyì byà mùshindù awu bwà kwikala beena Mpenta. Ncyà bushùwà. Mpindyewu tudi badishikàmìne. Kabyèna bikèngela bwà twètù kwikala baswikiibwe cyàkàbidi ku bintu abi to.

¹⁹⁵ Kàdi musùmbi ewu kwambayè, mutàngile mu bapika bèndè amu, batwè ku lukàmà anyì ne byà mu njila, bajima, mu budimi bunène, kwambayè ne: “Ambà tǔng!” Kùvwa kalùmyànà kampànda muntwamu, kakàvwa kòkò kàkèngela bàkeela mfimbù to; kàvwa katùntùmika cyàdì, cibàngà cyela muulu, kacya kààdibwinke ànu mu mudimu! Yèyè ne: “Ambà tǔng! Ndi muswè kumusùmba.”

¹⁹⁶ Yèyè kwamba ne: “Kaa, to!” Mwenayè kwambayè ne: “Awu kî ngwa kusùmbisha to. Huh-uh.”

Yèyè ne: “Èè, yèyè mmupika anyì?”

Yèyè ne: “Èyowà.”

¹⁹⁷ Yèyè ne: “Èè, kàdi cidi cyènze ne ikalè mushiilàngàne nùnkù ki cinyi?” Yèyè ne: “Udi umudisha bishiilàngàne anyì?”

Yèyè ne: “To, bàdi bàdiila bônso pambèlù pàpa mu cikukù, bônso pàmwè.”

Yèyè ne: “Yèyè ki mfùmù kumutù kwabò anyì?”

Yèyè ne: “To, yèyè’s ùdi ànu mupika cyanàànà.”

“Èè,” mwàkambaye, “cìdì cìmùvwija mushiilàngàne ncinyi’s?”

¹⁹⁸ Yèyè ne: “Udi mumanyè’s, mvwa ndikonkaci, mémè pàànyì. Kàdi,” mwàkambaye, “udi mumanyè’s, kwàbò kubàlela kùdìbò bafùma, mu Àfrikè amu, tatwèndè wa nsongàalùmè awu ùdi mfùmù wa cifuku kampànda. Nènku nànsha mùdiye mwenyi emu, ùdi ùditwàla bu mwànà wa mfùmù.”

¹⁹⁹ Kaa, mémè kudyàmbidila ne, eci ncintu kaayi bwà bwena Kilistò! Bakàjì, imànyikaayi divwàlà dyà bilàmbà byà mùshindù awu’s! Balùme, imànyikaayi dyamba dyà minèkù yà manyaanù ne bintàkanyi byònsò abi! Tudi bânà bàà balùme ne bàà bakàjì bàà Mfùmù. Lwàta bu mukalenge-mukàjì, lwàta bu i—inàbànza. Enza maalu bu muntu wa nsongo, kùlekedì nsukì yèbè yileepa yipweka mùshindù ewu nànsha. Bible mmwambè ne: “Mbibi (bufùki bùdì bùkulongesha) bwà muntu mulùme kwikalayè ne nsukì mile. Ne bìdì bundu ne cintu cyà ciipanshì bwà mukàjì kusambilayè ne nsukì yèndè mikòsa.” Kàdi netwàmbè bìshi bwà ebi? “Bìdì—bìdì cinyangu bwà mukàjì kuvwàlayè bilàmbà byà muntu mulùme.” Nzambì Munène utu kàyì ùshintuluka awu kènà ùshintuluka to. Kàdi nànsha nànku leelù ewu ncyenzè ànu bu malekelela mu ditùngà dyètù mwònsò emu. Bundù! Enzàayi maalu bu bânà bàà balùme ne bàà bakàjì bàà Nzambì. Twikalàayi ne nsòmbelu wa mùshindù awu. Tudi, tudi bânà bàà Mfùmù. Ke citùdì. Ke citùdì. Mpindyewu mene musùmbà wa bukooya ewu ne manyaanù ne bukooya, mu nyùngùlukilu emu, bantu bàdibìkila mùdìbò “beena Kilistò” kàdi biikàle ànu benza maalu mùshindù awu!

²⁰⁰ Kàdi vùlukàayi ne, twakapeta dikookola ditùkù kampànda, ne twètù kuMunzulwila bwà abwelè, diditambisha ne byònsò kuyabì. Amen. Ncyèna ncyùka mwònsò mwàmbiikilàbo amu to!

Kaa, ngèèla meeji ne ndikù ànu wa cyena kale,
Kàdi Musùngidi wanyi ùvwa wa cyena kale,
pèndè.

²⁰¹ Mbulelèlà anyi? Nuvwa búmvwè musambu awu. Ikàlaayi bàà cyena kale! Kanùteeci kutentula muntu kampànda mukwàbò to. Yèyè Ncileejelu cyènù. Teetaayi bwà kwikala bu Yèyè, ne Nyumà ùdi munda mwènù neànwambùlwishè bwà kwenza cyòci aci. Kwenza mwoyi wènù bu Wèndè.

²⁰² Èyowà, kùdì ciibi kuntwaku. Ndi muswè kutèèla ciibi cikwàbò. Ndi ntambe kwangaciibwa. Kùdì ciibi cikwàbò kuntu kwàka, ànu pabwìpì menemene ne ciibi cyàcya, patùdì tunyùngulukila ku luseke lwà dyàbalùmè, ne cyòci ciibi aci nciibi cyà nsòmbelu webè wa sungasunga. Kaa! Kaa, kwènà muswè bwà Yèyè kubwelakanamù to. “Mpindyewu mémè muswè kupàtuka kuya mu kaafetè kakesè kàà cicyampa, Bwèbè mbunganyi? Ng’èkèleeziyà kaayi wàngambila cyà mémè kwenza?” Uh-huh, ki bwalu mbwòbù abu’s, nwamònu’s. “Cyà

dikumi cyà difutu dyànyì? Nganyì wángambila cyà mémè kwenza? Aci's mmaalu àànyì mantàngile's! Mémè ke udi ukèba mfranga eyi. Ndi ne nsòmbelu wanyì wa sungasunga. Nemvwalè tùpùtula mémè muswè kuvwàla. Aci's ndyèsè dyànyì dyà sungasunga dyà mwena Àmèrikè." Ncyà bushùwà. Mbulelèlè. Mmwómò.

203 Kàdi wèwè mwikàle mwànà wa mùkòòkò, kùyì mbuji to, nwamònu's, mìkòòkò ki yìdìYe wènda ùkeba. Neyitàpuludiibwè dīngà ditùkù.

204 Mùkòòkò ùdi ne myòsà. Ke cintu cimwèpelè cìdiwù naaci. Ne wòwò kawèna mwà kukwàtakaja myòsà ayi to. Katwèna balòmbiibwe bwà kukwàtakaja mamuma à Nyumà to, kàdi bwà *kukwàma* mamuma à Nyumà. Nèku pàdiwu ànu mùkòòkò, newùtoloke myòsà. Kawàkukwàtakaja to. Tujilu ne cintu cyònsò cìdì munda mwàwù aci cìdì mùkòòkò, ncyènzè myòsà bwalu munda mwàwù mùdi tujilu ne cìfidi cyà tujilu ne cilunji ne bintu bidì ne mudimu wà kwenza myòsà.

205 Nèku díbà dyùdi mwena Kilistò, neùkùmbananganè ne Dìyì. Nànsha nganyì mambe cinyì. Kwènà ne cyà kukwàtakaja cintu nànsha cìmwè, ne kwenzèja cintu nànsha cìmwè, kukòka, kusalula to. Udi mwena Kilistò. Wèwè udi ukwàma mamuma à Nyumà bidyènzekela ànu nkàyaabi. Nwamònu anyi? Nwamònu's, nèku mùshindù awu ke ùdibi. Nwamònu anyi?

206 Kàdi, bantu leelù ewu, kí mbaswè bwà wèwè kwela mukòlò wèbè mu nsòmbelu wabò wa sungasunga nànsha.

207 Cintu cimwèpelè cyùdi wenza, ncyà wèwè kukàngula ciibi ne ciibi cyònsò, mpindyewu wamba ne: "Bwèlè, Yesù." Mònaaku cìdì cyènzeka. Paùdi umòna mu Mukàndà ne, udi ne cyà kwenza *cikampànda*, neùcyènzè. Bwà cinyì? Udi mùkòòkò, ànu kwònsò kwònsò aku, díbà adi.

208 Kàdi wèwè muswè ànu kusòmba, kuMulamina ku ciibi, wamba ànu ne: "Ndi mukashàale wa mu èkéleziyà. Ndi mwìmpè ànu bu wèwè. Nwamònu's, mémè ngaakiitaba Kilistò." Míngà misangu aci ncyùdi ànu wenze. Kàdi wakaMuvwija *Mukalenge* anyi? Nwamònu anyi?

209 Mpindyewu, Mukalenge kènà mwà kuteeka Mukàndà wà tunungu ne kwamba Dìyì, ne pashìshe kulwa kuDìvila nànsha. Nèku wèwè wamba ne udi ne Nyumà Mwìmpè, kàdi Bible wamba cintu kampànda cyà kwenza, kàdi wèwè wamba ne: "Kaa, ncyènà ngiitabuuja Aci to." Wèwè vùlukà ànu ne, nyumà udi munda mwèbè awu kí n'Nyumà Mwìmpè to, bwalu Yèyè kèna mwà kuDìvila to. Ncyà bushùwà. Kèna mwà kuDìvila Yèyè mwinè to. Wàkafùnda Dìyì, ne Yèyè ùdi ùDitàbaleela, bwà kuDìkùmbaja. Nwamònu anyi? Pa nànku kí n'Nyumà. . .

210 N'nyumà kampànda, bushùwà, mmufwànyine kwikala n—nyumà wa èkéleziyà, mmufwànyine kwikala nyumà wa mpaasàta, mmufwànyine kwikala nyumà wa bàà pa

buloba, mmufwànyine kwikala, ncyènà mumanyè ne ncinyi to, kàdi cyònsò cidiku aci, ncifwànyine kwikala nyumà wa cyena màngumba, “Mémè ndi Méthodiste; ndi Baptiste; ndi Presbytérien; ndi mwena Mpenta; ndi *cikampànda*,” mbwena kwamba ne . . .

²¹¹ Mpenta, mpindyewu vùlukàayi ne, ngǎnji ncìlongòlòlè, Mpenta kî mbulongolodi to, Mpenta ndilabula dyùdi upeta. Nwènù ba-Méthodistes, ba-Baptistes, beena Kàtòlikè, ne bònsò, nudi mwà kulabula Mpenta. Kwènà mwà kushààla mwena Mpenta to, bwalu kakwènà mùshindù wà wèwè kushààla mwenamù to.

²¹² Nkàadi mu dîkù dyà Branham kùkaadi bidimu makùmi àtaanu ne bitaanu. Nudi bamanyè’s, kacya kabàtukù banji kundomba bwà mémè kulwa Branham to. Ndi mulediibwe, Branham.

²¹³ Nènku mùshindù awu ki wùdi mwena Kilistò, udi mulediibwe mwena Kilistò. Ncyà bushùwà, mpindyewu.

²¹⁴ Kaa, nsòmbelu webè nkàayebè awu’s! “Kaa, ndi nkwambila, mpaasàtà wanyì ùtu ùya mu mǎja aa, nènku twètù tutu tombota à dyombota. Ke mùtùbò benza’s.” Èyo. Nwamònu anyi? “Kwènà ulwa kungambila cìndi mwà kwenza ne cìndi nciyi mwà kwenza to.” Èyo, nwamònu’s, kwàkuMulekelakù ùbwela to.

²¹⁵ Wèwè udi uMulekela ànu ùbwela musangu ùmwè, ne pashiishe walukila ku dyombota dyà mǎja anyi mǎja à bidundadùndà awu, anyi ní ncinyi cyònsò ciwàyà kenza aci, ùmonà cyùdi mwà kwenza. Kwènà mwà kucyènza to. Mulekela ànu ùbwela musangu ùmwè cyanàànà, kadi pashiishe ùbanga kuvwàla kàpùtulu, bàmwè bàà kunùdi nwènù bakàji.

²¹⁶ Ndi mumanyè ne ndi nzwàngata ntàntà mule, kàdi ndi muswè kwamba cintu cikwàbò kàbidì, piikalàbi bìmpè, pa bwalu ebu.

²¹⁷ Ndi ncínka ne, disangisha ditàmbe bunène dikaadiku Mukalenge munganyishile bwà kuMwenzela divwa mmu Bombay, mùmvwà ne bantu batwè ku binunu nkàmà yitaanu, kàdi, ne binunu nkàmà yìbidì ne byà mu njila mu—mu Àfrikè, mu Durban, ku cipalu cyà lùbilu aci. Mu mapingaja amu, mémè kwamba ne, paanyimà pàà bamanè kumòna cintu cinène cyà dikèmè bu nànkù ciwà Mukalenge wetù wa ngàsà mupweke ne mwenzè, mémè ne: “Ba-Missionnaires mbanùlongeshe Dìyi, kàdi Dìyi ndifùùlùlùdiibwe ne divwijiibwe ne mwoyi. CidiYe wàmba cidi ne cyà kulwa ku mwoyi.” Nènku—nènku dībà adi pàvwàku bantu binunu makumi àbidì ne bitaanu munkaci mwà kwondopiibwa musangu ùmwèpelè apu, ne màshinyi malondàngàne ne màshinyi à nkwasà yà kale; ànu kaadisambila kàmwè kakesè cyanàànà, bàvwa bamòne Nyumà Mwimpè ànu. . . Bantu mene bàvwà kabàyi nànsha bamanyè ne bàvwa

banganyì abu to ne kwìnè kùvwàbò bàfùminè, ke cyònsò civwàbò baswè kumòna. Nwamònu anyì?

218 Ki mèmè kukonka ne: “Mbanganyì bàdì baswè kwakidila Kilistò?” Ki bantu abu binunu makumi àsàtù biimàne kuulu, beena kalaba bèètù aba, bambùle mpìngù.

219 Docteur Bosworth, Docteur Baxter ne bakwàbò abu, bààkabanga kudila mwadi. Ki Mwanèètù Bosworth kulwa lubilu, wàmba—wàmba ne: “Mwanèètù Branham, edi ndyèbè ditùkù dyà kwashiibwa cifulu cyà bucìmunyi.”

220 Mwanèètù Baxter kwambayè ne: “Mwanèètù Branham, ndi ndikonka’s, ngèèla meeji ne bàvwa bùmvwè bu ne ndyondopa dyà mubidi.”

221 Nsongààlùmè wàwa s’ùvwa wènda ùkalaba. Ki Nyumà Mwìmpè kumwambilayè kùvwàye ùfùmina, civwà cyenzèke, wàmba ne: “Newàkule. Eela meeji tǔng bwà mwanèènù wa balùme, nyàwù ùsanganyibwa mu ntàntà wa mètres matwè ku nkàmà mwandamukùlù lwà paanyimà pààpa. Ùvwa wendela pa mbuji wa kàlaabi, kàdì e kucibukayè mukòlò wèndè awu.” Mèmè kwamba ne: “Kàdì, EMU MMÙDÌ MUKALENGE WÀMBA, mmwondòpìibwe.” Ki nsongààlùmè ulwàlwa ewu, ne mabaya à balèma ku byanza byèndè, mùshindù *awu*. Nènku kwangatabì tusunsa twìpacila ku makumi àbìdì bwà baampùlushì kubàtuuyisha cilunji.

222 Pashìishe nsongààlùmè ewu, ùvwa ukalaba, mùshindù *awu*, panshì, kàvwa nànsha mwà kwimana kuulu to, butaka. Kaa, ekèlekèle, cintu cyà cìkwàcìsha bwòwà bu nànkù’s! Ùvwa wèla meeji ne ùvwa ùlwa kùdì beenyi babandidi, nudi bamanyè’s, bwà kubàjìilaku ma—maja à mwìtù. Nènku ki mèmè kukwàta munyòlòlò e kuwùnyùkusha. Mèmè kwamba ne: “Bu mèmè mwà kwambulwìshakù cifùkùibwà cìkwàte ne byà luse cyàcya, kàdì kubènga kucyènza, ndi mufwànyine kwikala...Ncyènà mwà kwikala mukùmbàne bwà kwimana paanyimà apa to. Kàdì,” mèmè kwamba ne: “Ncyènà mwà kumwambulwìsha to. Kàdì mpindyewu ndi ne kaadipà kakesè, ndi ànu mwà kukàteemesha cyanàànà, cyònsò cyàmba Mukalenge aci.”

223 Nènku pààkaleejà Mukalenge, kumwambila ne yèyè ùvwa nganyi, kwamba ne: “Tatwèndè ne mamwèndè bàvwa basòmbe mwaba awu, bàvwa ba-Zulu.” Ki kwamba ne: “Mbàà tunyìitunyi, mùtùbi kabiyì pa ciibidilu to.” Zulu ùtu mu nyungulukilu wa kilòs lukàmà ne makumi àsàtù ne yìsambòmbò, ku muntu. Ki pashìishe kwamba ne: “Mbàà pabwàbù. Kàdì mwànà wa balùme ewu ùvwa mulediibwe mu dìkù dyà beena Kilistò, bwalu ku luseke lwèndè. . .ku luseke lwà dyàbalùme, paùdì ubwela mu ciibi apu, kùdì cimfwànyì cyà Kilistò, mu kazùbu kakesè kàà nsonà.” Ne cyòcì aci civwa cilelèla menemene. Mamwèndè ne tatwèndè kujuukabò kuulu. “Nènku dìnà dyèndè *nkampànda*.” Ki civwàye, ne bikwàbò

byònsò. Kabàvwa mwà kuumvwa to. Ki mèmè kutàngila paanyimà e kumumòna mwimàne kuulu mu cikèènà-kumòna amu, moolòlòke ne mwèndè mwònsò. Kacya kàvwakù mwimàne kuulu to, kacya bààmulela, ùvwa mulediibwe mùshindù awu. Mèmè kwamba ne: “Mukalenge Yesù ùdi ùmwakaja.”

224 Kàvwa nànsha ne lungènyì lwèndè mu lwòlò to, ùteeta bwà kwenza ne: “uh, ba, ba, ba” mùshindù awu.

225 Ki mèmè kushààla mukwàte ku mùnyòòlòlò, ne kuwùnyukisha mùshindù *awu*. Mèmè kwamba ne “Yesù Kilstò, mwanàànyì, ùdi ùkwakaja. Imànyinà kuulu.” Ki yèyè awu mujuukile kuulu. Binsònji bitùnkumuka, byènda bimata mu difù dyèndè difiike amu, pàvwàye wènda ùpweka mùshindù awu. Ngaakamòna beena kalaba bèètù aba binunu makumi àsàtù bàfila myoyi yàbò kùdi Yesù Kilstò.

226 Piinè apu mpàmvwà mwàmbà ku Kiwanis Club, ne: “Mpindyewu, bàdi bàngambila ne nèngiikalè munsantu mubùnguluki wa mu malaba pàngàakuumuka mu èkèleeziyà wa ba-Baptistes bwà ngaamòna mwà kubwela mu bwòùmwe ne bantu bònsò, bóbò kwamba ne: ‘Èè, neùshaalè munsantu mubùnguluki wa mu malaba,’ mèmè kwamba ne... musùmbà wa bàna bèètù bàà ba-Baptistes kwambabo nànkù.” Mèmè kwamba ne: “Nudi batùme bampàndànjlà muntwamu, bwà bidimu lukàmà ne makumi àtaanu bishààle ebi, ncinyì cingàakabàanganà? Batùngùnùke ànu ne kwambula mpingù.” Mèmè kwamba ne: “Kàdi bukolè bwà dibìikà dyà ku lufù dyà Yesù Kilstò, bantu binunu makumi àsàtù bààkaakidila Kilstò musangu ùmwè.”

227 Mpindyewu ndi muswè kunwàmbila nwènù bakàjì, nudi bamanyè cyàkenzekela bakàjì abu anyi? Mèmè kwamba ne: “Ànu mwaba mene unùdi bimàne ewu, Nyumà Mwimpè neànùjè.” Kàdi pààkelàbo byanza byàbò muulu bwà kwitababò Kilstò bu Musùngidi wabò, ne pààkuumukàbo mwaba awu; butakà, mpindyewu, kabàyi ne cìntu nànsha cìmwè to pa kuumusha kaalubondya kakesè kàà cilàmbà, kakùsu, lwà kumpàla eku; Kàdi pààkuumukàbo mwaba awu, bàvwa badìjìngile mabòkò mùshindù *ewu*, bwalu bàvwa mu bwikadi bwà bantu balùme, paanyimà pàà bamanè kwitaba Kilstò.

228 Mpindyewu mmunyì mutùdiku, bàna bèètù bàà bakàjì, mmunyì mutùdiku mu ditùnga ditùdi twamba ne tudi twitabuujà ne biikàlè beena Kilstò, ne cidimu cyònsò bàdi ànu bènda bùùmusha bàpicisha? Mpàdìbi ne, mwìnè muntu awu kacya kàtu mwànji kuumvwa nànsha Dìnà dyà Kilstò, kàdi ànu kumwitaba cyanàànà mu mwoyi wèndè. To, kùvwa mwà kubàmbila ne bàvwa butakà to, kabàvwa nànsha bacìmanyè to. Kàdi bààkadìjika mùshindù *ewu*, bwà kuyabò. Ditùkù dyàkalondà, anyì àbìdi, udi mufwànyine kubàpeta bavwàle bilàmbà, byà mùshindù kampànda. Kaa, ekèlekèle!

229 Kùdi cintu kampànda cibi mwaba kampànda. Ndikònyangakaja dya tèlòlji. Bukolè bwà dibìikà dya ku lufù dya Yesù Kilistò, mwàkenzelàYe muntu wákabìikidiibwa ne “Legònà” awu, nyèwù tumusangana muvwàle bilàmbà ne lungènyi lwèndè mu lwòlù. Kàbidì ngàbangì kwitabuuja ne nyumà udi pa bantu ngudi ubàbweja mu bwena Àmèrikè ne bwena France, ne mìshindù yònsò yà maalu à pa buloba ne bwena èkèleeziyà. Kàdi bàlekelaayibì ànu bàfikè kùdi Mukòokeshi awu, ne buumvwa dikookola dya ku ciibi adi, nebàvwale bilàmbà ne kwenza maalu bu mùdì bakàjì ne balùme, nènku nebiikale beena Kilistò balediibwè cyàkàbìdi. Amen. Èyowà.

230 Mpindyewu ngàshìkidi, nkushààle tusunsa makumi àbìdì bwà díbà nkànkalà kukùmbanadi, swàyì nshiyè bikwàbò ku luseka. Indilaayi katanci, ndambù wa Mifùndu, ndi njinga kukàngula ciibi cikwàbò. Bìdi mwà kwikalakù bìmpè anyi?

231 Ciibi cidi cilondèle, ku cyòci aci, ndiitabuuja. Nwamònu’s, nsòmbelu webè wa sungasunga...ciibi cyà diitambisha, nsòmbelu webè wa sungasunga, mpindyewu tükangulàayi diitabuuja. Bìdi mulongo mujimà, nwamònu’s, kàdi túbwelàayi mu diitabuuja.

232 Nudi bamanyè’s, kùkaadi matùkù mvwa nsanganyibwa mu lùpitaadi ne mukàjì kampànda ùvwa ne cyà kupandiibwa. Kumbiikilayè, kwambayè ne: “Mwanètù Branham, mémè ndi muntu mutwè cimpingà. Udikù mwà kunsambidila anyi?”

233 Mémè ne: “Èyowà’s, màndamù, s’ndi mufwànyine kwikala ne disànkà dya kukusambidila.” Mémè ne: “Wèwè udi muntu mutwè cimpingà anyi?”

“Èyowà.”

234 Mémè kwamba ne: “Mpindyewu twanjàayi kwindila kakesè ndambù. Swàyì nnuবাদile Mifùndu.”

235 Kùvwa inábànza kampànda mulààle mu bulààlu, muntàngile, byà bibi menemene; yèyè, ne mwanèndè wa balùme wa bidimu bitwè ku makumi àbìdì, ànu Ricky wetu ewu, kàdi mwimàne mwaba awu muntàngile mùshindù awu.

236 Ki mémè kwamba ne: “Èyowà’s, màndamù,” mungàakamba’s. Mémè kumubadila Mifùndu ne: “Nànsha mpèkaatù yènù mikùnze kùnzuù, neyikalè mitòoke bu nèjè. Nànsha yòyi mikùnze bu mashi, neyitookè bu myòsà yà mikoòkò.” Nènku pangàakamubadila cyòci aci, mémè e kwamba ne: “Piikalàbi ne ùvwa mulalùke, nwamònu’s, muye kule ne Nzambì, kàdi Nzambì Yèyè kacya kàtu muye kule neebè nànsha, cyanàànà kùvwa mwà kwikala mumbiikidishè to.” Kubangayè kudila. Mémè kwamba ne: “Netùsambilè.”

237 Inábànza kampànda uvwa mu bulààlu bùvwà bùlonda awu, kwambayè ne: “Indilà katanci! Anji indilà katanci!”

Mémè ne: “Èyowà’s, màndamù?”

Yèyè ne: “Kòkaayi ridô awu!”

Ki mémè ne: “Kwêna mwena Kilistò anyi?”

Yèyè ne: “Twètù tudi ba-Méthodistes!”

238 Mémè ne: “Èè, aci cidi ne bwalu kaayi mu bùdì panshì ebu? Nwamònu’s, aci kî ncishilàngàne ne kwamba ne uvwa—uvwa mwànà wa mpundà, pawikalà usanganyiibwa mu cikùmbi cyà ngulube nànsha, nwamònu’s.” Mémè kwamba ne: “Aci kacýèna cyùmvwija cintu to.” Nwamònu anyi?

239 Kàdi, nudi numòna’s, ke kùdici cikafike, bwakàne bwà nkààyebebè abu. “Aci cidi cibèngangana ne dyètù diitabuuja!” Mémè kwamba ne. . . “Twètù katwèna baswè dyondopa dyà kùdì Nzambi mu èkèleeziyà wetù to, anyi bintàkanyì byà mùshindù awu abi to.” Nwamònu’s, nudi numòna cîndi muswè kwamba aci anyi? Nwamònu’s, bôbò kabààkulekelaku muntu ùbwela mu ciibi aci to. “Aci’s cidi cibèngangana ne diitabuuja dyètù.”

240 Kùdì Diitabuuja ànu òmwèpelè. “Diitabuuja òmwèpelè, Mukalenge umwèpelè, dibàtiiza òmwèpelè.” Diitabuuja adi!

Diitabuuja dyànyì nditàngile Kùdì,
Wèwè Mwànà wa mùkòòkò wa Kàlvariyo,
Musùngidi wa kwà Nzambi;
Mpindyewu ngumvwilèku pàndì nsambila apa,
Umùsha bupidyà bwànyì bwònsò,

241 Mpèkaatù! Mpèkaatù, kùdì mpèkaatù ànu umwèpelè, mbwena kwamba ne bupidyà. Muntu udi unwà maalà kî ngènzàmpèkaatù to. Nwamònu’s, aci—aci—aci, nwamònu’s, kî mpèkaatù to. Kunwà kwà—kwà maalà kî mpèkaatù to. Kwenda masandi kî mpèkaatù to. Kushima, kwiba, aci kî mpèkaatù to. Abi mbyambiùbwà byà bupidyà. Bu wèwè mwena kwitabuuja, kùvwa mufwànyìne kwenza nànkù to, nwamònu’s.

242 Kùdì ànu bibìdì, wèwè udi mwena bupidyà anyi mwena kwitabuuja, nwamònu’s, ewu anyi mukwàbò. Kwèna wenza bintu byònsò ebi ne méyi matùma à ntendelelu mùshindù awu, s’ànù bwalu udi mwena bupidyà; pawikala mwena kwitabuuja, n’Dìyi dyùdì witabuuja, bwalu Kilistò n’Dìyi. Nwamònu anyi? Ne pa nànkù udi ànu mwena bupidyà bwalu udi witabuuja bilèlè kampànda, anyi bilèlè kampànda biswìka bisàkidila ku Bible, anyi cintu kampànda, bìdì màngumba ènza. Kàdi mwena kwitabuuja mulelèlè ùdì ùshààla ànu ne Dìyi adi. Nènku Nzambi ùtu ùkwàcila mudimu ànu ku Dìyi adi, ànu bwà kudifikisha ku dikùmbànadi, mu lukòngò lutùdì ne mwoyi elu.

243 Nènku mpindyewu mònaayi, ne wèwè udi wamba ne: “Kaa, ndi. . .Mwanèètù Branham, Mukalenge. . .” Èè, aci ncìmpè, kùvwa beena Mpeleshèètè bààbùngì kabàyi batengula bàakayà musangu kampànda, bôbò pààbò. Ne musùmbà wa beena Èjiipitù bàakateeta kulonda Mòsà dyàmwàmwà dyà—dyà Mbù

Mukünze, kàdi ndekeelu wa byònsò... “Ànu mùvwà Yane ne Yambèlè bakàndameene Mòsà, èè, tudi tusangana cintu cimwècimwè aci mu ditùkù dyà ndekeelu,” mmùdi Bible mwâmbè.

244 Mpindyewu tùye kumpàla ndambù. Yesù wàkamba mwaba ewu, mu cikondo eci—eci ne: “Bwalu wêwè udi wamba ne: ‘Ndi mubanji, ne mubanji ke mu bintu.’” Tàngilàayi ànu mùshindù mene utùdi leelù ewu, batàmbe kubanjika kupita mùvwà èkèleeziyà kwònsò eku! Kàdi, èè, nudi bamanyè’s, nwènù beena Mpenta s’nuvwa mwà kwikala bîmpè bitàmbe bu nwènù mwà kwikala pambèlù pàapa ne ngoma wa mutumbi, mu disangu dyà njila, mùvwà baatwènù ne baamawènù amu? Kàdi nudi ne maèkèleeziyà matàmbe bwîmpè kupita à bakwàbò abu mpindyewu, nwenda nuvulangana ne lùkàsa lutàmbidile pa buloba bujima; kàdi Nyumà wa Nzambi uvwa ne ciibidilu cyà kwikala munkaci mwètù awu wèpi? Nudi balekèle cintu cilelèlè. “Bwalu wêwè udi wamba ne: ‘Ndi mubanji.’”

245 Vùlukàayi ne, eci ncyambila beena Mpenta, bwalu cikondo cyà beena Mpenta ki cikondo cyà ndekeelu. Nwamònu’s, ditàbuluja dyònsò ditùdi naadi adi, kakwènà bulongolodi bukwàbò bujúke to. Kabwàdyàkwikalaku to. Eci ki ndekeelu. Blé mmubobè mpindyewu. Mmupicile mu mabèji, ne cikolakola, ne cizubu, nènku mmupàtùke ku blé mpindyewu. Nwamònu’s, kakwàkwikalakù kàbidì bulongolodi to. Bàakatwàdija Mvùla Mishishe mukesè, kàdi cyàkapangila ànu; cyònsò cikwàbò necipangile mwomùmwe. Nebipangilè nànkù. Eci’s m’blé munkaci mwà kupàtuka ewu. Mònaayi.

246 “Ne bwalu wêwè udi wamba ne: ‘Ndi mubanji, ne mubanji ke mu bintu, ncyènà dijinga ne cintu nànsha cimwè to,’ kàdi kùyì mumanyè ne udi mwena dikènga, mukèngeledi wa luse, mpofo, butakà, ne kùyì mucimanyè to; Mémè ndi nkubela bwà wêwè...” Kaa, ekèlekèle! “Ndi nkookola ku ciibi cyèbè.” [Mwanèètù Branham ùdi ùtuuta bintu pa cintu kampànda—Muf.] “Laòdikiyà, ndi nkookola ku ciibi cyèbè, ne nkùbela bwà wêwè kulwa kùNdi, ne—ne kusumba ngòlò muteeta mu kapyà; cilàmbà citòòke, bwà butakà bwèbè kabùmweneki nànsha.”

247 Uumùshà bintu ebi, ne ùlwatè mùdìbi bìkèngela, nwamònu’s, bwakàne bwà Kilstò, Mèyi. Kì mbwakàne bwànyì mémè to; bwakàne Bwèndè!

248 “Nènku ndi nkubela kàbidì bwà—bwà wêwè kulwa, kupetakù ndambù wa bwanga bwà mèsù, bwà wamòna mwà kulaaba ku mèsù èbè, bwà wamònakù. Bwanga bwà mèsù!”

249 Mémè ndi mwena Kentucky. Ndi mulelela lwà mu mikùnà, ne tuvwa ne ciibidilu cyà kwikala ne kaaba kakesè kàà kale mu diyeebà. Nènku twètù bânà tuvwa babàndishe ci—cibàndilu cikesè cyà kale, citùvwà tubàndila kuulu butùkù bwònsò.

Nènku tudyòlola panshi. Bàvwa ne cyà kutùbwikila cipese cyà ntentà dîbà divwà nējē ùlòka. Èè, mìtootò, bipesa byà kale byà ntentà . . .

²⁵⁰ Mbanganyi bàdi bamanyè cìdì cipese cyà ntentà? Èè, mwanèètù, mbwà cinyi ncyênà muvwàle cinsàlàbeeta cyànyì aci mwab'ewu? Ndi ànu kwètù kumbèlu menemene, nwamònu's. Èè, bipese byà ntentà wa kale!

²⁵¹ Mbanganyi bàdi bamanyè matèlas à bisoosà? Mpindyewu ncinyi cinùdì bamanyè! Mémè kudyàmbidila ne mvwa mudyumvwe bîmpè mu nyumà bwà cintu kampànda. Èè, ndi ngèèla meeji ne ndi kwètù kumbèlu mpindyewu. Mbîmpè. Nènku ncivwaku mumanye cintu cikwàbò to ànu mu bidimu bikesè bishààle ebi.

²⁵² Mbanganyi bàdi bamanyè mwéndù wètù wà kale, wà mbùngù wa kale, nudi bawùmanyè anyi? Awu's ùvwa ngondo munène wa kale, ne kazàbà ku luseke. Bàvwa ne ciibidilu cyà kwenza ne ewu uvwa ne kaacyanza katàmbe bukesè mu nzùbu, nguvwa ne cyà kusukula mbùngù wa kale awu, nudi bamanyè's. Mvwa ne ciibidilu cyà kwangata cintàkanyi cyà kale, ne bìvwa bifwànyine kunsàmpukila pambidi pònsò; nàнку mvwa ngàngata mbùngù wa mwéndù awu ne mmukùdimika kuntu kwàka, bwà kabilù kunsàmpukila. Èyowà, mmwómò menemene.

²⁵³ Mpindyewu, kakwànyì mulùme ùvwa cilembi mwedi wa matèyi. Mamwéndè wa mààmù ngwa ku meetù. Ùvwa musèle nsongààkàjì wa ba Indiens wa ku meetù à baa Cherokee lwà mu Kentucky mwàmwa ne mu Tennessee, nudi bamanyè kwòkò aku, cibandanda cyà baa Cherokee. Nènku, bàdi, yèyè—yèyè ùvwa ùtwa buluwa ne wèla mateyi, dîbà dyònsò, aku ke kùvwà—aku ke kwèndè kùvwàye ùdiila.

²⁵⁴ Nènku twètù bânà balàle kuulu kwàka, mòna's, mîngà misangu mashika àvwa ènza makolè à kacya. Nènku lupeepèlè lwà mashika lùvwà lùvwila muntwamu, tuvwa mwà kupeta mashika mu mèsù ètù, ne—ne mèsù ètù àvwa mwà kulamakana butùkù, nudi bamanyè's. Mààwù ùvwa ùbibìikila ne “mpotà.” Ncyênà—ncyênà mumanyè cidìci to, kàdi mashika àwa mwà kubwela mu mèsù èbè amu, pààwù kukwàta mashika. Nàнку ùvwa mwà kwamba ne: “Udi ne mpotà mwísù mwèbè amu,” bwalu bwà—bwà, udi mumanyè, lupeepèlè lwà mashika lùdì lùnyùngulukamù alu, kapeepèlè kàpítakana munda mwà butùkù. Mèsù ètù àvwa mwà kuula kubwita.

²⁵⁵ Nàнку mààwù ùvwa mwà kubàndà kuulu ku cibàndilu aku, mu dindà, pàvwàye ùjikija kwenza kwà mampà. Ùvwa mwà kwikala ne musàbù wà màmvwà à tumbùyi mutèèka ku mèèsà. Nènku ùvwa mwà kwamba ne: “Billy!”

Mvwa mufwànyine kwamba ne: “Yeee, mààwù?”

“Wèwè ne Edward tùùlukààyi.”

256 “Maman, ncyêna mwà kumòna to!” Mémè kubìikila mwanèètù wa balùme, tuvwa tumubìikila ne: “Humpy.” Mémè kwamba ne: “Kênà mwà kumòna to, yéyè pèndè. Nwamònu’s, mèsù ètù àvwa ne mpotà munda.”

Ùvwa mufwànyine kwamba ne: “Èyo, indilaayi katanci kakesè cyanààna.”

257 Nènkù kaakù mulùme, pàvwàye ùkwàta nshimbà... Mbanganyi bàdì bamanyè cìdì nshimbà? Ki cìvwàye, nènkù ùvwa mwà... Ùvwa mwà kukwàta nshimbà umwe, ùvwa mwà kwengulula màfutà èndè awu kàdi kuèla mu ndundu. Nènkù màfutà à nshimbà awu àvwa bwanga bwà lwòndapu bwà dîkù dyètù. Bàvwa mwà kutùpèèshawù bwà cimpumpu cicolè, ne viikisè mwelapù, ne màfutà à mpiitùloolò. Tuvwa mwà kuàmina bwà disaamà dyà byà pa muminu. Pashiishe kwangata màfutà à luuyà à nshimbà awu, ùvwa mwà kutùlaabawù kwisù, nènkù mèsù ètù àvwa mwà kutàbala. Nwamònu’s, mmàfuta à nshimbà àvwa ènza cintu aci. Nwamònu anyi?

258 Mpindyewu, mwanèètù wa balùmè, mwanèètù wa bakàji, tudì bapicìle mu cipòòlù cyà mashikà, mu èkèleeziyà. Ncyà bushùwà, bulongolodi bwàbúngì bwà ntèndeleelelu mbulwè bu lupeepèlè, bantu bònsò mbakwàcike mashika. Bantu bààbúngì bàdì ne mèsù àbò mabwita, ne kùdi Nsangilu munène wa Maèkèleeziyà wa Buloba bujimà udi ulwa, mwaba ewu, wíkala ne cyà kwenzeja muntu yònsò wa kunùdi bwà kubwelamù. Bàdì bàseesuka ku Díyì adi, bisùmbù byètù twètù biinè abi. Ndi mwambule bujitu bwà Mukenji; kí mbwà kwikala mushiilàngàne to, kàdi bwà dinanga. Dinanga dìdi dilongolola bilèma. Alùkilaayi! Shààlayi kule ne cintu aci! Nwènù bambi naanyi, mémè ncyênà ncyùka cìdì bisùmbù byènù byènza to, shààlaayi kule naaci! Shààlaayi pambèlù pààci! Ncimanyinu cyà nyama wa lwonji, shààlayi naaci ntàntà! Nwamònu’s, Yesù ùdi ùkookola mu cikondo cyà Laòdikiyà eci. Nudi bamòna mwaba ùdibo baMutèeka pambèlù anyi? Ùdi ùteeta bwà kubwela kùdi bantu-nkàâyà, kaciyi—kaciyi kùdi malongolodi ne bisùmbù byà bantu to. Ùdi ùteeta bwà kupeta umwe *apa* umwe *kwàka*, ne umwe *kwàka*, munkaci mwà kuteeta. “Bònsò bândi munange ndi mbànyooka.”

259 Bu mùvwà mwakùnyàànyi wa balùmè mupetè cikèèna-kumòna mwab’ewù, ne kwamba ne ùvwa mupetè cikèèna-kumòna. Nènkù kwambayè ne: “Bukènkè bùmwebùmwe ebu bunùdi nwakidila, bùdi bùnùlelela lufù, kàbìdì.” Nwamònu anyi?

260 “Bònsò bândi munange, ndi mbànyooka; ikàlaayi ne lukunukunu, ne alùkilaayi. Ndi mwimàne ku ciibi, ne nkookola.” Mpindyewu, tàngilàayi, màfutà à nshimbà kaakwenza cintu cìmpè nànsha cìmwè nànsha.

Kàdi kùdi Mpokolo mùle tètè ne Mashi,

Makòka mu mijilu yà Èmanùwèlè,
Mùdi bangènzàmpèkaatù bàtùkina mu
nkwaka awu,
Bàjìmija makeji ààbò ònsò à dipiìla.

Mwívi uvwa ùpùnga ne lufù awu wàkasànka
bwà kumòna
Mpokolo awu mu ditùkù dyèndè;
Mwaba awu mèmè pàanyi, nànsha múmvwà
mubi kumòna bu yèyè amu,

²⁶¹ Mmunkàngùle mèsù ànyì, ne bwanga Bwèndè bwà mèsù. Nyumà Wendè wàkapweka ne kuteemesha Bible, bwanga Bwèndè bwà mèsù. Ncìvwa mwà kuCimòna to. Mvwa ànu mpaasàtà wa pa kaaba, wa ba-Baptistes. Kàdi dīngà ditùkù Wàkapwekesha Nyumà Wendè, kí mmàfutà à nshimbà àkanàngululàYe to, kàdi Wàkatùma Nyumà Mwìmpè ne kapyà! Bwanga bukesè bwà mèsù bulaaba pa Bible wanyì mujimà—Bible yànyì. . . nènku ndi mwà kumòna ne dīsù dyànyì ndi nswa kwamba ne bulaaba pa mèsù àanyì bwà ngààfika ku dimòna Bible wanyì. Ki mèmè kumòna ne: “Yèyè ùvwa umwèumwè awu makèlèlèlè, leelù, too ne kashidi. Dìyì dyà muntu yònsò diikalè mashimi, ne Dyànyì diikalè dilelèlè. Ndi mwimanè ku ciibi, nkookola.”

²⁶² Kaabwalu kakwàbò kakesè kàmwèpelè. Tudi ne dībà anyì? Èyowà, èyowà, dībà adi nēnye, nwamònu’s.

²⁶³ Kùvwa muntu mununu kampànda mufiike ku Sud kwàka. Nènku, mpaasàtà wendè, mvwa mumumanyè, muntu mununu mulenga. Tuvwa tumubiikila ne Gabe. Dīnà dyèndè ùvwa Gabriel, kàdi tuvwa tumubiikila ànu ne Gabe. Yèyè misangu yònsò, mpaasàtà ne mèmè, tuvwa—tuvwa tuya mu dizomba, bònsò. Yèyè ùvwa mwanèètù mununu wa bafiike, nènku tuvwa tupàtuka tukazomba. Ne nànkù mununu Gabe ewu ùvwa muswè kuzomba kupìta muntu kanà yònsò ùntù mumanyè ewu, kàdi kàvwa ne ndudì to. Pa nànkù, dīngà ditùkù mpaasàtà wendè ne yèyè kuyabo mu dizomba.

²⁶⁴ Kàdi katùvwa mwà kufikisha ànu mununu Gabe ku diya mu èkèleeziyà to. Kàvwa ànu muswè kucyènza to. Kàvwa ànu muswè kulwa mu èkèleeziyà to. Kwambayè ne: “Kaa, ncyènà muswè kuya kuntu kwàka kùdì beena lubombo aku to.”

²⁶⁵ Ki mèmè kwamba ne: “Kàdi, Gabe, paùdì ànu ushààla pambèlù, mbànène bakupìte. Wèwè udi usokoma paanyimà pààbò, nwamònu’s.” Mèmè kwamba ne: “Udi usokomena paanyimà pààbò. Udi mutàmbe kukèèpela kùdìbò; bòbò bàdi bàditàcishaku bàpweka, nwamònu’s.”

²⁶⁶ Ki pa nànkù yèyè kwamba ne: “Ndi—ndi—ndi—ndi—ndi ne kaneemu kààbùngì bwèbè wèwè, Mukalenge Bill. Kàdi,” mwàkambayè, “ndi—ndi—ndi—ndi mumanyè mununu Jones

usòmbèlè uya kuntu kwàka, ne kènà ne cidiye cyà nsongo to; ùdi ùtwa mubèlè, ne byònsò abi.”

267 Mémè ne: “Aci’s mmwòmò, Gabe. Wamònu’s, byònsò abi mbîmpè. Kàdi, vùlukà ne, Jones ngùdi ne cyà kulumbulula bwà aci; kí ngwêwè to, nudi numòna’s. Wêwè ànu uya . . .” Mémè ne: “Udi ne mpaasàtà mwîmpè.”

268 “Kaa, Mpaasàtà Jones ùdi umwe wa ku bantu bàà batàmbe bulenga bàdì mu ditùnga’s!”

269 Mémè ne: “Yèyè ìkalè cileejilu cyèbè, wêwè kùyi mwà kutàngila mukwàbò. Yèyè ìkalè cileejilu cyèbè.”

270 Ki dîngà ditùkù Mwanèètù Jones kwambayè ne, wàkaya ne Gabe mu dizomba, e kwambayè ne: “Twakakwàta tùlulu twàbúngì ne nyuunyi, ditùkù adi, mu mùshindù wà ne twakapanga too ne mwà kubyàmbula.” Ki yèyè ne: “Twètù kwalukila mu dilòlò.” Kwambayè ne: “Mukùlumpè Gabe ùvwa ùlonda paanyimà, mwambùle bujitu bumupite, nudi bamanyè’s, mùshindù awu.” Ne mukàjèndè ùvwa mwena Kilisto mulelèlè, wa lulamatu. Ùvwa ne mwaba ànu muntwamu, mukàjì mùle tètè ne Nyumà Mwîmpè, ne ùvwa misangu yònsò ànu pa kaaba kèndè kàà mudimu. Pa nàнку yèyè ùvwa . . . Mukulumpe Gabe ùvwa ùlonda paanyimà apu, nudi bamanyè’s. Ki Mpaasàtà Jones kwambayè ne wàkakènzakana, ùvwa mwà kumòna ne: “Mukùlumpe Gabe ùvwa ànu wènzà kutangidila pa dikaaya, mùshindù ewu. Dìbà dyènda dibwela,” e kwambayè ne: “dyènda dipweka bikolè, kuulu kwènda kùtalala.” Yèyè ne: “Paanyimà pàà katanci,” yèyè ne ùvwa wènda wènda, kwambayè ne: “mununu Gabe bànda kolèshà’s. Ùvwa ne lubungu lwèndè lwà cingoma lulembelejila tùlulù ne nyuunyi, ne bikwàbò.” Yèyè ne: “Wàkatuuta mpaasàtà kaadipì pa dikaaya, wàmba ne: ‘Mpaasàtà?’”

Yèyè ne, kukùdimukaye, kwambayè ne: “Èyowà, Gabe, mbwalu kaayi?”

271 Ki kutàngilayè, ne binsònji bu màyi bitùnkumukila pa matàmà èndè mafike apu, pàvwà mwedi wèndè wènda ùshààla mutòòke. Kwambayè ne: “Mpaasàtà, mwva munkaci mwà kwendela ku mwelelu wà màyi eku, bu munda mwà citùpà cyà dìbà.” Yèyè ne: “Ndi munkaci mwà kutàngila mùdì dìbà adi dyènda dipweka.” Yèyè ne: “Udi mumanyè’s, myedi yànyì mitòòke eyi, ne nsukì yànyì yidì yènda yitòòka eyi,” mwàkambayè, “udi mumanyè’s, dìbà dyànyì dìdì dyènda dibwela, pàadi, mpaasàtà.”

272 Yèyè ne: “Ncyà bushùwà, Gabe.” Ki kwimanayè ànu cyanààna e kukùdimuka, kwambayè ne: “Kàdi bwalu bwèbè bùdì bishi?”

273 Kwambayè ne: “Dyànyì dìbà dìdì dyènda dibwela, pàadi.” E kwambayè ne: “Udi mumanyè anyi?” Yèyè ne: “Mvwa muditwe mu dyela dyà meeji,” mwàkambayè, “pàmvwà ngènda ndwa

paanyimà pèèbè apu.” Yèyè ne: “Udi mumanyè’s,” yèyè ne, “Mukalenge ùdi ne cyà kunnanga.”

Yèyè ne: “Bushùwà, Yèyè mmukunange menemene, Gabe.”

274 Kwambayè ne: “Udi mumanyè’s, mèmè ncyèna ne ndudì to.” Kwambayè ne: “Ncìvwa mwà kwasa nyama nànsha umwe to, kàdi,” mwàkambayè, “tuvwa—tuvwa dijinga menemene ne munyìnyì ewu kumbèlu.” Ki kwambayè ne: “Tàngilà ànu mushiki bunènewù wà nyama yìdiYe mumpèèshe, nyuunyi eyi ne tùlulù etu.” Yèyè ne: “Ndi ne búngì bukùmbàne bwà kutùlama ne mu lumingu lujimà lùdi lulonda elu.” Yèyè ne: “Úvwa ne cyà kwikala munnangè, bwalu ncyèna mwà kwasa cintu nànsha cìmwè to, s’udi mumanyè.” Kwambayè ne “Ncìvwa mwà kwasa cintu to, kàdi tàngila ànu bidìye mumpèèshe.” Ki pashiishe kwambayè ne: “Údi ne cyà kunnanga, cyanààna Kàvwa mwà kwikala mumpèèshe bintu ebi to.”

Yèyè kwamba ne: “Ncyà bushùwà.”

275 Ki yèyè kwamba ne: “Èè, mvwa ne dikookola dikesè dyà pabwàdi ku ciibi cyànyì, kuntu kwàka. Kungambilayè bwà kukùdimuka wàmba ne: ‘Gabe, dyèbè díbà didì dyènda díbwela, pàadi.’” Yèyè kwamba ne: “Mpaasàtà, udi mumanyè cìndì mwenzè anyì, mpaasàtà?” Yèyè kwamba ne: “Ndi muMwenzèle mulayi.”

276 Yèyè kwamba ne: “Gabe, ndi muswè nkukonkèku cintu kampànda.” Yèyè kwamba ne: “Ndiyishsha kaayi díngààkayishà didì dikufikishe ku didyùmvwa mùshindù awu?” Yèyè kwamba ne, mpaasàtà, anyì kwambayè ne: “Mpindyewu indilà kakesè,” kwamba ne: “nkoralè kaayi—kaayi—kaayi uvwa mwímbe misambu?”

277 Yèyè kwamba ne: “Kaa, ndi munange bushùwà menemene ngimbilù wa mu èkèleeziyà awu, mpaasàtà.” Yèyè ne: “Ndi munangè mukenji wònsò wùdi uyiisha awu, bwalu ùdi ùfùmina buludì mu Mukàndà mwímpè awu, ne ndi mumanyè ne ngwà bushùwà. Kàdi,” yèyè ne, “kacìvwa aci to.” Kwambayè ne: “Yèyè mmukookòle ànu cyanààna, ki mèmè kukènzakana mwab’ewu, ne kumòna mùdìYè mwímpè kùndì, byàmpèèshiYè.” Kwambayè ne: “Mu dyàlumingu mu dindà, nembàndè ànu kumpàla aku mwaba ùtù wimana awu.” Yèyè kwamba ne: “Nènkupèeshè cyanza cyànyì cyà dyàbalùme,” wàmba ne, “bwalu ngàmányì kufila mwoyi wànyì kùdì Mukalenge, ànu lwà kwínshì kwà kakùnà kwàka.” Yèyè ne: “Ndi ne cyà kubàtijiibwa, ne kusòmbela ànu ku luseke lwà mukàjàànyì. Nènkù nenshààlèmu too mwambiikilà Mukalenge mu mwaba mutùmbùke.” Nwamònu’s, wàkabanga ànu kukènzakana e kumònayè mùshindù ùvwa Nzambì mwímpè kùdiye.

278 Mèmè ndi mpàndànjlà. Bu wèwè mwà kutàngidila mu mèsù àndì mèmè ntàngidila mpindyewu awu, ne kumòna mwaba wà ba Indiens, bantu bakesè bàdì bàfyototoka ne nzala abu,

bamaamù bàfwa nzala mu mùsèsèsù, bânà bààbò bakesè abu kabàciyi nànsha mwà kudila kàbìdì to, bwà bukolè bwà nzala, nènku anji elààyi meeji ku bitùvwà naabi mwab'ewu leelù ewu. Tàngilààyi tùshinyi tunùdì balwè naatù. Tàngilààyi bilàmbà binùdì balwàte abi. Mònaayi mùshindù unùdì babanji. Mulundà wanyi, kwèna mwà kuumvwa kaadikookola kakesè aku mwaba kampànda anyi?

Tùsambilààyi.

²⁷⁹ Ne mitù yètù miinyika, ne myoyi yètù, bu mùdì tusunsa mpindyewu munkaci mwà kuya, nkushààle tusunsa tutwè ku mwandamutekète bwà dìbà nkànkàlà kukùmbànadi. Mwanèètù wa balùme, mwanèètù wa bakàji, maalu à mamanya àdì àtwàmbila ne tusunsa ntushààdile ku tùsàtù kumpàla kwà mundankulù. Mpindyewu bu wèwè ànu mwà kukènzakanakù, kàdì kwela meeji munda mwà kasunsa kàmwèpelè. Bânà bèèbè bakesè abu basòmbe ku luseke kwèbè aku. Mbânà bùngì kaayi bàdì bàkwàcike kùdì dìsaamà dyà tukùlàkàji!

²⁸⁰ Tàngilà mukàjèèbè mulenga awu, mwanèètù wa balùme, ne elà meeji ku bùngì bwà balùme bàdì ne mìliyô yà ndola, kàdì kunanga mukàji ne mwoyi wèndè wònsò, mukàji's mmwena lalàlala. Ùdì mwà kufila mùliyô wèndè mujimà awu bwà kufikisha mukàji wa mùshindù awu ku dimunangayè mùdì mukàjèèbè mukunange amu. Kàdì wèwè, mukàji, mbakàji bùngì kaayi...?

²⁸¹ Mbaamaamù bùngì kaayi kaaba aka mu dindà emu ne bânà bààbò bakesè, mbaataatù bùngì kaayi bàdì ne...? Mòna's, ekèlekèle, kùdì balùme bààbùngì bàdì bàtàngila ku kalààlù kàà bânà, kalùmýànà kàà kale kuuminyine, kantanyi kàà kakwàte ne byà luse, kacibùkile panshi, nènku tàngilààyi bânà batekète bulengabu banùdì naabò. Nwamònu anyi? Ne bânà bakesè bààbùngì, pàmwàpa... .

²⁸² Éyi Nzambi! Kùdì bintu bùngì cyanààna, bu wèwè ànu mwà kutàngila. Yèyè mmutàmbe bwìmpè bwètù twètù beena Àmèrikè. Mpindyewu kanwènakù mwà kudyùmvwa ànu ne nudikù mwà kujinga bwà kwikala ne màfutà à kulaaba mu dindà emu ne: “Kàngulàku mèsù àanyi mmonàku kule ndambu, Mukalenge, kàngulà mèsù àanyi!”? Ànu mùvwà mwanèètù wa bakàji munanga ewu mwìmbè ne: “Dìsù dyèndè dìdì ma mushààmushà, ànu kaamushààmushà kakesè aka, nènku ndi mumanyè ne Yèyè mmuntàngile.”

²⁸³ Mpindyewu Yèyè ùdì munkaci mwà kukutàngila mpindyewu mene. Udikù mwà kuumvwa ànu cyanààna, lwà kwìnshi eku mwaba kampànda, kaadikookola kakesè bu *nùnkù*, [Mwanèètù Branham ùdì ùtuuta bintu pa cintu kampànda—Muf.], “Ndi nkùmbulangana, mu dindà emu anyi?” Mbunèmè butàmbe bunène bùdì bupèèbwe, bu wèwè mwà kuumvwa dikookola adi ku mwoyi wèbè.

284 Udikù mwà kwela ànu cyanza cyèbè muulu cyanààna, kwamba ne: “Ku eci, Mukalenge, ku dikwàcisha Dyèbè ne ngàsà Webè, kubangila ànu ku leelù, nengëndè mulamàkàne neebè Wèwè ànu mùndi mumanyè mwà kwenda. Ki cyònsò cìndi pàànyì mumanyè bwà kukulòmba Wèwè anyi?” Nzambi àkubènèshè. Nzambi àkubènèshè. “Ku dikwàcisha Dyèbè ne ngàsà, leelù ewu, kubangila ànu ku leelù ewu, ncyàkupwàku mwoyi eci to.”

“Mònaayi, ndi mwimanè ku ciibi, nkookola. Muntu nànsha umwe yèyè. . .”

285 Mpindyewu, vùlukàayi ne, Yèyè ùvwa ùkookwela penyi, ku diyeebà anyi? To. Ku cinwinù cyà maalà anyi? To. Ùdi ùkookola penyi? Ku èkèleeziyà!

286 “Muntu yèyè muumvwe Dìyi Dyànyì, ne muNgunzùlwile, Nèmbwèlè ne ndyè nendè, ne yèyè neàdye Naanyi.”

287 Nzambi Munanga, mèyi makesè makòsòlòke, masambakaja, ndambù àdi mambiibwè mu dindà emu aa, mu mishindù yònsò swàkù bwà Nyumà Mwímpè àwumvwijè myoyi yà bantu.

288 Mpindyewu kùvwa bààbùngì, Mukalenge, pangāpa mu bantu lukāmà emu mùvwa bantu makumi àbidi anyi makumi àsàtù béle byanza byàbò muulu. Mémè ncyénà ne mùshindù wà kumanya civwàbo bàjinga to, Mukalenge. Kàdi ndi mumanyè ne dībà nkānkālā didi dijika ànu mu tusunsa tukesè emu, ne ànu nānku ke mùdi Dilwa dyà Mukalenge; nānsha nānku, kumpāla kwà nējè ewu kwengulukayè mu malaba emu, tudi bafwānyine kwikala babiikidiibwe, ne eci ncifwānyine kwikala cikondo ciikalā mwà kushintulula matukù ónsò ácilwalwà à ne anyi nebāshaalè pānu apa anyi nebābandè muulu.

289 Nzambi munanga, ne didipwekesha dyònsò tudi twitaba Yesù, tudi twitaba Mèyi Èndè ónsò. Tújaaku, Mukalenge, tújaaku ne Nyumà Mwímpè Webè, bwà sè mwoyi wètù wākāmākù wówò nkàayaawu mamuma. Enzàku nānku, Mukalenge.

290 Túfwileku luse ku bilēmà byètù byàbùngì. Kaa, tudi bapàte tētè naabi, Mukalenge. Ne twètù katwēna ne cintu nānsha cimwè citùdi mwà kulāmbula to, Mukalenge, bwalu, byònsò bitùdi naabi abi, Wèwè ngudi mutùpèeshèbi. Bu mwākambà Gabe, mu kaabwalu-kalonda kakesè katùvwà tufùma ku dilonda aka ne: “Wèwè, Wèwè bushuwà menemene udi mutùnangè, Mukalenge, cyanààna Kùvwa mwà kwikala mucyenzè to.” Nènkù, pa kwela meeji ne, bantu aba mbasòmbè kaaba aka kubangila pācyācyā mu dindā emu, basòmbè kaaba aka kwambwila ku dībà musaasamu jaajaaja, kùdi mēbà ànaayi àdībo basòmbè mwab’ewu. MbaKunange, Mukalenge. MbaKunange. Mpindyewu, Taatù, Udikù mwà kutùma bwanga bwà mēsù bwà Nyumà Mwímpè, kukāngula mēsù ètù. Twikalèku. . .

291 Aba bàdi mùnwemu mu cimenga emu, anyishà bàmbulujè lùkàsà batāngile ku ditābuluja dyà dilòlò edi, kwikalèku

dipòngoloka dyà mùshindù wà kacya's! Enzàku nàнку, Mukalenge. Swàkù bwà ditabuluja dyà cyena kale dibange mu cimenga emu. Enzàku nàнку. Bènesháàku muntu yònsò udi ubwelamù, yònsò wa ku basadidi Bèèbè pa buloba bujimà, udi uditàcisha bwà kwenzaku cintu kampànda. Ikàlà naabò, Mukalenge, ne ubàkwàcishè.

²⁹² Kàngulàku mèsù ètù bwà tùmone bwà kumòna, bikolè menemene, cimfwànyì cyà Kilistò. Enzàku nàнку, Mukalenge. Tufwilèku luse ku mpèkaatù yètù.

²⁹³ Nèнку mpindyewu aba bàdi bélé byanza byàbò muulu aba, Taatù, ndi nKulàmbulabò. Baakidilekù. Mpindyewu ndi ntéèla Diyì Dyèbè Sungasunga, Mukalenge, bwalu: "Maulu ne buloba nebìpangilè, kàdi," Wèwè wákamba ne: "yèyè," cidi mmupinganyi muleeji muntu ne: "ewu udi umvwa Méyì Àànyì..." Mukalenge, àvwa mwà kwikala makòsòlòke ne makesè, kàdi muntu kampànda mmuàtèèlèje. Dimiinu ndimatè. "Ewu udi umvwa Méyì Àànyì ne," mutwàngaji, "wítabuujja Ewu udi muNtùme," bwalu Yèyè wàkenza cyòci eci, "yèyè ùdi ne (dìbà dyà mpindyewu) Mwoyi wa kashidi, ne kààkupìcila mu cikondo cìlwalwà ku cilumbulwidi to, kàdi mmuumùke ku lufù muyè ku Mwoyi." Bèdi byanza byàbò muulu, Mukalenge. Mbadyatàkàje mikenji (yònsò) yà maalu à mamanya; bukolè bukòki bùdi bùlama byanza byètù bipweksha. Kàdi bààjaadiki ne kùdi nyumà munda mwàbò, uvwa mwà kutèèleja dikookola dyà ku ciibi, ne kwolola cyanza cyàbò cyà dyà balùmè citàngija mu Dyulu. Mpindyewu kàngulààku ciibi. Kàngula, Mukalenge, ne bwelàku. Twètù tudi Bèèbè. Twàkidilèku, mu Dinà dyà Yesù Kilistò. Amen.

Ndi muMunange, ndi muMunange
Bwalu Yèyè wàkannanga kumpàla
Ne wàkampetela lupàndu
Ku mucì wà Kàlvariyò.

²⁹⁴ Udi muMunange anyì? Ndi ndìkonka ní tudikù ànu mwà kubwita ku mèsù kwètù, bwà katanci kakesè cyanààna. Mpindyewu byùmukila mu nmyoyi yètù, ne byanza byètù byela muulu.

Ndi muMunange, ndi muMunange
Bwalu . . .

²⁹⁵ Tudi twitaba dikookola Dyèbè, mu dindà emu, Mukalenge. Byanza byànyì mbyela muulu. Byanza byètù byònsò mbyela muulu, Mukalenge.

Ne . . .

Mpindyewu bwelàku, Mukalenge Yesù. Bwelà mu myoyi yètù ne ùdye neetù dilòòlò edi, ne twètù netùdye Nèbè dilòòlò edi.

Mucì wà Kàlvariyò!

296 Nudi baMunangè anyi? Kaa, ngèèla meeji ne Yèyè's mmulenga be! Kí mmwómò anyi? Kanwènakù buumvwe Bwikadi Bwèndè ànu bu bùdì bwènda bunùkezula anyi? Ndi ndyumvwa bîmpè mu nyumà ànu mpindyewu ewu, ànu—ndi ndyumvwa ànu bîmpè menemene, cintu kampànda bwà bwalu abu.

Diitabuuja dyànyì nditàngìle Kùdì,
Wèwè Mwànà wa mùkòòkò wà Kàlvaryò,
Musùngidi wa kwà Nzambì;
Mpindyewu ngumvwilèku pàndì nsambila apa,
Umusha mpèkaatù yànyì yònsò,
Kaa enzàku ne kwambwila ku leelù ewu
Mémè yònsò ngiikalè Webè!

297 Mpindyewu ndi muswè bwà nwénù, patùdi twimbila citùminyi cidi cilonda cyà muyenga mulenga awu mu matàma apu, muyenga wà kale wà èkèleeziyà, ndi muswè bwà nùlabulanganè ku cyanza ne muntu kampànda. Shààla wèwè ànu mu nkwasà webè amu, wamba ànu ne: “Nzambì àkubènèshè, mwanèètù wa balùmè. Nzambì àkubènèshè, mwanèètù wa bakàji. Ndi ne disànka be dyà kwikala neebè kaaba aka!” Twenzàayi nànkù. [Mwanèètù Branham ùdi wimbila mu matàma *Diitabuuja Dyànyì Nditàngìle Kùdì*—Muf.] Nzambì àkubènèshè, Carl, ne disànkà dyà kwikala kaaba aka...?...

298 Elàayi ànu meeji ne, byanza byà ba-Méthodistes mbikwàte byà beena Mpenta, byà ba-Baptistes mbikwàte byà ba-Presbytériens.

Éyì enza ne . . . kuumukila ku ditùkù edì
Mémè yònsò ngiikalè Webè!

299 Mpindyewu patùdi twimba bitùùlùbitùùlù mpindyewu apa, kàbìdì, byùmukila mu ndòndò wa mwoyi wèbè. Nudi bamanyè's, paanyimà pàà Mukenji wà ùkezulangana, wà ùtândishangana, Ngèèla meeji ne mbîmpè bwà kubwela mu Nyumà ne kwimba, kalolo kàà Nyumà Mwîmpè.

300 “Kaa mùshindù mwinè ùdìbì byà kalolo bwà bàna bàà muntu kusòmba pàmwe mu bùmwe!” Bible mmwàmbè ne: “Bidi bu maanyi à dilaabiibwa àvwà pa mwedi wà Aalònà, àvwà àpwekela ku bizemba byà mìzàbì yèndè.” Nudi bantu bàà dikèma munwemu. Ndi ntèkemena bwà kwalukila kunùmònakù kàbìdì kumpàla kwà Yesù kumbiikilaYè, anyi Bukalenge bwà bidimu cinunu. Mémè ncìyì mwalùkile to, nennùmòne dyàmwàmwa dyà musùlu. Nentuutakeenè neenù ku musùlu. Amen. Ncipungidi.

Pàndì ngendela mu nyongolo wa mîdimà wa
njila mibwelàkàne wa pànu apa apa,
Ne bisaamà binjìngìle,
Wèwè ikàlà Mulombodi wanyì;

Tùminà m̀dimà d̀yì bwà kwandamukayì
munyà, (Bukènkè bukesè bùdibo bàmba
abu.)

Kùpulàku bwôwà bwà tunyinganyinga,
Kaa enzà bwà ne kuumukila ku leelù ewu
Mèmè yònsò ng̀ikalè Webè!

³⁰¹ Ciibi cyònsò cikàngula! Kaa, lengà wèwè ànu mbòta mukese awu, ne ùtàngile mùdì byònsò byènda bìya binyùngùlùkile cijèngù aci; ambà ne: “Bwelà, Mukalenge Yesù, ikalà Mukalenge wanyì, byànyì byònsò.”

Kaa enzà ne mèmè kwambwila ku leelù (to,
nciKulekèdì mwimàne ku ciibi to,)
Mèmè yònsò ng̀ikalè Webè!

³⁰² Nwênù bàvwà bèlè byanza byènu muulu ne baswè bwà kutùngunuka ne kwikala balombòdìbwe kùdì Mukalenge abu, ndi nnùlòmba bwà nwênù kupweka ku ditabuluja dilòòlò edi. Nèku ndi mutwishìibwe ne mpaasàtà wa kuntwaku mmufwànyine kunùumusha kunweku too ne ku cilàala-beenyi. Ùdi ne mèyà àsambòmbò, ànyì ní ncinyì cyònsò cyàkafidiibwà aci, bwà kwambula bujitu bwàbò, ne mvinyò ne màfutà à kupòngòlwelamù. Udi mwà kujikija mudimu.

³⁰³ Nzambì ànùbènèshè mpindyewu. Nèngààluje disangisha, ngèèla meeji kùdì, Mwanèètù Williams, anyì yònsò udi . . . 

65-0206 Biibi Mu Ciibi
Americana Hotel
Flagstaff, Arizona États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org